

(النضج العاطفي)



هتحصل في المستقبل، وبالتالي نظرة أحد الطرفين لمستقبل بعيد المدى للعلاقة اللطيفة دي.

إزاي تعرفي إنه الراجل دا ناضج عاطفياً؟..

١- ابعدي عن «الخام» وعلى عكس ما بنات كتير بتتوقع (كل ما كان الراجل خام كل ما هيكون أحسن في الارتباط) في الحقيقة كلامها صح لو كانت بتدور على راجل سهل تقدر تتحكم فيه، خصوصاً لو هي قادرة تفهم الرجالة كويس وهو شخصيته ضعيفة، أو ال low self esteem بتاعه مش محليه يقدر يتجرأ إنه يكلم» بنات» غريبة ويعرف عليهم .

الراجل الخام يا بيكون لشخص «اتربى في بيئة» محافظة جداً في صغره، وبالتالي معندوش «فورميلا» قدر طورها شخصياً في إنه يقدر يتكلم مع الجنس الآخر في مرحلة مراهقته* واللي طبيعي إنه يبدأ يكون عنده فضول إنه يتعرف على الجنس الآخر فيها .

فتبالي لما بيكبر بيتحول للشخص «المحترم أوفر دوز» اللي مستحيل يقول كلمة غلط وهتحسبه مندمج مع اللي بتقوليه باستمرار وبيميل إنه يتجه اتجاهات فكرية حتى عكس البيئة اللي اتربى عليها زي إنه يتباهى قدامك (بعدد أصدقائه البنات اللي بيسكروا كل يوم) أو إنه عنده أصدقاء» عاهرات «أو حتى يقولك: «أنا أصدقائي البنات بيخلوني أختار الفساتين بتاعتهم قبل ما بيشتروها». في الغالب دا بيكون مجرد «هري» بيحاول بيه يزود) ثقته بنفسه) اللي هي أصلاً قليلة.

وكمان تمهيداً إنه لما يطلب منك أي حاجة في المستقبل هتبقى طبيعية جداً مقارنة بالبلاوي اللي بيحكها لك دي.

الخام كمان خطورته وكارثته إنه بعد الجواز بمجرد ما ال self esteem بتاعته بتزيد ويبدأ يطور» فورميلا «قوية بما فيه الكفاية إنه يتعرف على «أخريات «بيبدأ تدريجياً يدور على «فرائس» أخريات بره البيت، وخصوصاً لو مادياً بقي مُستقر نفسياً وحصله شوية «رفاهية



مادية» بعد ما كان بالكاد عارف يعيش. يببدأ يتحول لشخص مناقض تماماً للي ارتبطتي بيه أو اتعرفتي عليه.

ووقتها هتعرفي إنه الشخصية العاقلة المتدينة الهادية دي ما كانتش» اختيارية «كانت إجبارية ومجرد ما ثقته بنفسه زادت، بدأت شخصيته تتحول للعكس وللنقيض ليها. ويبدأ يعمل حاجات في سن كبيرة» مراهقة عاطفية» زي إنه يدور على بنت صغيرة وجميلة يجيلها ورد ويخرجها بعربيته الحلوة ويوديتها سينما، وكل اللي كان المفروض يعيشه في السن الصغيرة بيعيشه في السن الكبيرة دي* حتى لو البنت أد عياله وأنا بشوف دا كثير في شغلي.

في الغالب بعد فترة (ما) من ٣ لـ ٥ سنين) الشخص دا بيرجع بتوازن نفسياً وعاطفياً تاني، لكن أحياناً الزوجة مش بتستحمل الفترة دي فبتفصل عنه.

الخام في مرحلة ما قبل نضجه، بيكون شخص مرن جدا جدا!!!!!! بطريقة لا تتخيلوها .

يعني لو قولتيه أنا بسمع مزيكا أسكتلندي (هيقولك وأنا كمان أعرف المغني الأسكتلندي الفلاني ومن أجمل أنواع المزيكا اللي سمعتها) وهيبعتلك تراكات ليها، ولو قولتيه «أنا بفكر أطلع الحجاب «هيقولك» دا قرار كويس وأنا بدعمك فيه». حتى لو هو من البداية ضد الفكرة دي مثلاً. ولو قولتيه «أنا بفكر أتدين» هيكون أول شخص بيبعتلك مقالات عن التدين والدين والروحانيات .

لأنه «ضعف شخصيته» وعدم نضجه لا إرادياً بيخليه يبعد إنه يحصل «صدامات» معاكي تجنباً إنه فرصه تقل في التعرف والتقرب ليكي، وبالتالي البنات بتبعد عنه لحد هو ما بيتعلم من خطأه ومرة في مرة بيطور (فورميلا) يقدر بيها يتعرف على البنات الجديدة أو approaching tactics— أنظمة تقرب ناجحة بما فيه الكفاية إنه يتعرف عليهم بيها .

خطورته بقى الكارثية لو اتحول لشخص (رابط ثقته بنفسه بعلاقاته النسائية) كدا يبقى خد أول الطريق السريع للشخصية النسوانجي .

لكن عند الولاد... خيلنا نقول مش دائماً لكن بيحصل إنه بيتحول لكارثة أحياناً .

إزاي بقى يا عويس، مش المفروض دي حاجة تفرحه وتبسطة؟

أقولك نظرياً آه، لكن خلونا نغوص أعمق في دماغ الرجل في عقله الباطن ونتخيلها مع بعض.
المثال: شاب عمره ما حس بالأمان في حياته وهو طفل، ولالقى حد يوجهه نفسياً إنه يشبع الاحتياج دا بطريقة منوعة وصحية ما) فعقله الباطن علشان يشبع الاحتياج دا * لأنه لازم لازم يحصله إشباع وإلا ينهار .

بيدور على طريقة وأقرب وأسهل طريقة إنه يشبع الاحتياج دا، لو لقي إنه الأمان في «الروحانيات» فبتتشكل شخصيته في مراهقته بإنه يكون شخص متدين.

لو لقي إنه «الأمان» في الصحة والجسم، فبيتحول لشخص دائماً رياضي.

ولو لقي إنه «الأمان» في المادة بيتحول لبيزنيس مان أو رجل أعمال وشخص بيعرف دائماً يعمل فلوس .

ولو لقي «الأمان» في الشلة والصحاب بيتحول لشخص اجتماعي وبيحب كل الناس .

طب لحد هنا مفيش مشكلة، الشاب اللطيف دا بيقابل بنوثة لطيفة وبيحبها ويخطبها عادي مفيش مشكلة وبيجي قبل الفرح بكام شهر ألقيه مرة واحدة عايز يفشككل والبنيت جيالي بتعيط..

أقوله طيب خيلنا نبدأ. وبعد كلام كثير، يلاقوني بضحك ضحكة خفيفة.

بتضحك ليه يا عويس؟ أقوله «أصل الأسباب اللي أنت قولتها دي كلها تافهة جداً ومش منطقية».

أقولك أنا على السبب بقى بس متتصدمش؟

قول يا عم؟

أنت بدأت تكرهها لأن عقلك الباطن بدأ يحس «بفقدان السيطرة» لما لقي إنه «احتياج الأمان» بدأ يحصله إشباع من حد تاني غير «الحاجة» اللي كنت متعود عليها. وإحساسه بالتهديد إنه بقى في «شيء» خارجي دا خوفه جداً، لدرجة إنه بدأ يخدع نفسه ويكون ويطور «حيلة

دفاعية» - defense mechanism ضد البنوتة الجميلة اللي جنبك دي، بتحبك وكل ما بتبعد عنها بتخاف منك أكثر وتوجعها أكثر وأنت مش عارف أنت بتعمل كدا ليه.

صمت مطبق في المكان لفترة كدا .

طب نعالج دا إزاي يا عويس؟

الموضوع بسيط بس خلوني أتكلم عن شوية «ظواهر» للتفريق بين «بدايات مرحلة التعلق» دي وبين (الاحتياج للحب).

لأن الاتنين شبه بعض جداً، والاتنين المفروض يكون ليهم ردود أفعال مختلفة..

١- التعلق بيحي بعد الارتباط بفترة طويلة نسبياً، لكن (الاحتياج للحب) بيبدأ في أول العلاقة وفي بدايات التعارف .

٢- التعلق بيظهر فيه الشخص إنه «يقدر يتخلى» عن الطرف الآخر، لكن (الاحتياج للحب) هتسمعوا كلمة «أنا مقدرش أعيش من غيرك كتير».

٣- في التعلق دا الراجل في الغالب بيتحول لشخص نكدى وكثير ومش متحمس لأى حاجة في مستقبل العلاقة، في (الاحتياج للحب) بيتنطط من الفرحه في كل حاجة بتعملها .

٤- في بدايات مرحلة التعلق هتلاحظي عليه إنه قبل ميعاد الجواز أو الخطوبة ابتدا «يبعد عنك» مؤقتاً ويشوف نبات تانية، أو حتى يبعد مؤقتاً ويهتم أوي بشغله ويشوف هل يقدر يعيش من غيرك عادى ولا هيتعب نفسياً وفي الآخر هيرجعلك. في الاحتياج للحب هيلزق فيكي حرفياً .

٥- في التعلق.. العقل الباطن بيزود أوي (الإيجو) أوي عند الراجل * كنوع من إيهام نفسه إنه المسيطر على نفسه وإنه مش متأثر في العلاقة. لكن في (الاحتياج للحب) هتتلغى الإيجو تدريجياً عند الراجل.

ببساطة «التعلق» هو مرحلة متقدمة من «الاحتياج للحب» وبعدين الحب. وبعدين التعلق .



طب المفروض أعمل إيه في الموقف دا يا عويس لما أشوف العلامات دي من خطيبي؟

– الصح في مراحل الاحتياج للحب وبدايات تكوين روابط عاطفية إنك تبقى معاه ودايمًا تسانديه، لكن لو لقيتيه في مراحل) تعلقه) بيعمل اللي قولته فوق دا.. يبقى الأصح إنك) تبعدي عنه بطريقة مفاجئة) ويحس بتهديداته ممكن يخسرك مرة واحدة..

والتكتيك دا ميتكررش * وإلا عقله الباطن هيطور) دفاع) عاطفي ناحيتك ويقول لعقله الواعي: «شوفت ما هي كل مرة بتفكسلنا وبتمشي وبتسينا موجهين» «أنا مش لاعب معاك بمشاعري تاني..

هو مرة واحدة كدا ابعدني عنه واقفلي موبايلك واختفي من حياته بدون أي مبررات ولو في بينكوا ميعاد متروحيهوش.

شوفي رد فعله هيكون إيه..

هيتحول للنقيض، وهيجري وراكي وهيحاول يعرف إنتي عملي كدا ليه.. وهنا عايزك ترددي رد واحد ثابت تحافظي عليه، قوليله: «أنا عملت كدا لما حسيتك بتخرجنني من حياتك ومبتتش حاسة بالأمان في وجودك».. بطريقة ما الجملة دي لما جربتها مع ناس كثير بشوف إنه العقل الباطن ابتدا يستجيب بطريقة معاكسة لما كان مخطط له.

باختصار وعلشان أتجنب الكلام السيكولوجي المجعلص) العقل الباطن بيعمل خداع للخداع) بتاعه من أول وجدديد لمجرد إنه كلمة «عدم الأمان» عملتله triggering للاحتياج الرئيسي بتاعه. الموضوع عامل زي ما تكون في رمضان وقبل المغرب في الحر والعطش حد يقول قدامك «أنا هروح أرش الزرع ميه علشان ينتعش» لا إراديًا عقلك هيتخيل الميه الباردة المنعشة اللي نازلة على الزرع دا وهيتمنى إنه هو اللي يكون مكان الزرع دا .

لو لقيتي إنه تقبل عادي اختفاءك وعدم وجودك، يبقى حاجة من اتنين: يا لسه مدخلش في المرحلة دي ولسه قدامه وقت علشان يتعلق بيكي، يا أصلًا هو عامل إشباع للاحتياجات بتاعته بطريقة صحية متنوعة في جوانب كثيرة في حياته فهضايق لكن مش هينفعل عليك لما تختفي وهيتوقع إنك اختفيتي علشان حاجة تخصك وهيحترم دا ويبعد عنك وقتها لحد ما ترجعيله.

ودا بينقلنا لسؤال أكثر تعقيداً تاني: «ليه الرجالة لما بتضمن بنت بتسيبها»؟

الكلمة السحرية هي: (الاحتياج للسيطرة).

الرجالة بتحب السيطرة وبتسعى ليها باستمرار، لأنه السيطرة – controlling مش بس احتياج شخصي للشخص نفسه.

لا دي احتياج «للعقل الباطن» في كل تصرفات حياته* موجود عن المرأة كمان لكن عند الرجل أكثر .

(السيطرة على جسمه) فتلاقيه بروح الجيم كل يوم وبيحافظ على أكله وصحته (السيطرة على شهواته) فتلاقيه متدين وروحانياته عالية وبيحافظ إنه ميعملش شيء غلط.

(السيطرة على الآخرين) فتلاقيه شخصية صدامية أو متسلطة أو قائد يقدر ينجح مشروعه وشغله) السيطرة على أي حاجة، بس المهم إنه الرجل مهما كانت شخصيته ومهما اختلفت قوتها ونضجها لازم يحس بالسيطرة على أي حاجة..

لأن دا احتياج رئيسي للعقل الباطن* حتى لو هيحيب حيوان أليف يربيه علشان يحس بالسيطرة عليه. بس برضو لازم يشبع الاحتياج دا لعقله الباطن. تمام كدا يا رجالة؟ تمام كدا يا معلم.

طب إيه علاقة دا بالرجال لما بييجي يحب؟

أقولك بقى يا سيدتي الكريمة، بس فتحي محك كدا لأنه الكلام اللي هقوله مش منطقي، «أبدا» بالنسبة لعقلك كبت، لكنه* للأسف هو دا قمة المنطقية اللي بتدور في عقل الرجل .

احفظي الجملة اللعينة دي من مدربك العاطفي وحتفهميها بعدين..

الرجالة بتسعى للسيطرة، لكن مش بترتاح في وضعية المسيطر دائماً

كلام متناقض صح؟ فاجتتك مش كدا هههههه!!!

نظرياً هو آه كلام متناقض، يعني إزاي واحد بيسعى إنه يقطف النفاحة من على الشجرة وبعدها يطلع عينه ويتعب علشان يوصلها، ويقع كذا مرة وهوب بعد ما يوصلها يزهب منها ويرميها ويدور على تفاحة تانية؟ حاجة مش منطقية أبداً؟! صح..



لكن هو دا نفس السناريو اللي بيحصل للراجل، لأنه الراجل) غريزته) بتقوده إنه مش بس
بمسك أو ياكل تفاحة» واحدة»، بل هو على أد ما بيقدر يحاول يجمع أكبر عدد من)التفاح)
في جيبه قبل ما ينزل من على الشجرة.

هو دا (الاحتياج) اللي بيحرك كثير من تصرفات الرجل في العلاقة العاطفية أو الارتباط.

بيشوف بنت لطيفة جميلة كيوت وقوية وعسولة وفيها كل الصفات الجميلة، هوب دبل كيك
يبدأ يطارد ويشبع غريزة «المطاردة»، وبعد المطاردة بفترة يبقى عايز يركنها (يسيطر عليها)،
لأن دي نزعته واحتياج رئيسي عنده برضه.

لكن بعد ما بيركنها على الرف وبيضمنها .

فين إشباع غريزة المطاردة؟

هل هيحس بالراحة إنه أخيراً بعد صدامات ومشاحنات قوية قدر يسيطر عليها؟

لا أبداً، لأنه مش بيرتاح في الوضعية دي كتير،» بعد فترة مخه بيحس إنه في حاجة غلط ويبدأ
يزهق»، ويبدأ في cycle جديدة من تاني إنه (يطارد ويسيطر) على أنثى تانية جديدة بس المرة
دي هتكون بنت أصعب وأعلى في ال level بتاعها .

وعلشان كدا تلاقوا راجل معاه زوجة أو مرتبظ بنوته زي القمر وبمجرد ما بيخلصوا مرحلة
الخناقات وهي «المسكينة» تبدأ تعشقه وتحبه وخلص بقت «مضمونة» في حياته يبدأ يطارد
ويسيطر على أنثى تانية بتدخل في حياته يا صدفه يا عن عمد هو اللي بيدخلها ويبدأ يسيطر
عليها *الجديدة من أول وجديد .

وأول ما البنث الأولى تبدأ تكسر قيود السيطرة دي «أو تبدأ تحس بملل في الارتباط» أو حتى
يظهر راجل ما في حياتها يبهده (سيطرته الذكورية) بتلاقي الولد دا ابتدا ينفض لكل الأخريات
في حياته ويسعى إنه يسيطر على الجديدة من أول وجديد لحد ما يطمئن إنها رجعت تاني
(للف) «علشان يقدر يطارد ويسيطر من جديد... وهكذا.

– طب نعمل إيه بقى؟

الحل إننا نبقى الرجل دائماً في وضعية:» المطارد وغير المسيطر في نفس الوقت».



(الحناق الصحي)

يعني إيه نتخانق صح؟ هو في حد بيخطط إزاي يتخانق مع اللي بيحبه؟
السؤال دا إجابته بسيطة جداً .

بصوا كدا كدا هنتخانقوا، طبيعي نتخانق، طبيعي نختلف، طبيعي نشد في شَعر بعض، طبيعي إنه في مراحل نضح العلاقة وكل مرحلة بتقربوا فيها من بعض بيبقى في حاجات عكس بعض وصدامات ومشاحنات دا طبيعي جدا ومعناه إنه: «العلاقة بتنمو» مش متكدرة أو «بتتعفن» في منطقة ثابتة غير متغيرة. وكل العلاقات الرائعة اللي شوفتها في حياتي كان بيحصل فيها حناق دائماً، وكنت بركز على النمط الثابت في خناقاتهم دي.

ولو مش دارس سيكولوجي ومقدرتش تعرف (ما وراء الدوافع اللي بتخلي الشخص اللي قدامك يفعل) يبقى تقبل -فكرة الحناق- بقدر المستطاع لأنها هتوفر لك وقت وطاقة كبيرة وكمان هتخلي علاقتكو أنضج .

طب نحدد نتخانق إزاي يعني؟

أقولك، يعني تحددوا «شروط الحنافة» وإنتوا مع بعض دلوقتي .

زي مثلاً ليستة: (أنا بطلب من الكابلز اللي بيحاول يكتبوها «كدا فيها» شروط الحنافة).

- ١- مش هنغلط في الأب أو الأم.
- ٢- محدش هيبات زعلان من الثاني وهنتصافي قبل النوم دائماً .
- ٣- لازم تتقال كلمة «بحبك» حتى في وسط الحنافة عادي.
- ٤- ممنوع أو مسموح («التحرش») أثناء الحنافة ودي بنصح بيها بشدة دائماً للمتزوجين .
- ٥- لازم يكون في حزن بعد الحنافة دائماً، أو هدية بسيطة نعبر بيها عن حنا لبعض.



وحاجات كثير متنوعة ممكن تحددها مع بعض، حطوا فيها التاتش بتاعكوا، أو إيه اللي متوقعينوا من الخناقة نفسها أو بعدها أو قبلها أو أثناءها ..

المهم، اقعدها مع بعض قعدة لطيفة وحددوا إزاي هتتخايقوا بقى؟

(الشريك الصح)

١٠. إعلامات تعرفك إنك اختارتي إنه «الشريك الصح»؟

١- بيحترم «اختلافك» وبيحترم «أفكارك» وبيرحب دائماً بأي فكرة هتقوليلها لو حتى لو مختلف معاك فيها، ببساطة (هيحترمك) كأنثى وكشخص وكعقل وككيان .

٢- بتتخايقوا صح، من أهم السمات الرائعة لأي اتنين مرتبطين إنهم يعرفوا «بتتخايقوا صح (وذاً لازم تحددوا) «إيه الطريقة اللي هتتخايقوا بيها»، وبتتخايقوا إزاي وكمان هتتصالحوا إزاي. على عكس المتوقع، دا هيساعد علاقتكوا إنها تبقى أقوى.

٣- بيشتغل «علشانكو» مش بيشتغل أو بيتعب علشانك أو علشانه لأن العلاقات غير الصحية بس هي اللي بيكون فيها الرجل شايف نفسه «بيتحرق» علشان شريكة حياته، ودي حاجة غير صحية للعلاقة أصلاً. وكارثية على المدى البعيد. أو على العكس يكون كل همه يشغل على نفسه لنفسه فقط. (علشانكو) إنتوا الاتنين أهم بكتير من كل فرد لوحده.

٤- متفائل بحبكوا، دائماً دوري على الرجل اللي بيفكر إزاي يخليكو مبسوتين، اللي بيمشي في الشارع يشوف) قطعة ديكور) يقولك: «أنا عايز أجيّب واحدة زيها عندنا في الصالون»، الرجل اللي كله حماس وتفائل وسعادة إنكوا تقضوا بقية عمركو مع بعض .

٥- مش بيلغي شخصيتك : وبيحترم اختلافك وتقبله لأسلوب حياتك اللي حبك بيه، واعرفي إنه الرجل اللي بيحبك فعلاً هيبقى عنده «تحفظات» لما ترتبطوا، لكن مش هيسخدم سلطته الذكورية أبداً في إنك تلغي شخصيتك لمجرد إنها مش عاجباه.

٦- هيعاكسك، هيعاكس بزياة بقى: ودي أقوى علامات الإعجاب والرغبة الشديدة من الرجل ليكي في ارتباطكوا، وبالناسبة دي علامة حلوة وجميلة وإيجابية، وأنا كعويس لما بشوفها بفرح جدا .

٧- يبحب عيوبك: ودي درجة عشق بقى أعلى، في المرحلة دي كل اللي هتشوفيه إنتي كأنتي عيوب فيكي، هو هيشوفه ميزة إيجابية تضيفله وتكمله وتكملك كمان. وهيتخايق معاكي على أنها عيوب أصلاً .

٨- بيحتفظ بالأسرار: ودي من أهم علامات أنك اختارتي شريك حياة صح، إنه يكون راجل تقدري تفضفي معاه بكل أسرارك حتى عن أصدقائك المقربين كمان. ويكون راجل إنه ميستخدمش أسرارك ضدك أبداً حتى في عز خناقانكوا .

٩- يتحبوا تعملوا كل حاجة مع بعض، كمان بتعملوا «أي حاجة» مع بعض أحسن وبطريقة أفضل وبتنجزوا كتبير لما بتعملوها مع بعض. ويعرف يضحك كمان لما بتعملوا أي نشاط أو مشوار بتروحوه مع بعض .

١٠- عنده ذكاء مالي: يمكن دي مش «بالرومانسية» اللي بنات كتير بتتوقعها أو بتحب تتكلم فيها، لكن حقيقة وعن خبرة طويلة في مجال الاستشارات الزوجية، جزء كبيرة من نجاح علاقتكوا واستقرارها لما يكون راجل عنده القدرة على (المسئولية المادية) ويقدر يخطط لحياتكوا وطموحكوا مع بعض ولستقبلكوا ولستقبل أولادكوا كمان . للناس المترددة أو المتخوفة أو اللي لسه دي أول تجاربهم العاطفية، وكمال للناس اللي لسه في طريقها «للنضج العاطفي».

١- لو جالك شعور «بالقلق» أو شكيت في صدق مشاعر الطرف الآخر عبر عن دا، واسأله ووضح له أهمية إنكوا تتواصلوا مع بعض أكثر وبالطرق الصحية والمناسبة ليك علشان متسيبش شعور زي دا يكبر جواك ويتحول «لتخوف» أكبر ومع الوقت ممكن يكون عامل هدام لعلاقتكوا .

٢- الشعلة بتطفي، مش بتطفي دائماً، بس بتطفي وترجع تشتعل. عايز أقولك معلومة يمكن هتصدمك، مش دائماً كل مرة هتطير من الفرحة وعينك هيطلع فيها قلوب لما



تشوفها أو تشوفيه، أحياناً هتحسوا إنه علاقتكوا بقت روتينية شوية ومش بتحسوا بنفس درجة الحب والشغف اللي كانت موجودة في بداية الارتباط، فدا طبيعي جداً لأنه مسألة وقت وهتشتعل تاني وتطفي وترجع تشتعل تاني وهكذا. فمش معني إنه (الشعلة اتطفلت) يبقى الحب راح.. دا طبيعي وصحي جداً .

٣- هتخاف تعبر عن اللي بيضايقك، لا طبعاً عبر بأريحية مطلقة، أحياناً* وخصوصاً في بداية العلاقات كل طرف مش بيحب يعبر عن سلوك أو سمة شخصية أو حتى عادة عند الطرف الآخر بتضايقه فيه، تجبناً إنه ميحرجش مشاعره أو يوجعه. في الحقيقة دا غلط جداً، بالعكس خليك ذكي ولطيف في وقت واحد وركز إنك تختار مكان ووقت مناسبين وبهدوء وضح له عن استيائك أو عدم راحتك من الحاجة دي («علشان في المستقبل تتجنب السؤال الأزلي دا») ما أنت من الأول عارف إنني كدا، إشمعني اشتكيت دلوقتي؟! فطبعاً عبر بأريحية مطلقة، وصدقني دا هييني كتير بينكو .

٤- خوفك من عدم توافقك) أسلوب الحياة) اللي نفسك تعيشه في المستقبل، وهو مش دا أسلوب الحياة اللي بيخطط له: أسلوب الحياة، كلمة مجمعة، صح؟ يمكن آه، لكن تعرفوا جزء كبير من حوادث الطلاق اللي بشوفها في شغلي بيكون سببها إنه كل طرف تجنب والتخرج إنه يتكلم عن أسلوب الحياة اللي هيعيشوه بعدين في مستقبلهم مع بعض، مثلاً (هنعيش فين؟ هنلبس إزاي؟ مستوانا المادي زي الاجتماعي هيبقى عامل إزاي؟) إلخ إلخ إلخ.. ودا إهماله خطر وطبعاً دا تساؤل وتخوف هيبجي في دماغك، فإوعي تأجل إنك تتكلم فيه وتوضحه .

٥- خليك شجاع وجريء مع كل خطوة تاخدها للمستقبل إنكوا تخلوا علاقتكوا) تنمو) («العلاقات اللي مش بتنمو بتعفن»)، دي جملة من جملي اللي دايماً بقولها للمرتبتين أو الأزواج اللي يقابلهم، لأنه العقل الباطن مش بيرتاح في حالة- السكون- اللي بيعيشها في الارتباط* ولا أي حاجة تانية في الحياة، لكن في الارتباط مش بيتحمل دا أبداً (تخيل اتين فضلوا يحبوا بعض بس لمدة ١٠ سنين؟) مفيش خطوبة ولا جواز ولا أي حاجة، بس بيحبوا بعض، هل دا طبيعي؟ أو نفسياً هيكون مريح للطرفين؟ طبعاً لا، فلازم يكون فيه نمو بين الطرفين .

٦- القرارات التي تخص مستقبل علاقتكوا، مستنشا لما الطرف الآخر أو أنت تتعود تاخذها لوحدهك وبعدين تشتكي: القرارات المصرية التي تخص مستقبلكوا مهمة جداً إنكوا تاخذوها مع بعض، أحياناً يظهر إنه طرف بياخذ القرارات دي بالنيابة عن الآخر لفترة من الوقت (خصوصاً الرجالة في بداية العلاقات العاطفية أو الارتباط) فطبعاً دا تخوف منطقي ومهم جداً إنك تتناقش فيه معاه وتوضح له إنك كمان مهمم ولازم تشترك معاه في عملية اتخاذ القرارات خصوصاً المصرية دي.

لأنك لو أهملت دا، يا هيكون واحد من حقوقه المكتسبة، يا إما هيحس بإجهاد وتعب إنه مرمي عليه كل المسئولية في اتخاذ القرارات دي.

٧-« هل هندم بعد الجواز بالقرار دا؟ هل دا الطرف اللي عايزه أفضي بقية حياتي في حضنه؟»
التخوف دا الأكثر انتشاراً، وواحد من التخوفات الرئيسية المنتشرة بين المرتبطين سواء في بداية الارتباط أو في مرحلة ما قبل الزواج (ارجعوا لمقال توتر ما قبل الزواج)، ودا هيو ضللكو كتير عن المرحلة دي وتقلبها .

المهم التساؤل أو التخوف دا جزء رئيسي ومهم في إنه بيوضح نضجك العاطفي وإدراكك لتبعات قرار الارتباط أو الجواز، فدا طبيعي جداً يحصل وطبيعي جداً تحس بيه. ومعناه أنك مستعد تدخل في علاقة جدية ومستقلة وناجحة كمان، بس متخليش تخوفك «يشلك» عن نسيان حبك والجميل في علاقتكوا دي.

(الحب من بابه)

« ٥ خطوات عملية للتعافي من علاقة طويلة الأمد »

التعافي من علاقة حب مش سهل، وياخذ وقت وصبر وكمان التزام صارم منك إنك تلتزمي بإنك تعافي ودايماً تبصي للمستقبل على الرغم من صعوبة التجربة، بس دايماً فكري نفسك إنك اختاري نفسك ومستقبلك»، وإنه النقطة دي أكيد موصلتيهاش بسهولة، وإنه فعلاً إنتي عملتي ٢٠٠٪ فوق طاقتك علشان العلاقة تنجح .



بالمناسبة العلاقات الطويلة اللي كانت قوية جدااا بين الطرفين خصوصًا لو بدأوا كأصدقاء وتحولوا لحب وبعدين انتهت الصداقة والحب، بيكون التعافي منها فيه أعراض» انسحاب «زي أعراض انسحاب مدمن المخدرات بالظبط . فطبيعي إنه الموضوع ميكونش سهل، بس الأهم إنك متاخذيش خطوات للخلف أبدًا .

١- اكتبني في ورقة بالتفصيل» ليه أخذتي قرار الانفصال دا؟«، و اكتبني بالتفصيل الأسباب المنطقية» ليه القرار دا كان إجباري، وليه وصلتني للمرحلة اللي مبقاش فيها عودة أو محاولة أخرى إنك تنجحي العلاقة دي؟«، وركزي إنه الأسباب تكون منطقية وعقلية مش بس تكون عاطفية، لإنه القرارات العاطفية متغيرة ومتبدلة بحسب ال mood swings التغيرات المزاجية اللي بتمري بيها، فالإقناع العقلي للعقل الواعي مهم جدا لتثبيت موقفك وحالة تقلب العاطفة والذكريات العاطفية بتقلبات العقل الباطن * .. لإنه العقل الباطن بيشتغل بالمشاعر مش بالمنطق .

٢- عيطي براحتك، عيطي على أد ما تقدرني، اشمي وانفعلي واغضبي وكسري براحتك، نفسي عن كل شعور وذكرى غضب أو حزن جواكي، اختاري صديقة مقربة منك تستحملك الفترة دي، وإوعي تحاولي «تكتبني» مشاعرك أو تتجاهلها لأن دا مع الوقت بيخليكي شكلك كويس وقوية قدام الناس، لكن مع الوقت بيخلك جواكي (غضب داخلي- self burning (ودا واحدة من علاماته» الجز على الأسنان أثناء نومك».. فعبري بكل أريحية، دا صحي جدًا.

٣- اخلقي جدول يومي) ثابت) وصارم على الأقل لمدة شهر بعد الانفصال، وأبوس إيدك نامي بدري، لأنه السهر بيشتجع العقل الباطن على استرجاع ذكريات عاطفية قديمة ومؤلمة، وبالتالي كل ما كان جدولك اليومي الثابت دا روتيني أكثر، دا بيريح العقل الباطن أكثر طالما في روتين ثابت وصحي* بالمناسبة العادات اليومية الروتينية حاجة بتساعد على فعالية الدماغ والتفكير وبتشجع على الإبداع على عكس الشائع عنها، طالما هو روتين صحي، إنتي كمان حطتي الروتين الثابت دا ولو لمدة شهر على الأقل، ومنتسش تنامي بدري..

٤- اتمرني اتمرني اتمرني: ليه التمرين والرياضة مهمين جدا بعد الانفصال؟ باختصار دا



هيساعدك إن ثقتك في نفسك تزيد، تستمتعي بصحة أفضل وبالتالي هرموناتك تنظبط ودا الجزء الفسيولوجي، لكن الجزء السيكولوجي هو إنك هتتلمي» تركزي في اللحظة الحالية»، وبالتدريج هتتلمي تستمتعي بالحاضر وتنسي الماضي وتركزي لمستقبلك. والرياضة بتزود هرمون الدوبامين، وأنتي في أمس الحاجة للدوبامين للفترة دي.

٥- جربي حاجات جديدة، واستمتعي بإنك سينجل من أول وجدديد، عيشي حياتك واستمتعي بتجارب جديدة أو أنشطة كان نفسك فيها، بس بتأجليها أو حتى زيارة لأماكن نفسك تروحيها، أو رحلة لمكان غريب أو خطر عايزه تروحيه بس أجلتي الموضوع بسبب ارتباطك والتزامك دا .

والأهم إنك تستمتعي بإنك بقيتي «سينجل» من جديد.

(جمل ممكن تبوظ علاقتكوا)... أشهر ٥ جمل قابلتها:

جمل بتتقال ممكن تبوظ علاقتكوا وإنتوا مش مدركين لدا :

أحياناً بيكون من الصح إنك تعبر عن كل اللي جوآك، وأحياناً لازم تفكر كويس جداً قبل ما تقول اللي جه في دماغك، الجمل دي خللي بالك منها كويس جداً.. لأنها بمجرد ما بتتقال بتدخلك في مشاكل مستقبلية إنت في غني عنها مع شريك حياتك .

١- ما أنت لو كنت مكاني «الجملة دي من أكثر الجمل اللي دايمًا بتتفهم غلط».. بتتقال غالبًا» لرغبة» توضيح معاناة الآخر وتعبه ومجهوده في أمر ما، لكنها في الغالب بتوصل للطرف الآخر وكأنها) تقليل أو تحقير من شأنه) وعدم إدراكه لأهمية الموضوع اللي بيعمله.

٢- ”روحي أسألي فلان أو فلانة، وهما هيقولوا لك أنا عملت إيه»، وأحياناً بتتقال من البنت للولد * ويمكن دا أخطرهم إنها تتقال من البنت للولد.. لأنها على الرغم أنها بتكون) للاستشهاد (على مجهود الطرف الآخر من طرف تالت، لكنها أحياناً بتتفهم إنها» تحدي» وإدخال وإقحام طرف تالت في العلاقة الشخصية الخاصة بينكوا إنتوا الاتنين .

٣- أنا حاسس إني مبقتش أحبك» وبتساويها في القوة جملة»، «أنا حاسس إنك اتغيرت



«.. الجمليتين دول يعتبروا من أخطر الكلمات اللي ممكن يتقالوا في أي علاقة بين اتنين سواء مرتبطين أو متجوزين، لأنهم لو قاصد ما وراءهم ١٠٠ ٪. ييعتبروا (تهديد غير مباشر) لاستقرار العلاقة.

٤- «أنا الـ ex بتاعي كان بيعمل كذا وكذا» أو «كل اللي حبيتهم قبلك كانوا يفهموا دا لوحدهم»، فكرة المقارنة بين الطرف اللي معاك دلوقتي والسابقين في حياتك العاطفية يعتبر كارثة في حد ذاتها. لأنها مش بس بتخلي الطرف اللي معاك مش مرتاح، كمان بتخليه يحس إنه «دائمًا في وضعية مقارنة» في أي سلوك هيعمله. وطبعًا مفيش حد زي الثاني في أي ارتباط أو حتى مجرد معرفة وصدقة.

٥- «بطلتي أفورة بقي» أو «إنتي دايماً بتعطي كدا» أو «مش كل مرة هتتكدي عليا كدا».. الجمل دي لو اتقالت بعصية مش بس بتخلي موقفك صدامي مع البنات اللي بتحبك، لأنه مع كل رد فعل من دول تأكد إنها بتحبك وكمان بتبقى حريصة إنها توصلك حبها دا، لكن ربما مش عارفة الطريقة أو حتى ربما إنت بتكون وجعتها لدرجة إنها متلاقيش حل غير إنها تعيط معاك، ودي أكبر علامات الحب للبنات إنها مييقاش عندها مشكلة توضح ضعفها ليك وقدامك وتشاركك دا..

فاوعى توجعها بالجمل دي، واحضنها وطبطب عليها بقلبك وطمئنها إنك جنبها وهتفضل دايماً في حضنها على طول .

نصيحة على جنب لكل بنت)

١- «الحب» شعور وجزء من مشاعر كثير لازم تكون موجودة بين المرتبطين علشان يقدرُوا ينجحوا (علاقتهم)، ومنها: (التقبل، احترام الفردية الشخصية، القدرة على التواصل، الرغبة الجسدية)، ومع الوقت هتتعلمي إنه الحب جزء من الارتباط، والارتباط لوحده مش كفاية لنجاح العلاقة ولا الحب لوحده بينجح جواز .

٢- بمناسبة الرغبة، إوعي إوعي ترتبطي براجل مش مقتنع بيكي جسدياً ومش بينام ليل



نهار يحلم بيكي، لأنها هي مسألة وقت وهيخونك ويدور على غيرك وعقله الباطن هيرر له دا .

٣- لو فكرة إنك تكتبي إيه الموصفات اللي عايزاها في شريك حياتك، دي نصيحة ناس كثير هتقابلهم، بس المضحك إنه بلاقي بنات بتكتب سمات شخصية متجمعتش في «شخصية واحدة» أبداً، وأحياناً بيكتبوا سمات متناقضة، اللي بأطلبه منك: لو هتكتبي الورقة دي يبقى إبقى اكتبي إجابة للسؤالين دول في صفحتين جنبها) إيه السمات اللي مينفعش تتنازلي عنها بأي حال من الأحوال؟(، و(إيه العيوب اللي تقدري تتعايشي معاها وتقبليها؟)، زي بنت بتلاقي كل موصفاتنا في راجل بس تكتشف إنه عصبي أو بخيل أو انفعالي أو صدامي.. فاكنتي أي عيب من دول تقدري تتعايشي معا.. وإيه الميزة اللي مينفعش تتنازلي عنها زي: الطموح المالي، الاهتمام بالصحة الجسدية، أو حتى إنه يكون طويل) .

٤- إوعي إوعي ثم إوعي، تهملني اهتمامك بكاريرك مهما حصل، لأني مشوفتش في حياتي زوجات» بتتدل «وبتتوجع وتندم على أكثر قرار غلط أخذته في حياتها، وهو إنها أهملت كاريرها العملي ومستقبلها المادي، فالاعتماد على الرجل كبديل للأمان المادي مش كفاية، متنسش إنه لو حصل اختلاف على شيء ما دائماً هتستخدم «سلطته المادية» عليكي .

٥- الرجالة بعد الزواج بتستخدم) التهديد بالطلاق كوسيلة للضغط)، إوعي تحسسيه إنه دا مصدر تهديد مرعب ليكي أو حاجة تخافي منها وتترعب وتتنازلي عن حقوقك، لأنه الراجل لو لقي إنه التهديد دا بييجب نتيجة وبيخليكي تراجعي عن قراراتك يبقى إنتي كدا هتعيشي طول عمرك في عدم أمان معا.

٦- متلعبيش أدوار مش أدوارك : حلو إنك تكوني مساندة ليه، دا طبعي ودا واجبك كزوجة وشريكة حياة، لكن في بعض الزوجات بتتعمد إنها تلعب أدوار مش أدوارها سواء أنها تتحمل مسؤولياته الشخصية والزوجية أو اللييت، أو كمان لليلة وتهتم بأمورهم وأمور حياتهم.. دا حلو لو إنتي شخصية اعتمادية * الشخصية الاعتمادية هي اللي بتستمد ثقتها بنفسها من تحمل مسؤوليات الآخرين.. لكن لو حسيتي إن



دا بيجهدك وبيتعبك ارفضيه بذوق وبهدوء من البداية، وإلا ممكن تستهلكي بعدين والكل هيعتبر دا حق مكتسب ليه.

٧- لو عملتي حاجة مش من واجباتك، اطلبي مقابل ولو حتى كلمة شكر، متوضحيش إنه الموضوع كان سهل * حتى لو كان سهل، ودا تكملة للنقطة اللي فوق، ودا أكثر تكتيك بيخلي الزوج والعيلة وحتى الأشخاص العادين يعتبروا إنه اللي عملتية ليهم مش حق مكتسب، وكمان مع الوقت يقدرُوا مجهودك معاهم فاطلبي كلمة شكر .

٨- الراجل عمومًا بيحترم البنت القوية أو اللي أهلها أقوىاء مش بيحترم» مش كل الرجالة»، لكن في فئة من الرجالة كدا، وقوتك كشخص هتيجي من قدرتك على الاستقلال المادي وقدرتك على اتخاذ قراراتك بنفسك، فدايمًا خليكي قوية، لو هو كويس ومش كدا، تبقي قوية معاه ويتسانديه، أو تبقي قوية في وشه.

٩- الراجل عنده «مشاعر» (برضو، عنده احتياجات عاطفية وعنده احتياج للإحساس بالأمان * ومعرفش ليه الرجل خصوصًا دايمًا عنده احتياج للأمان، ربما لأنه الأم في سن طفولته كانت بتجنبه إنه يعبر عن مشاعره واحتياجاته العاطفية، لكن في الغالب معظم الرجالة مفتقدين بقوة الإحساس بالأمان والدور الأمومي في حياتهم العاطفية.. لكن لأنه مش متعود يعبر عن دا، ففي الغالب عقله الباطن بيعبر عنه بالغضب عليكى بدون مبررات * خصوصًا بعد الخطوبة بـ ٣ لـ ٤ شهور أو بعد جواز الصالونات بـ ٦ شهور لسنة، بيدأ ينفعل ويغضب بدون سبب في الغالب لو سألتيه بهدوء واتكلمتي عن افتقاده للحنان هيوضح دا أكثر .

١٠- طبيعي إنه علاقات تفشل: المسلسلات والروايات والأفلام سابت موروث كبير قوي ومرتسخ في عقول البنات * خصوصًا المراهقات عن إنه، لازم ولايد وغضب عن عين أي حد إنه البطل والبطة يتجوزوا بعض في الآخر، غصب عن عين المشاهدين كمان، وفي الحقيقة دا مش صحي لأنه حتى لو الحب بينهم قوي جدا، فالحب لو حده مش كفاية وهتعملي دا في حياتك بالطريقة الصعبة أو السهلة، واعر في إنه جزء كبير من نضجك العاطفي بييجي من العلاقات اللي بتفشل .

١١- أول سنة أكثر سنة فيها خناقات : ودي أكثر سنة فيها حوادث انفصال كثيرة

وطلاق، لأنه الطرفين كل واحد جاي بعادات وأفكار وتوقعات ومفاهيم كثير مختلفة، فمع أي صدام بيتخيل إنه الوضع هيبقى أسوأ مع الوقت، إنما في الحقيقي بيبقى أحسن وبيقدروا يتكيفوا مع بعض في الآخر. مرور الوقت، فدايمًا إدوا جواز كوا وقت وحبكوا فرصة، وطبيعي يحصل خناقات واختلافات أول سنة.



(التواصل الصحي)

(التواصل التواصل التواصل)، عارفين لو هناخدوا مني نصيحة واحدة في الكتاب دا، اتعلموا إزاي تتواصلوا صح ودايمًا علاقتكوا هتبقى أحسن)، مش هتتخيلوا كمية العلاقات اللي بتفشل وبتنتهي، مش لأنه طرف خان طرف، أو لأنه طرف مش مسئول، أو لأنه طرف قرر ينفصل لأنه مبقاش حاسس بالحب تاني.. لكن هتتصدمو لو عرفتوا إنه أكثر سبب بشوفه هو: «سوء تفاهم» (بيحصل بين الطرفين بيخليهم ياخدوا قرارات مبنية على سوء الفهم، وبالتالي انفعالات قوية مبنية أصلاً على سوء الفهم الأولاني دا، وهوب قرارات مصيرية أحياناً جزء منها إنه العلاقة تنتهي، وكل دا ليه؟! علشان سوء فهم من الطرفين!!

تخيلوا معايا السيناريو اللي بيحصل دا كل يوم .

زوجة بترجع من شغلها مجهدة، وكمان زوج بيرجع مجهد وتعبان وجعان، بمجرد ما شافوا بعض دردشوا شوية على السريع، وبعدين في وسط الكلام اتكلم الزوج عن بنت في الشغل زي القمر وشكلها يهبل وهو بيتكلم بحماسة كدا وعينيه بتلمع* ما هو غبي بقى، لقي زوجته بصلّاه بزفرة وغضب، وهوب انفجرت فيه لما سألتها: «طب مالك أنا عملتلك إيه؟»، ولأنها مش عايزه تظهر إنها مدلوقة أو حاسة بالتهديد من مجرد بنت في شغله فجابتله أسباب قديمة من خناقات حصلت بينهم أو عبّرت عن مشاعر ضيقها بطريقة قوية ومبالغ فيها فجرحت بكلامها أو حسسته بالنقص والعجز .

الزوج على الرغم إنه اتضايق لكن قرر يصالحها فجأة، يقرب منها ييوسها زفته بعيد عنها ودخلت أوضتها، وبعد شوية ساعة أو اتنين و ٣ أو في آخر اليوم، الزوجة هديت وانفعالاتها



قلت وأدرت أنها جرحته بالكلام وأنها بالغت في رد فعلها دا، والزوج برضه بقى خايف يروح يصالحها تاني لترفضه لأنه مش عارف إنها استقرت مزاجيا خلاص ومبقتش متضايقة منه، فالنتين يفضلوا ساكتين وتعدي الدنيا ويفضل كل طرف ساكت وقافل على نفسه وتعدي الدنيا ويعيشوا بقية حياتهم عادي.

أكيد إنت حصلتك مواقف زي دا مسبقًا؟ أو شوفته مع حد تعرفه أو صاحبك الأنتيم حكك لك المشكلة شبه دي مع جوزها؟ صح؟

المواقف البسيطة دي بتعبر عن إيه؟) سوء تواصل «بين الطرفين، ومش بس خطورتها بتنتهي عن قمصة وزعل، لكن بتراكمها سنة ورا سنة بيأثر على استقرار العلاقة والحب والرابط الحميمي الدافئ بينكوا. ومرة ورا مرة هوب العلاقة بتنتهي ويحصل فيها كوارث خطيرة لمجرد إنه مواقف كل طرف كسّل أو أهمل إنه يتواصل ويعبر للطرف الآخر إنه كان رد فعله دا بيعبر عن حبه، عصبية الزوجة بتعبر عن إيه؟ غيرة على جوزها، والغيرة بتعبر عن إيه؟ عن حب.. كذلك إحساس الرجل بالندم والأسف بيعبر عن إيه؟ بيعبر عن اهتمام وحب .

ودي من أهم مهارات نجاح العلاقات العاطفية والزوجية.. إنك تقدر تجاوب على السؤال دا في كل موقف حاسس فيه إنك متضايق أو هتأخذ قرارات انفعالية : (هو اللي عمله دا يعبر عن إيه؟ «أو زي ما بيسموه في السيكلوجي: «إيه الدافع - motive ورا سلوكه؟ لأنه كلنا كبشر أي سلوك بنعمله بيبقى ليه دافع مها كان بسيط أو مش منطقي.

عارفين الحبل اللي بيثيلوا بيه الأوزان الكبيرة، أو الحبل اللي بيستخدموه في الأوناش علشان يرفعوا بيه أوزان وحاجات ثقيلة للأدوار العليا، * وأنا دائماً بأستخدم التشبيه دا للتوضيح، هتلاقوا نوعين من الأحبال حبل معدني رفيع وشكله ضعيف لكنه بيثيل أضعاف أضعاف الحبل القماشى السميكة اللي شكله وضخامته بتبهرك في الأول .

ليه الحبل المعدني هو المفضل؟ لأنه ببساطة صعب تتقطع الأجزاء الأصغر منه، الأحبال الصغيرة اللي بتلف حوالين بعض ومكوناه صعب جدا جدا تتقطع وبالتالي تماسك وصلابة الحبل ككل أقوى من الأحبال الصغيرة الكثيرة في الحبل القطني لأنها باختصار: « كثيرة في العدد، لكن سهلة القطع «الحبل ككل هو علاقتكوا، والأحبال الصغيرة هي قدراتكوا على» التواصل «وإيضاح مشاعر كوا لبعض ... بالكلام أو بالغزل أو بالنظرات أو بالهدايا أو بالأحضان أو



بالخروج أو بالقبلات أو بأنكوا تنفجوا على مسلسل بتحبوه كل يوم مع بعض . لأنه طرق التوصل (اللفظي، وغير اللفظي) كثيرة ومتنوعة وبتختلف من ثنائي لثنائي في نوعها وأهميتها . طب ونعرفها إزاي ياعويس ؟ بأنا بنتمرن عليها دلوقتي ..

اسأل شريكك في الحياة أو زوجك أو الطرف الآخر السؤال الواضح الصريح المختصر دا .. «إيه اللي إنت حاسه دلوقتي؟» .. اتكلم معاه عن مشاعره وخليه يفضفض عنها ويتكلم كثير . «اللي عملته دا كان دافعك فيه إيه؟» .. اسأل الطرف الآخر السؤال دا وافهم منه ليه سلوكه دا كان كدا بالتحديد في الموقف دا .

ربما دي علامة «حب» أو بدافع الخوف إنه يخسرك، أو ربما بدافع «الغضب» والانفعال، يبقى افهم ليه حصل «غضب وانفعال وإيه سببه؟»، وهكذا تدريجيا هتوصل بدرجات أعمق وأعمق لمشاعر الشخص اللي قدامك، وبالتالي هتفهمه أكثر وتواصلكوا هيكون أحسن وهتنجح علاقتكوا وتزدهر باستمرار .

– «همسة» واحدة من أقوى اختبارات العلاقة العاطفية والحب هي قدرة ورغبة «الطرف الآخر» (في إنه يدخل معاك صراعاتك الشخصية والنفسية اللي جواك ..

– حبه وفضوله في استكشاف «الكربة» دي باستمرار حتى لو مجرد وجوده بيديك إحساس «ولو مؤقت» (بالهدوء في وسط) كركبتك (يبقى دا شخص قادر بعدين إنه «يحتويك») ويسكت الدوشة اللي في «دماغك» ...

(High profile – والـ low profile)

– للرجال فرق كويس بين «high profile» في البنات، والبنات الـ low profile

ليه لازم تفهم النقطة دي كراجل؟ لأنه مؤخرًا بدأت أقابل رجالة كتيرة بتشتكيلي * على عكس المعتاد، من أنها هي اللي اتنفخت في العلاقة سواء العاطفية أو للزوجية حتى .

وفي آخر ٤ سنين من حياتي قابلت وسمعت وكلمت واتفاعلت ودربت كابلز بما فيه الكفاية إني أقدر أنصحك كراجل أو كشاب لطيف مُقبل على الارتباط بسعة صدر وكل شغف الدنيا، تجنّبًا لخازوق محترم ممكن يآثر عليك مدى حياتك .



نبدأ ببعني إيه « low profile بنت »

بساطة دي نموذج البنت اللي بدأت تنتشر مؤخرًا، معندهاش طموحات أكثر من إنها تتجوز واحد تحقق من خلاله طموحاتها، وأنا قابلت منهم كثير ومنهم أصدقاء ليا كمان .

البنت دي بتشوف نفسها مجرد (سلعة) في الغالب بتنكر دا وبتحاول تتقمص شخصية البنت الـ strong independent women لكن في الحقيقة هي شخصية أنفه من كدا بكثير .
ولذلك كل اهتمامها مُنصب على « أنوثتها » الظاهرية فقط..

* ويمكن دا القفا المحترم اللي بياخده الرجالة السطحية اللي مش بتتأثر غير بالأنوثة الظاهرية فقط .

البنت دي من أيام مراهقتها بتتغذى على قناعات إنها مينفعلش تعيش من غير راجل، ولأن الراجل دا هو بوابتها للحياة السطحية والعريبات والخروجات الواو اللي نفسها تعيشها فتبدأ تهتم (بالطعم) نفسه...

اللي هو طبعًا جسمها والفورمة وشعرها وسيلفي الجيم والفوتوسيشنز الرهيبة وكل تريكات الميك آب وأحدث الفساتين ومتابعة كل الفاشنوز ديزاينز في العالم وكل حلمها تبقى (موديل) لأنها متخيلة إنه الموديل مجرد جسم..

النوعية دي من البنات لما بتدخل في مرحلة عشريناتها بتكون أكثر خبرة في قراءة الرجالة وأكثر حنكة في إسالة (لعابهم)، وفكرة راجل تكافح معاه أو تبدأ معاه حياته، أو أنها هي كمان تشق طريقها الخاص بدعمه ووجوده وكل طرف يدي الثاني من قلبه.. تقريريًا شبه مستحيلة...

لأنها كشخصية شايفه إنه المجهود اللي بذلته في جسمها وشعرها والصور اللي بتصورها كفيلة أو ووي بزيادة إنها تستحق تعيش حياة مُنعمة أبديا في أحضان راجل غني يقدر تعبها على نفسها.

البنات دي هي هي اللي لما بتتجوز بتشوف إنه الجواز عبارة عن مقايضة متعة جسدية = المال من الزوج، يعني أنا بخليك تستمتع جسديا بيا كزوجة مقابل إنك بتصرف عليا كويس .

هنروح بقى على النقيض البنات الـ high profile دي بنات بتتأخر غالبًا في فهم أد إيه الرجالة كائنات سطحية أو شهوانية، والسبب إنها بتبقى معظم مراهقتها في نظرتها للعالم



ولنفسها وكمان قدرتها على إنها تحط لنفسها أهداف تخلي لحياتها معنى وقيمة وشغف
يستحق تتعب علشانه....

ولذلك البنات دي بتكون أكثر حد فاهم يعني إيه «أنوثة» داخلية كويس جدااا، وعلى عكس
الظاهر كل ما بتكبر بتحلو وبتنضج وبتفهم عقلية الرجل أكثر، وكمان دي أكثر حد عنده ثقة
في نفسه عالية، وكمان فاهم ومقدر أدوار شريك الحياة اللي بتبدأ معاه حياته.

بتبقى في ثلاثينياتها وخصوصاً من سن ال ٢٦ و ٢٧ فما فوق بقى بتتحول من أنثى لسوبر
أنثى سواء في كل جوانب حياتها أو أنوثتها الخارجية أو الجسدية أو أنوثتها الداخلية وشغلها
وإنجازاتها اللي بتدي لحياتها طعم كل يوم.

– «همسة» إدراكك إنه «العلاقات العاطفية» حاجة لازم تمشي بين طرفين (، وفي اتجاهين ...
– هيختصر نص «نضجك العاطفي» ووعيك باستقرار العلاقات العاطفية والزوجية ونجاحها .

* افكر الجملة دي كويس أوي» العلاقة الصحية هي العلاقة اللي بيحصل فيها إشباع
للاحتياجات النفسية والعاطفية والجسدية بين الطرفين أو الزوجين» ..

– «واحدة من تعقيدات العلاقات العاطفية أنها حاجة لازم تمشي في (اتجاهين) بين الطرفين»،
ممكن مش في نفس اللينك لكن بطريقة أخرى لازم الطرف الآخر يحصله إشباع لاحتياج ما
مفتقده.

ومحاولة إنجاح العلاقة بإثبات إنه الطرف دا متمسك وبيعافر وبيعمل اللي عليه وبعدين نسמע
الجملة دي (طب وأنا كان في إيدي إيه أعمله تاني ومعلمتوش؟) .. للأسف الإجابة على السؤال
دا معقدة ومؤلمة، ربما بنفس تعقيد وألم الحياة نفسها، وأعتقد إنه دي واحدة من أعقد المعادلات
الحياتية اللي هتتعلمها في حياتك بطريقة أو أخرى..» ممكن تعمل كل حاجة صح في الدنيا
وبرضو متوصلش للي إنت عايزه..» الناس بتسميها) نصيب) وناس بتسميها) قدر)، وأنا
بشوفها واحدة من تعقيدات الحياة نفسها اللي ربنا خلقها علشان يعلمنا إنه (التناسب) والراحة
والتفكير مهم لفلسفة الكون حوالينا .

محاولة إنجاح علاقة بتمسك وحرص شديد من طرف واحد، بالظبط عاملة زي (مركب) بس
واحد بيجدف من ناحية واحدة، مهما جدف بسرعة بطريقة ما هيلف في دايرة واسعة وكبيرة



هتوديه لنفس مكان البداية. بيلف في دايرة واسعة بدون أي تقدم في أي اتجاه آخر .
يمكن مؤلم، ويمكن قاسي، ويمكن أحياناً عند بعض الناس مش عدل، لكنه دا الناتج في الآخر، إنه
هتوصل لنفس مكان البداية، وإنه بطريقة ما مجهوده كله هيروح (هدر) وهيضع .
نصيحة كمان، قبل أي محاولة لإنجاح علاقة سواء عاطفية أو زوجية لازم لاالأزم تتأكد إنه
الطرف الآخر حريص بنفس درجة الحرص بتاعتك في إنجاح العلاقة دي.
لأنه ومن هنا هتكون البداية لقياس مستوى (التزام) وإحساسه بمسئولية إنجاح العلاقة والجواز
دي معاك .

(فلسفة التضحيات)

(التضحيات الاستثنائية، للعلاقات الاستثنائية، للطرف الاستثنائي)
بصي يا بنت الناس، قبل ما تضحّي تضحية «استثنائية» للطرف الثاني في حياتك، ومهما كان
حبك ليه، ومهما كنتوا لبعض قلبين في روح واحدة والجودا، فكري بعقلك ٥ دقائق بس في
استثنائية التضحية اللي هتقدميها دي.

ليه بقي؟

لأنه مشوفتش في حياتي، ناس «بتتوجع»، أو بتتدل أو بتضيع عمرها في علاقات استهلكتها
زي اللي بيقدموا تضحيات «استثنائية» لأطراف غير مستحقين للتضحية دي»..

ولأنه أكبر * الآلام والمقابل اللي هتاخذها في حياتك العاطفية هي بتكون إنك (ضحيتي
تضحيات استثنائية في علاقة غير استثنائية لطرف غير استثنائي) وكمان مقدملكيش هو كمان
تضحيات استثنائية في المقابل .

يعني لو بتحبوا بعض سنين طويلة، وفعلاً ضحي علشانك وعلشان علاقتكوا وحبكوا ينجح
تضحيات استثنائية وقوية وقتها طبيعي وصحي جداً إنك تضحّي تضحية استثنائية وتقفي معاه
بكل قلبك وبكيانك لحد آخر نفس فيكي وتمسكي بيه. لأن دي تضحية استثنائية لعلاقة
استثنائية قوية بينكوا لطرف استثنائي قدملك تضحيات استثنائية. هنا هتبقي علاقة صحية





الفرق بين الزوج وشريك الحياة)

وزي الفل .

في ناس بتستغرب أوي لما تشوفني بقول لطرف ما) أعلم كذا وكذا لأن دا طبيعي وهتلاقي الطرف الثاني عمل كذا كذا متخافش وهتبقى علاقتكوا رائعة، أنا واثق من دا(، وبعديها بربع ساعة تشوفني بسمع حد ممكن مشكلة متشابهة أحذره إنه يعمل نفس «الكذا والكذا» اللي فوق دول . فيستغرب أوي إني بقول النصيحة وعكسها .

وهنا بوضحه إنه المعادلة علشان تبقى العلاقة صحية (الحاجة الصح في الوقت الصح للشخص الصح).

وبفهمها إنه مبيوجعش الأنثى أو حتى الرجل أكثر من إنه يعمل) الحاجة الغلط للشخص الغلط في الوقت الغلط). ودا اللي بيخلي أشخاص كثير) يكفروا بالحب» وسنينه ويفتكروا إنه «المشكلة في الارتباط أو في نفسهم حتى» لكن هما مع الوقت بيدركوا إنه كان للشخص الغلط مش أكثر ..

نصيحة: (إنتي مش مطلوب منك تكوني «شهيدة» وبطلة بتضحكي كل يوم علشان الارتباط ينجح، لكن مطلوب «منكوا» تتمسكوا وتضحوا علشان بعض).

(متدوريش على «زوج» دوري على «شريك حياة»)

هل الحب وحده يكفي لنجاح «الزواج»؟

طبعًا لا، لأن الحب هنا لازم تصاحبه مسئولية زوجية للطرفين وعوامل تانية زي الاحترام المتبادل والمودة والتقبل والمساحة الشخصية لكل طرف .

لكن هل «الزواج» بيتطلب (حب) لنجاحه؟



الزوج بصلي وقالي بصوت واطي: أصل إحنا متخانقين قبل ما نيجي فعلشان كدا هي بتخبط فيا، لكن في المجمال هي مش بتكون كدا وبتكون هادية وطيبة.

أنا: بتحبيها؟

الزوج: إممممممممم، معرفش والله، بس زمان كنت بعشقها مش عارف دلوقتي هل دا تعود، لكن دائماً بتو حشني ويحب أكون معاها حتى لو متخانقين مش بحب أبعد عنها.

الزوجة جت من مكان بعيد!! إنتو بتتوشوشو في إيه!!

أنا: أبداً، دا كان لسه بيتغزل فيكي ويقول إنه بيعشقتك وبيحبك.

هي: بيعشقتني! وقامت بصاله (يا أخي لما أنت بتعرف تقول كلام حلو، مبسمعوش ليه منك لما بنكون لو حدنا، واللا أنت بس شاطر في الخناق لو حدنا وقدم الناس بتقول في ضهري كلام حلو).

أنا: تعرفي أنا شايف إنه فعلاً بيحبك وشايف إنك متحامله عليه كثير جداً.

هي: أبداً واللهي، أنا بحبه وهو عارف كدا كويس، لكن أجارك الله لما بيتخانق وصوته بييجيب آخر الشارع.

قلتلها- اقعدى- والاتنين وجهت لهم الكلام وقلت لهم: بصوا إنتوا الاتنين بتعشقوا بعض، لكنكم وصلتوا لمستوى في العلاقة مش كل الناس بتوصله وهو مستوى عالي جداً من الراحة والرغبة والتمسك بالطرف الآخر، وضمان إنه موجود وكمان بيعشق عيوبه ومميزاته وهي دي مرحلة «شريك الحياة»، فحرارة الحب الأولى انطفت لكن دي سهل تجددوها. وعلشان إنتوا مش بتجددوها بطريقة «صحية» فعقلكوا الباطن بيجددها بالخناق علشان كل طرف يتمسك بالطرف الثاني أكثر ويحس إنه لسه مرغوب، فلازم كل طرف يوضح تمسكه ورغبته وتجربوا مع بعض حاجات مجنونة كل فترة).

وبعدين قولت للزوجة: بصي أنا أقدر أعرف الخاين والنسوانجي في ثواني، لكن جوزك من نوعية الرجال اللي مستحييييل يخونك لأنك بطريقة ما مليتي عقله وقلبه ورخامتك عليه مع إنها زيادة لكن بتخليه يحبك أكثر وشاغل دائماً تفكيره بيكي.



وعن الابتسامة الواسعة اللي اترسنت على وشها قبل ما نروح ناكل .

(الآخر عنده قدرة على استشعار «خوفك»)

(ربعك وخوفك الشديد على «نجاح» العلاقة بالشخص الفلاني أحياناً دا بيكون طريق مختصر لفشل العلاقة نفسها).

أحياناً وبنشوف دا كثير، من كتر ما في طرف «مرعوب» من فشل العلاقة نفسها دا بيؤدي إنه العلاقة نفسها تفشل بسبب شوية حاجات هتكلم عليها سيكولوجيا دلوقتي، وبالمناسبة مش دائماً بتكون العلاقة عاطفية أو زوجية، أحياناً بتكون كمان علاقة صداقة عادية: (لكن مش دا اللي هتكلم عليه المرة دي)..

السبب الأول: الخوف الشديد من خسارة شخص ما في حياتك، خصوصاً لو كان مرتبطة بيه ارتباط عاطفي بيعمل كارثة في عقل المستقبل الآخر أو الشخص الثاني، لأنه بيتخيل - لا وعياً - إنه الطرف دا عنده (قلة ثقة في نفسه) وبيبدأ مع كل موقف بيعمله الطرف الأول وحرصه الشديد إنه ينجح العلاقة نفسها يتخيل - لا وعياً برده - إنه بيستمد ثقته بنفسه من الطرف الثاني دا .

ودي على عكس المتوقع حاجة منفرة جداً ومرعبة للراجل إنه يتخيل إنه هو مصدر ثقة البننت في نفسها أو الزوجة حتى نفسها.. ليه بقى؟ علشان السبب الثاني اللي هتكلم عنه دلوقتي:

- غريزة المطاردة: الرجالة اتولدوا مطاردين، دي غريزتنا وطبيعتنا وفطرتنا اللي ربنا فطرتنا عليها، أي نعم الحضارات اتطورت والمجتمع اتطور وبقت أكثر تراتبية وتعقيداً، وكمان بقت عندنا لغة نقدر نعبر بيها عن رغباتنا وخلافه، لكن برضه ما زالت فينا الغريزة البقائية الحيوانية الأساسية دي اللي بتريحنا وكمان بتخلي الراجل «مبسوط» ومستمتع بالعلاقة وحريص إنها تنجح لما بيستمع بغريزة المطاردة عنده.

فخوف البننت الشديد إنها تخسره بيخليها أحياناً تعمل كل اللي هو عايزه (وخمنوا بقى يا بنات إنه البننت لو عملت أكثر من ٧٠٪ من اللي الراجل عايزه؟)، بيزهق منها ويبدأ يطارد غيرها لما يحس إنه ركنها على الرف وإنها مضمونة.

وعند الرجل المكتمل الرجولة والناضج أكيد هيرفض يدخل علاقة زي دي، لأنه بيكون عارف

إنها مش هتكون ممتعة ليه، ولا كمان بينبسط ولا بيستمع بمطارده ليه.

الرجالة بت يعني بتنجذب gravitate البنت القوية الواثقة من نفسها واللي بيكون عارف إنها هتخليه يطاردها.

دي متعة رئيسية عند الرجل الطبيعي، وكمان بتخليه يقدر يطور مستوى رجولته على نفس قدر وأعلى من مستوى «الأنوثة» عند البنت اللي واثقة من نفسها والصعبة، لكن مش مستحيلة.

وافتكري أيتها البنوة اللطيفة وأيتها الزوجة الجميلة، «Hk الزوج لو فعلاً حريص إنه يخليكي مسبوطة أكيد هيلاقى طريقة إنه دائماً يخليكي مسبوطة»، بس طبعاً مش هتقي مهيرة طول الوقت وطول السنين من السعادة* لأن دا مش منطقي ولا صحي ولا بيحصل، لأنه في مستويات كثيرة من الانبساط بتبقى موجودة في الارتباط نفسه بينكوا .

واعرفي كمان إنه مش صحي* وأنا عارف إنه الكلام دا هيضايق رجالة كثير مني . إنك تسمعي كلامه على طول . بالعكس دا بيخليه يا يمل منك ويسيبك (دا لو محترم)، يا إما هبخونك ويركنك على الرف لما يضمنك .

لكن كوني ذكية في إنك تخلقي التوازن بين إنك تكوني وفيه ومحبة ليه . لكن ليكي شخصيتك ورأيك وحنافك وبتفرضي عليه اللي إنتي عايزاه وبتحبيه .

اديله الفرصة دائماً إنه يحطك في أعلى «قائمة» اهتماماته

بصي، الرجالة بتحط الحاجات الأكثر تعقيداً والصعبة دائماً في قائمة اهتماماتها، وكمان المرأة كدا برضه . لكن علشان يحطك في قائمة اهتمامه لازم يحس إنه مش مرتاح إنك مش حاطاه في أعلى قائمة أصدفائك .

الموضوع معقد شوية في دماغ الرجالة، لكن هو وضحه أكثر بمثال بسيط، بس احفظوا القاعدة دي برضو: (أعلى قائمة اهتماماته في الأنثى هو إنه يحس إنه محتاج إنها هي كمان تبادل نفس المكانة).

اتخيلوا بنوة لطيفة بتعشق راجل لطيف، وهو كمان بيعشقها وبيعشقوا بعض ..

لكن مع الوقت هي اللي بتعمل كل حاجة، هي اللي بتجيب الهدايا . هي اللي بتوضح الحب



والاهتمام والغزل فيه، هي اللي بتديله كل اللي عاوزه بدون ما يطلب، هو هنا (لا شعورًا) حسّ إنها حطته في أعلى قائمة اهتماماتها فمخه لا إرادياً يقوله: (طب وإيه الممتع إننا نحطها في أعلى قائمة اهتماماتنا إحنا كمان؟) .

لكن لو هي كانت بتوضح له إنها بتحبه آه لكن مش كل طلباته مجابه، أو حتى مش كل اللي عايزاه توضحه وهكذا. هتديله الفرصة إنه هو كمان يحطها في أعلى قائمة اهتماماته، فبالتالي يطاردها ويتشغل عقله إنه إزاي يخليها هي كمان تحطه في أعلى قائمة اهتماماتها:

(الحب في زمن السوشيال ميديا)

(هل إظهار «المشاعر والحب والكلام الحلو» لشريك الحياة في السوشيال ميديا شيء جيد بالنسبة لعلاقتنا؟ ولا نخليها كتفاصيل خاصة ما بينا؟ وإيه رأيك في الناس المشاهير اللي بيتكلموا عن حببيتهم وجمالها والجو دا على السوشيال ميديا ليل نهار؟ هل دا حب حقيقي ولا بيزيفوا دا؟ في الحقيقة: الإجابة المختصرة مش هتكون كفاية، وقبل ما أشرح حابب أوضح يعني إيه (إظهار المشاعر) واختصارها كل طرفين ليهم طريقة ما مختلفة في إظهار مشاعرهم العاطفية.

ممكن راجل مش بيعرف يقول كلام حلو أو يكتبه على السوشيال ميديا، فيجب لخببته هدية بتحبها أو يخلصها مشكلة كانت فيها، وهكذا البنت ممكن تقف جنبه وتسنده أو تعلمه مهارة يحتاجها ويكونوا couple لطيف وبيعشق بعضه برضه بدون ما يكتبوا كلمة واحدة على السوشيال ميديا .

فهل من المنطقي نحكم عليهم إنهم مش بيعجبوا بعض؟

وبكدا يبقى فهمنا إنه لكل طرف ولكل اتنين طريقتهم الخاصة في إظهار مشاعرهم، وأحيانًا يكون الخناق وسيلة لإظهار الحب على فكرة.

العقل الباطن لما بيتهاجم بيدافع عن نفسه بدون ما يستأذن العقل الواعي .

طيب، إظهار المشاعر بالكلام من الطرفين على السوشيال ميديا- نظريًا -شيء لطيف وجميل وكبوت وحلو، لكن فعليًا العقل الباطن هنا بيكون- حيلة دفاعية-(defense mechanism) مخهم بيستخدمها علشان يقنع نفسه بالطرف الآخر فيعلن الالتزام المطلق ليها قدام الناس.

حاجة كدازي ما تروحي تشتري فستان» غالي أوي»، فأصحابك يوضحوا لك إنه سعره مبالغ فيه، فتلاقي نفسك ابتدئي تدافعي عن الفستان وتطلعي فيه مميزات مكنتيش حتى شايها وانتي بتشتريه..

أو لما تيجي تاكل» وجبة صحية طعمها مش حلو» فتلاقي مخك علشان يكملها جابلك الفوائد بتاعتها وأد إيه هتكون صحتك حلوة لو كملت الأكلة الصحية دي.

أو تروح تشتري عربية ويطلع فيها) عيب ما)، فتلاقي مخك بعد ما تشتريها بيركز على «مميزاتها» وأد إيه تكييفها تلاجة وموتورها ناعم وصوتها واطي وإلخ إلخ.. كميزات علشان تقنع اللي حواليك أو لنفسك أولاً إنك أحسنت الاختيار .

فإظهار الحب المبالغ فيه للطرف الآخر على السوشيال ميديا مش بيظهر حقيقة (أد إيه إنت بتحبها وأد إيه علاقتكوا جميلة واستثنائية وورد ودباديب والجو دا)، في الغالب بيكون في مشكلة، في اقتناع طرف ما في العلاقة دي وإنها مش -آمنة كفاية secure enough إنها تترابط كويس، فيبجأ عقلك الباطن للحيلة اللطيفة دي ويعلم «التزامه» بالطرف الآخر بأنه يوضح مشاعره قدام الناس .

وتدريجياً العقل الباطن هيظهر المشاعر دي (للناس) نفسهم مش لشريكه العاطفي.

(العلاقات الخاصة علاقات ناجحة)، همسة..

دائماً، فالتعبير البسيط أو التوضيح للآخرين حبك ومشاعرك اللي بتكنها للطرف الآخر شيء رائع، لكن بدون مبالغة وبدون الدخول في تفاصيل كثيرة وبدون حتى ما تطلب» رأي الآخرين دول في علاقتكوا»، لكن المبالغة أو البوستات اليومية أو الصور بالأحضان وجو (هيسيح بقى) والورد والدباديب ونزلهم في ألبومات علشان الناس» علامة خطر» كبيرة على (علاقتكوا) دي.

حافظوا على خصوصية علاقتكوا مهما كانت» غريبة» أو مجنونة أو مش منطقية للناس اللي حواليكوا، حافظوا عليها علشان تموها لأنها زيها زي أي حاجة «جميلة» في الحياة ومميزة دائماً هتواجهوا) النقد) وهتجهدوا نفسكوا تردوا عليه، ، فالوقت والطاقة والمجهود اللي



هتردوا بيه على النقد دا استهلكوه في تعبيركوا عن حبكوا لبعض وتقوية علاقتكوا العاطفية دي، بس مش دائماً قدام الناس .

– «همسة»: (في الحب) «الفرص الثانية» هي اختبار حقيقي لقوة (العلاقة)...

– حاول تتجنبها وانجح في الفرصة الأولى أفضل، لأنه في «الفرصة الثالثة» في الغالب الحب يببدأ ينهار وبتبقى تحصيل حاصل ...

(للأسف الحب وحده لا يكفي.. للأسف يعني).

من أكثر الحاجات اللي بتأفجج بيها في البشر في مراحل «نضجهم» إنه الحب لوحده لا يكفي لنجاح العلاقة العاطفية والزوجية..

في ناس متخيلة إنه «نجاح» العلاقات مبني فقط على جملة (بس هما بيعجبوا بعض)؟

ويبتصدموا من مفاجئة إنه أحياناً «يعجبوا بعض وهيفضلوا يحبوا بعض، لكن العلاقة هتفشل برضو»..

لأنه في ناس كثير اتربت على «غسيل مخ ممنهج ومنتظم» من الميديا والإعلام والأفلام، وحتى الشعراء والروايات إنه الحب لوحده كافي) وإنه طالما «المحبوب» يموت فدا وشهد حبيبته، يبقى العلاقة لازم تنجح في الآخر (غصب عن عين المخرج والمنتج والممثلين والمشاهدين جميعاً).

الأفلام والمسلسلات غير المنطقية دي أحياناً، وخصوصاً الغزو التركي والديجلة السوري) اللي دخلوا في حياتنا و اتربت قدامهم «مراهقات» و«مراهقين» هما اللي وصلوا علاقات كثيرة بطريقة غير مباشرة إنها تفسل ومنتجش ..

وصلهم إنه الزوج لازم يكون (فورمة الساحل، ووسيم، وغني وإلخ إلخ إلخ)، ولازم يعملها مفاجآت تحت المطر بالبدلة البراند ويحارب «الأعداء»، ويروح يخطفها علشان هو بيعبها، وبالتالي يستحق حبها..

* بالمناسبة.. الرجالة مبتعرفش تجري تحت المطر ببدلة أصلاً، وخصوصاً لو براند هيروح بليس حاجة تانية وبيقى يجري براحته.

وهو اللي وصل الولاد إنه لازم البننت تكون مولودة ((ميك آب)) لا يختفي أبداً.. و٢٤ ساعة بتقرص باليه، وكمان بتعرف تعمل كل الأكلات الجميلة.. وتقدر تتحول في نفس اليوم مرة blonde - شقراء، ومرة شَعرها أحمر redhead سبحان الله متعرفش إزاي!! وإنها مهما حملت وخلفت، ومهما تعبت مينفعش يزداد وزنها وإلا مش هتبقى على نفس درجة جمال الأخریات اللي في حياته.

وهي اللي وصلت للأهل برضه إنه الزوج لازم يكون) مدير الشركة) اللي باباه سابهالوا ومات، هو وعمته بيديروها * مش عارف ليه دائماً في ((عمة شريرة)) مسيطرة على شركة الوالد في المسلسلات التركي، وبالتالي العربية الـ BMW دي أقل عربية عنده، وإنه كل ما مراته بتزهق لازم بغير الفيلا أو القصر اللي ساكنين فيه..

وكأن تركيا مفيهاش غير شركات كل أصحابها ماتوا وسابوا)) أولادهم)) وعماتهم يديروها من بعدهم..

هو اللي خلاني أنا شخصياً بكره المسلسلات)) التركي)) دي.

ودا اللي خلني في ناس كرهت فيلم) لالاند) (لأنه ببساطة فيلم بيحكى عن)) تضارب)) بين قصة واقعية والافتراض)) الخيالي)) اللي كان المفروض يحصل فيها .

((ياريت الجواز والحياة العاطفية)) ببساطة دي.. أعتقد مكانش هيبقى في مشاكل بين البشر أبداً، لو كان)) الحب)) لوحده كافي..

الحب هو)) core)) ”لأي علاقة عاطفية..

هو (القلب) اللي بيضخ دم لعضلات العلاقة العاطفية..

بالظبط زي)) موتور)) عربية قوي جدا وفعال ..

لكن بجانب الحب على الأقل لازم يكون في ٥ حاجات لازم تدور عليهم في أي علاقة علشان تقدر تحللها كويس (التواصل اللفظي وغير اللفظي، احترام اختلاف الآخر، الرغبة الحميمية، المسؤولية الاجتماعية، المادة) وهتصدموا لما تعرفوا إنه ((الماديات)) من أقوى سبل نجاح العلاقات وأهميتها لا تقل أهمية عن الاحترام وتقبل العيوب ..



لو الحاجات الأساسية دي بجانب) إشباع الاحتياجات للعقل الباطن) يبقى فرص فشل العلاقة أكبر بكثير من فرص نجاحها ..

تخيل معاك« موتور» عربية قوي جداً، موتور من قوته نادر إنك تلاقى غيره أبداً.. موتور متصنعش زيه قبله ولا هيتصنع بعده.. لكن فضل في حالته كدا« موتور» لا في هيكل للعربية ولا ٤ فرد كاوتش تشيلها ولا وصلات وأسلاك تربط موتور بجسم العربية ولا فوانيس تمشيها ولا كراسي موجودة تقدر تستخدمها علشان موتور يحرك العربية وينقلك إنت من مكان لمكان...

كل الحاجات اللي بجانب موتور دا، لا تقل أهمية عن« موتور «اللي هو الحب، فبالتالي فرص نجاح علاقة«مهما كانت درجة الحب قوية واستثنائية»، بس الحاجات الثانية دي مش موجودة قليلة جداً.. على عكس لما يكون موتور مش) استثنائي)، ولا بنفس القوة لكن بينمو وبيأخذ وقت علشان يزداد قوة لكن) الدائم (الثانية دي موجودة وبتسنده يبقى هنا * واللي قريين مني بيسمعوا الجملة دي مني أحياناً على علاقات بشوفها) هما مش يبجوا بعض أوي، لكن فرص نجاح علاقتهم قوية جداً وهيزداد حبهم مع الوقت).

ولو ركزت هتلاقي إنه تقريبا كل الأديان السماوية والأرضية فيها« فترة خطوبة»، وهي الفترة المنطقية اللي الطرفين فيها بيدروا الجوانب دي مع بعض، لضمان نجاح العلاقة دي مستقبلاً. فإفوعوا تحكموا على نجاح علاقة مهما كانت« حبها» قوي إنك تكمل لو الحاجات الثانية دي صفر لمجرد إنه «الحب» موجود.

لأنه على الأقل لازم يكون في هيكل للموتور علشان« العربية» تنجح وتمشي.

فكل ما« هتنضج» عاطفياً وعقلياً، كل ما هتدرك« الحقيقة» دي أسرع.

وكل ما هتدركها أسرع، كل ما هتتجنب« فشل» (واضطرابات عاطفية كثيرة في حياتك..



لما بيتضايقوا أنفسهم بتتسد؟ مفيش نمط ثابت أحياناً كدا وأحياناً كدا:

٣- آلام جسدية غير مبررة: يعني تلاقبها بنت بتتهم بصحتها، وتاكل كويس، وبتمارس رياضة.. وصحتها زي الفل، لكن بتشتكي من «صداغ» أو وجع في جسمها، ولو راحت لدكتور أو اتين، كلهم بيأكدوا إنه صحتها كويسة ومفيش حاجة جسدية فيها .

٤- صعوبة في «التحكم» في الغضب، والتحكم في «الفرحة المفرطة»... وهنا البنت بتروح للإكستريم في كل الانفعالات ومش بتعرف تتحكم في غضبها لما تغضب، ومحدث بيعرف يوقفها لو انفعلت وبتعمل «كوارث» في حالات الغضب .. * ممكن تروح تشتم شخص بعينه أو تضربه حتى.. ولما بتفرح برضو بتفرح «للإكستريم»، وكأنها شاربة مخدرات أو منشطات ومتعرفش تنام من كتر الفرحة اللي مش ساياعها.

٥- النسيان، النسيان: بتنسى أي حاجة في أي وقت.. بتنسى في الغالب كل الحاجات اللي مش مرتبطة معاها بذكرى عاطفية قوية، زي مثلاً أرقام التليفونات أو العناوين أو مواعيد امتحاناتها عادي، طالما «في لا مبالاة» من الامتحانات. ونسيانها دا في الغالب- حيلة دفاعية- من عقلها الباطن إنه ميتفاعلش مع الذكريات العاطفية المؤلمة أو اللي بتوترها كنوع من طريقته في إنه يدافع عن نفسه.

٦- أصعب حاجة بقى فيها هي دي (مش بتفهم أي تفسيرات منطقية؟! المنطق عندها مضروب بالنار ومدفون، والعزائم متاخذ بقاله سنين. والموضوع دا بيجهد مش بس أصدقائها الرجالة أو الولد اللي مرتبطة بيه كمان بيجهد ذهنياً) أصدقاءها) البنات اللي بياخدوا قرارات «عقلانية» شوية. بتشوفهم ماديين وسطحيين وناس «قميئة» عايشه في الحياة «طفيليات» تستحق الموت. وبالتالي البنت دي «مبذرة» جدًّا، وبمجرد ما بتشوف أي حاجة نفسها فيها بتشتريها بغض النظر عن أي اعتبارات مادية* وممكن تدي للرجال اللي بيبيع فلوس زيادة طالما صعب عليها حبتين. وكمات مش بتعرف تتكلم في ماديات أو حسابات منطقية مطلقاً.

٧- عالمها الخيالي: بتتعلق «شخصيات» خيالية بتعيش معاها مشاكلها وأحلامها وقصصها اللي متحققتش في الواقع، شخصيات يا إما هي بتتعلقهم، يا بتعيش في أحلامها مع شخصيات «مشهورة» بتتخيل نفسها بتنام في أحضانهم قبل النوم، أو بيجكولها قصة

ما بتحبها، أو حتى بتتخليهم معاها لما تقوم تلبس فستانها الواو في أوضتها وتتخيل إنهم معاها وشايفينها ومبسوطين بجسمها وشكلها» التحفة» فيه.

٨- صعب جداً تتوقع ردود» أفعالها»: يعني مرة تجييلها ورداية صغنة تفرح وتبوسك من كتر الفرحة، ومرة تجييلها بوكيه ورد كبير وغالي «ترميه» في وشك علشان نظرتك مريحتهاش وإنت بتديهولها .

* عندي واحد صديقي اتعمل فيه الموقف دا بالظبط:

الاضطرابات العاطفية اللي بتيجي للبنات بيكون سببها حاجة من اتنين، يا إما تعرضت لصددمات عاطفية قوية جداً ومتكررة في طفولتها، فبالتالي بدل ما» تنضج» كان الموضوع أقوى من قدرة عقلها على «الاستيعاب» والنضج فابتدت تشوف العالم من منظور مختلف تماماً عن اللي المفروض تشوفه. وبالتالي بتسقط المعادلات المنطقية تماماً كنوع من الحماية لنفسها.

يا بنت «منضجتش أصلاً» وتأخرت في النضج لمراحل ما بعد الـ ٣٠ واتقفل عليها جداً لدرجة إنها لما خرجت للعالم الواقعي اتصدمت» من قساوته» اللي معرفتش تتكيف معاها.. فبالتالي الصراع دائماً عايش جواها ومش بتعرف تخلق» التوازن» دا.. والشخصيات اللي زي دي من البنات حتى إنهم بيكونوا ٣٠ سنة فما فوق، لكن ما زالوا كلمة وجعتهم ممكن» تعيط» ولو شافت البطل بيموت بتعيط، وأي أزمة عاطفية بتمر بيها صديقتها المقربة «بتعيطلها».. وبرضو بمجرد كلمة «حلوة» بتفرح وتضحك من قلبها .

بيكونوا ناجحين جداً عملياً* لأن الجانب العملي هو طريقتهم الوحيدة في التواصل مع العالم المنطقي والعملي والمادي بزيادة دا .

لكن للأسف، بيكونوا مجهدين جدا ذهنياً للي حواليتهم، لأنهم بيحكموا على «انفعالاتهم» ذهنياً ومنطقياً وعقلانياً.. في حين إنهم عبارة عن كائنات» عاطفية» وكلكعة مشاعر ماشية على «الأرض»..

فاوعوا وتحاولوا تفهموهم» منطقياً»، بس افتحوا قلبكوا وإنوتوا هتفهموا كل انفعالاتهم ومشاعرهم.. وإوعي تنسي إنهم» أطفال» كبيرة... شكلهم» كبير»، لكن ما زالت قلوبهم» طفولية» جداً..



(البتت البسكويتية- الكيوت بزيادة)

دلوقتي بقى هنتكلم عن شخصية قليبسييلة جداااا في البنات وهي شخصية البنت (البسكويتية)، مش بسكويتة لا، بسكويتة» لإضافة رقة أكثر وبزيادة..

- إيه بقى) سماتها الشخصية)؟ وليه اسمها كدا؟

اسمها كدا لأنها شخصية رقبسييلة جداااا. وأقل كلمة بتبسوطها، وأقل كلمة بتفرحها وتخليها في قمة الفرحة، ولو كلمة وحشة برضو أو تزعلها) بتقهر من قلبها)..

هي بنت بسيطة جداااا ومش متكلفة في أي حاجة في شخصيتها، لبسها دائماً شيك بس بسيط، محتشم لكن ذوق جداااا، وهي شخصية ذووق جداااا بطبيعتها وتزعل لو شافت حد قليل الذوق يتعامل معاها أو حتى بيعامل حد تاني.

شخصية بتتقيد بالقوانين وبتحترمها مهما كانت، بتخلق لنفسها شوية قوانين تعيش بيها، ولو مفيش قوانين بتشوف قوانين اللي حواليها وتعيش بيها... وبتحترمها جداااا، وبتزعب من فكرة كسر القوانين جداااا.. (مش سهل أبداً إقناعها تعمل حاجة مجنونة أو تصادم مع قوانينها) حتى لو نفسها فيها * فبالتالي بتبقى الشخصية المجهددة اللي في الشلة.

Fragile جداااا، زي البسكويتية بالظبط.. قابلة للكسر بسهولة، وبتتوجع بسهولة جداااا وأقل موقف بيوجع بيوجعها، ودا اللي بيخليها شخصية (بتخاف وبتتجنب الصدمات جداااا).

شخصية إرضائية جداااا، بتحب ترضي اللي حواليها، حتى لو هتيجي على نفسها.. وفي الحب هي شخصية بسيطة بتبقى خفيفة جداااا على الراجل اللي معاها، ودا اللي بيعملها مشاكل بعدين إنها «بتضحى» بلا مقابل منطقي للتضحية دي، وبالتالي بتوصل لمرحلة إنها تبدأ تصادم مع قوانينها ومعتقداتها) ومبتعرفش تتخلى عنهم، وتحت ضغط رهيب ممكن ترضخ، وبالتدريج دا بيدخلها في حالات) اكتئاب) مزمن.

صبورة جداااا، وبتستحمل أي صعوبات حياتية حتى في أكلها بسيطة، شخصية بسيطة في كل حاجة.. ودايماً عندها مشاكل في فقدان الشهية، بتميل تبقى وزنها أقل من المثالي، مش بتحب الأكل زي بقية البنات.. لكن بتحب تخرج وتروح سينما أو متعتها الأكبر في الحياة تعمل شويينج ولما بتحب) بتعشق) الورد.



شخصية طموحة جدا، بس دائماً محتاجة تشجيع باستمرار من اللي قريين منها.. بتقلق قبل أي خطوة بس لما بتحس إنه حدّ مؤمن بيها جدا بتعمل كل طاقتها، وإيمان اللي قريين منها بينقلها إيمان أكبر لنفسها..

بتكره الصوت العالي وبتترعب من الأشخاص اللي «بتشتم» (أو بتستخدم نبرات صوت عالية، أو لغة هجومية قوية عليه.. وأكثر سمة مشتركة بينهم) صوتهم الواطي) والهادي... ودا بيعصب أحياناً اللي حوالها إنها تعلي صوتها علشان يسمعوها.. بس هي برضو مبتعرفش تعلي صوتها..

*أعرف واحدة صوت المكيف كان بيبقى أعلى من صوتها، فبأضطر أستحمل الحر علشان أعرف) أسمعها).

– مهو ووسة نضافة self hygiene – يكاد يصل لمرحلة الـ جير موفويبا.. بتهمم جدا بمواعيد الكوافير والاهتمام بشرتها والبرفيوم اللي بتستخدمها.. مستحيل مستحييل تضحي باهتمامها بالنظافة الشخصية.. لأنها بتعرف جدا من الأشخاص اللي مهملين في اهتمامهم بنظافتهم الشخصية.

وفية لأبعد الحدود، طالما حبت ييقى بتعافر وبتحارب في هدوء علشان حبتها.. مش بتتكلم كتير عن مشاعرها في الأول، وبتميل إنها تعبر عن حبتها) بالهدايا) أو حتى الأكل اللي حبيبها بيحبه. أو حتى لو أصحابها بيحبوا الحاجة دي.

مبتستحملش الاستهلاك العاطفي أو حدّ يلعب بمشاعرها، فلو مش متأكد كراجل ٢٠٠٪ من مشاعرك ناحيتها، فمتحاولش تتلاعب بمشاعرها أو توهمها بحب إنت مش أدّه، لأنها لو البنت العادية بتتعافى فترة زمنية، هي هتاخذ ه أضعاف الوقت دا في التعافي.. وهفضل دائماً) تجلد ذاتها «لأنها بتتوهم لفترة طويلة إنها كانت السبب في (فشل العلاقة).

شخصية نادرة جدا، وأنوثتها هادية وصبورة ومحتاجة شريك صبور جدا وبيشاركها هدوءها

.. دا



بنت عالم سمسّم



يعني إيه بنت «عاشة في عالم سمسّم»؟ ..
يعني البنت اللي أبسط من البساطة.
اللي مش بيهمها رأي حد فيها ..
اللي بتلبس اللي تحس إنها «مرتاحة» فيه بغض النظر عن رأيهم كلهم فيها ...
البنت اللي مش متكلفة أبداً ..
بتاكل اللي يعجبها، بتشرب اللي بتحبه مهما كان غريب أو مش منطقي للي حوالها .
بتضحك من أقل حاجة بتضحكها ..
بتضحك من قلبها، بتضحك مش بتجامل «بتضحكها» حد ..
بتضحك حتى لو عملت (أصوات غريبة بتضحكها دي، بس برضو دا مبيخوفهاش .. تضحك ..
بتفرح لأقل أسباب الفرحة، وممكن تعيط على موت) بطلها) في الفيلم أو المسلسل اللي بتحبه ..
هي بنت بسيطة، عاشة في عالمها الافتراضي اللي كله (بيحب) كله فيه ...
متتوقعش إنه في حدّ (بيكره) حدّ لمجرد إنه «بيحقد» عليه ...
ومتتوقعش إنه في حدّ يكرهها لمجرد إنه «مختلف معاها» أو عليها ...
المضحك أننا «بتتريق» عليها ونسخر منها من مجرد مصطلح) عالم سمسّم) اللي بنطلقه عليها ...
وبنستغرب أد إيه هي بتكون ساذجة لأنها عاشة في عالمها الافتراضي دا ...
لكن هي من جواها بتضحك علينا إحنا ..
بتضحك على أد إيه (عالمنا) مش منطقي بكل «مادياته» وبكل تعقيداته ...

وبتستغرب إنه عالمها» البسيط «المنطقي مريح أكثر بكثير من» العالم «السطحي اللي بيعيشوه...
تحية لكل الرائعات، لكل إلى عايشين) في عالم سمسم).

(البت الخجولة)

البت الخجولة shyness personality تركيبها العاطفية مختلفة شوية، ومش معنى إنها خجولة إنها بالضرورة لازم تكون) حساسة) بالمناسبة لأنه في ناس بتخلط بينهم ..

لأنه الحساسة ممكن متظهرش مشاعرها، لكن مش معنى كدا إنها) مبتكونش مشاعر عاطفية حادة وقوية، أو حتى) بتتشمك بأقذر الشتائم في دماغها)، وقدامك ساكتة.

الخجولة شخصية بتكون مشاعر قوية عادي، لكن مش بتتفاعل عاطفيا بسرعة أو بسهولة، وإظهارها لعلامات الإعجاب أو الحب شيء ثقيل وصعب نسبيا عليها)على عكس الحساسة اللي بتطلب دا بأريحية مطلقة) .

وفي البوست دا مش هتكلم عن) شخصية البت الخجولة في الحب) نبقى نخليه في بوست تاني، لكن هتكلم عن) علامات إعجابها بيك كراجل) وإيه اللي المفروض تدور عليه وتلاحظه كويس جدا!!! ..

١- هتتجنب ال eye contact معاك : البت الخجولة مش قوية في التواصل البصري الطويل اللي الإنسان بيعمله بسهولة، تخيل بقى لما بتكون معجبة مش بتقدر تحافظ على) تواصل بصري) لفترات طويلة أبداً... في الغالب هتتجه بعينها لأماكن تانية أو حتى لديكور المكان اللي إنتوا فيه تجنبا إنها تبص في عينيك..

بس عينها مش هتنزل من عليك من ورا ضهرك على فكرة..

٢- هتجيلك الحاجة اللي بتحبها : البت الخجولة نادراً لما بتعبر عن حبها بالكلام، لكن بتحب وتترتاح إنها تعبر عن مشاعرها بالهدايا.. أو حتى بالأكل اللي بتحبه وهتتعب



أوي فيه علشانك .فلو لقيتها عملتلك» صينية المحشي» اللي بتحبها؟ يبقى لازم تاخذ
بالك المرة الحماية..

٣- مش هتمانع اقتحامك لمساحتها الشخصية : عمرها أبداً ما هتحاول تقتحم مساحتك
الشخصية اللي اتكلمت عنها في البوستات اللي فاتت، ولا هتتنطط أبداً.. ولا هتتشقلب
ونادراً لو ضربتك، لكن لو أنت شوفتها في مكان قاعدة لو حدها وروحت قعدت جنبها
مش هتمانع دا أبداً، وبالعكس هترحب بيك وهتفرح لو جودك قريب منها..

٤- ودي أهم علامة بقى وركز فيها أوي مع البنت الخجولة وحياة أبوك يا شيخ «هتبقى
دائماً موجودة علشانك»... يعني إيه بقى؟

يعني البنت الخجولة لما بتكون موجودة مع اللي معجبه بيه حتى لو وسط ناس كثير، بتفضل
مكانها لحد ما الوقت يعدي وتتكلم معاه لو حدها.. في حين إنه البنات الثانية اللي مش معجبة
بمجرد ما بتاخذ دقيقة في الكلام معاه بتقولك: (طب أنا همشي بقى علشان ورايا بلا بلا بلا
(، أو) أنا صاحبي مستنياها في المكان الفلاني فلانم أروحلها»، وهكذا .

لكن البنت الخجولة مش بتعمل كدا أبداً، بالعكس هتلاقها دائماً بتبقى حريصة إنها تكون
موجودة في مكان وجود، وبتاخذ أكثر وقت ممكن إنها تفضل قريبة منك وفي المكان اللي أنت
فيه، حتى لو حواليك ناس كثير .

(البنت المرتاحة)

مفيش أقوى من) البنت المرتاحة)، ومقصدها هنا البنت القوية .

لا، أقصد البنت المرتاحة في كل حاجة في حياتها .

المرتاحة في لبسها..

المرتاحة في شكلها..

المرتاحة في طبيعة جسمها، ومتقبلاه كما هو ومش شايفة فيه أي عيب .

مرتاحة في علاقتها بالناس اللي حواليتها.



مرتاحة في إنها بتقدر تقول للناس «لأ» بكل صدق وقوة .
مرتاحة في تطعاتها للأحسن وإنها شايفة إنها متستحقش إلا (الأفضل (ليها، و)الراحة) هي
أقصى درجات تقبل الذات وحب الذات، بدل جلد الذات وكُره الذات .
المرتاحة، بتكون دائماً بسيطة ..
مش بتتكلف في كلام، أو ليس، أو حتى ميك آب .
كل حاجة في حياتها بسيطة وبتكره التعقيد والأفورة حتى في توضيح مشاعرها بسيطة ..
بتستخدم أبسط الكلمات علشان توصل أقوى المعاني وأدقها .
المرتاحة، مريحة في تعاملاتها مع الآخرين .
بتفرح جداً لأبسط الاهتمام، وكمان معندهاش مشكلة تهتم للأبد لو حسنت إن اللي قدامها
محتاج الاهتمام دا .
المرتاحة ممكن تاكل في الشارع ميهماش مطعم غالي أو رخيص .
ميهماش نوع معين من المزيكا، لو عجبته أي أغنية لأي عازف أو معنى أو أي نوع برضو
هتسمعها .
مش بتحكم أبداً على الآخرين طبقاً لشكلهم أو مادياتهم أو حالتهم الاجتماعية .
دايماً بتحكم باللي بتشوفه جواهم وفي قلبهم .
الناس اللي زي دي «نادرة» وبقث عملة صعبة دلوقتي وسط مجتمع بيصرخ (بالتعقيد والأفورة
في كل حاجة في حياته) ..
الناس دي بحسها عاملة زي «ملايكة» بتمشي على الأرض علشان بدول بنحس إنه فعلاً
للحياة «طعم» ..



(البنيت القوية)

«أكتب عن الارتباط ببنيت قوية... وليه في رجالة بتخاف من الارتباط من البنيت القوية»..

في الحقيقة مصطلح «بنيت قوية» هنا ليه معنيين..

الأول: البنيت الصدامية أو البنيت اللي بتتصادم مع الآخرين، لأن دي سماتها الشخصية.

التاني: البنيت اللي عندها توازن نفسي واجتماعي وعملي وجسدي وثقتها في نفسها عالية، هي مش «مغرورة» أو متخيلة إنها معندهاش عيوب أبداً، هي مدركة كويس إنها عندها (عيوب) لكن مدركة برضو إنه دي حاجة طبيعية، وهي متواصلة معاها ومدركاها وحابه نفسها بكل العيوب والمميزات دي..

أولاً «سمات البنيت القوية»

١- متقبلة ذاتها لأقصى درجة، عارفة إنها مليانة مميزات زي كل إنسان في الدنيا ربنا خلقه بمميزات كتير جداً.. مش هتسمع منها «أنا حاسة إنه مناخيري كبيرة فمحتاجة أعملها عملية تجميل»، لأنها متقبلة سماتها الجسدية بكل تفاصيلها سواء طويلة أو قصيرة كيرفي أو رفيعة بيضاء أو سمراء أو إلخ إلخ .

٢- بتعرف تتفاعل اجتماعيا كويس جدا مع الناس اللي حواليتها، البعد الاجتماعي مهم جدا في حياتها الشخصية وبتدرك كويس إنه طبيعي يكون عندها علاقات اجتماعية ولازم تتفاعل معاها وتحافظ عليها، ولذلك بتكون فاكرة كويس مواعيد أعياد الميلاد ونوعيات الهدايا وبتعرف تقول الجميل صح في المناسبات الاجتماعية اللي تناسبها * ودا اللي بيسبب تهديد أحياناً للراجل الشرقي وبتكلم عليه بعدين .

٣- طموحة طموحة طموحة: طموحة دائماً، مهما كان مستواها الاجتماعي أو المادي دائماً عايزة تكون في مكان أحسن، منصب أكبر، إنجاز أكبر، معرفة وعلم عايزه تحصلهم أكثر وأكثر.. هي عندها من تربيتها في الطفولة إنه جزء كبير من ثقتها بنفسها هو في قدرتها على «الإنجاز»، فبالتالي هي بتتغذى على الإنجاز.. ودائماً عندها رغبة



وشغف إنها تستقل ماديا عن اللي حوالها* ودا برضو بيعمل أزمة مع الرجل أحياناً .

٤- إحساسها الأنثوي مختلف: عندها إحساس أنثوي داخلي عالي جداً وقوي جداً، تحب تفاصيلها الأنثوية الخاصة بيها هي وتقدر تتواصل معاها كويس وتعرف إنها مش لازم تظهر) جانبها الأنثوي دا (لأي حد في حياتها والسلام، لكن بتظهر الجانب الأنثوي دا بشدة وبقوة الرقاصة اللي جواها لما بتحب من كل قلبها .

٥- بطيئة التعلق بالآخرين، لكن شديدة التعلق وشديدة التمسك، ودي نقطة ضعف جسيمة في البنت من الشخصية دي.

الملتصين شكلهم متناقضين) إزاي يا عويس بطيئة التعلق وشديدة التعلق في نفس الوقت؟!، أقولك: يعني هي مش بتتعلق بسهولة بالآخرين، لكن جزء من -نضجها-العقلي والعاطفي والاجتماعي إنها بتدرك إنه الآخرين متغيرين في حياتها وفي حياة أي شخص، فطبعي تكون لطيفة لكن مش شديدة) التعلق«، فبالتالي لما بيظهر أي شخص في حياتها مش بتتعلق بيه بسهولة، لكن بتاخذ وقتها ولكن بمجرد ما بتتعلق بيه، بيظهر الجزء الثاني) شديدة التمسك«، ومش بتتخلي عنها بسهولة أبداً .

- الجزء الثاني: «) ليه دا بيعمل مشاكل في الارتباط ؟»

في الحقيقة نظرياً المفروض إنه الرجل تكون دي كلها سمات ومميزات تخليه يعشقها، لكن في الواقع الموضوع مختلف تماماً، ليه بقي؟

- السمات الشخصية للقوية بتتصادم مع «نزعة السيطرة» للرجل الشرقي، بصوا كل الرجالة في الكون عندها نزعة سيطرة ما لازم تشبعها بطريقة ما، ودا شيء صحي مش وحش على فكرة) النزعة السيطرة ممكن تشبع عن طريق إنه الشخص ينجح مادياً).. عن طريق إنه ميالكش أكل صحي، عن طريق إنه يؤسس شركة ويسيطر على اتجاهاتها فيديها كويس، أو يسيطر عن حالته المزاجية ويخلق ظروف أحسن لمستقبله، فكل البشر عندهم نزعة للسيطرة بطريقة ما.. الشرقي بيحاول يوسع سيطرته علشان تشمل كل اللي حواله بمن فيهم زوجته وشريكه في الحياة، والعيب مش فيه على فكرة (المشكلة) في التربية اللي ربطتله إنه السيطرة تعني = رجولة أكثر، فبالتالي بيحاول يسيطر على كل اللي حواله: شغله وأصحابه وجيرانه وإخ إلخ إلخ... وطبعاً بما أنه دول أقوى من قدرته على السيطرة، فلازم يشبع نزعته للسيطرة على «الأنثى»



اللي هي شريكته في الحياة، ودا بيكون قرار سيئ جداً لأنه بيخلق تصادمات مع البنت اللي شخصيتها قوية على عكس مثلاً البنت) الاتكالية) اللي بتفرح بالراجل اللي بيسيطر عليها.

– الموروث المجتمعي اللي بيظهر البنت اللي شخصيتها قوية على أنها» تهديد محتمل» للقرارات في المستقبل.. كلام الأمهات.. أو الراجل اللي بيسمع كلام «عيلته» أكثر ما بيكون قراراته الشخصية هو صاحب الرأي الأول والأخير فيها، فبالتالي دا بيسبب حساسية مفرطة عند البنت القوية، لأنه الراجل من النوع دا، بيجهدا إنها مش هتقدر تظهر أنوثتها كاملة قدامه وتستمتع بيها معاه- لأنه مش راجل بما فيه الكفاية علشانها -وفي نفس الوقت لأنها دائماً هتحس بتهديد إنها تحت رحمة مامته أو أهله اللي بيتدخلوا في قراراته فيتعلم عليه بعلامة أكس كبيرة في المستقبل .

– البنت القوية عندها» رؤية واضحة» للمستقبل اللي عايزه تعيشه، فبالتالي لما بتدخل في علاقة «غير متكافئة» بيحصل عندها تشوش في الرؤية دي «لأنها بتكون عايزة إنه الارتباط يكون جزء من أجزاء حياتها الأخرى المهمة، زي شغلها، طموحها، وعلاقتها، وحتى بيكون عندها رغبة إنه الارتباط يكون» جدي» ويتطور لزواج في وقت معين هي بتكون مخططاله، ودا طبعاً اللي بيعمل مصادمات كثير مع الراجل دا، خصوصاً لو هو صاحب نزعات صدامية في شخصيته.

ولذلك البنت القوية مش بتعرف ترتبط بنجاح إلا في علاقة (متكافئة) مع راجل بنفس درجة القوة وبنفس درجة الطموح والاستقلالية والرغبة في السيطرة على حاجات تانية غير النزعة للسيطرة عليها .

من الآخر،» القوية» مش بتنجح في علاقات «الولاد»، لكن بتكون أسعد أتشى لما بترتبط) براجل) ناضج .

وتقدروا تفرقوا كويس بين البنت» المسيطرة «والبنت» القوية» لأنهم من بره بيكونوا شبه بعض . إنه البنت المسيطرة بتحب ترتبط بالرجالة اللي شخصيتهم ضعيفة علشان» تسيطر عليهم «، وهي اللي تتحكم في أبعاد العلاقة كلها وكل خطواتها في المستقبل حتى اللي تخصه بتكون هي اللي مخططالها .

لكن البنت «القوية» بتكره الرجل صاحب الشخصية الضعيفة اللي تسيطر عليه أو تاخذ قراراته بالنيابة عنه.

الرجالة بطريقة ما مش بيحبوا البنت القوية المستقلة وبيحسوا بتهديد قدامها، لكن برضه هي أكثر بنت بيطاردوها وبيتمنوا إنها تكون زوجة ليه وشريكة حياة. ومفيش حاجة «بتقفل» الرجل أكثر من البنت اللي بتحسسه إنها معندهاش غيرة في حياتها، أو إن حياتها مركزها راجل بتدور وبتلف حواليه.

وكل ما تكوني مستقلة ماديا أو عمليا وليكي حياتك الخاصة، كل ما هتكوني «صعبة» على اللي عايزين يلعبوا.. وبرضه -غالية- جدا وأنتي حقيقية في عيون الرجل (مكتمل) الرجولة. وخدميها قاعدة ثلاثية في حياتك :

مستقلة ماديا وعمليا .

ليكي طموحك ومستقبلك .

واثقة في نفسك حد الجنون .

وبس «الرجل» هو اللي هيقرب يعترفك بحبه..

وانتي متستهاليش «ولد»، إنتي تستاهلي «راجل»...

(الشخصية الحساسة)

ممكن كلمة «تفرحها» «جدا»، وكلمة «لو على سبيل» «الهازار» ترعبه أو تخليها تحزن فعلاً من قلبها، دي بقى :

(الشخصية الحساسة)، كلنا عندنا الشخصية دي في حياتنا، أنت نفسك أو صديق أو صديقه، أخت أو حتى زوجة، الشخصية اللي ممكن نلاقيها «بتعيط» «جنب قطة بردانه في الشارع.. وبتبقى ردود أفعالها العاطفية بالنسبة لنا» «أوفر أوي» بقى.

الشخصية دي بقى سماتها إنها :



– ردود أفعالها في الغالب بتبقى «أوفر» شوية (عاطفياً) ناحية أي حاجة بتحصل في محيطها، أو اللي بيحصل حوالها.. بتتأثر جدا بالأحداث السياسية والاجتماعية وبتترعب على أصحابها أكثر ما بتترعب على نفسها..

– من كتر خوفها على مشاعر اللي حوالها بتكون- يا عيني- «متحفظة» وبتختار كلامها بعناية فائقة وحتى كلامها في الهزار بتتجنب إنها تقول كلمة «ممکن ولمجرد ممکن» إنها تجرح اللي قدامها، فالناس بتشوفها «أوفر» مع إنها كل اللي بتكونه إنها (حساسة)، مش أكثر .

– من أجمل مميزاتها برضه إنها بتحس (بمشاعر أعمق) دائماً لكل اللي حوالها، سواء أشخاصاً أو حتى حيوانات أو لأي شيء كان حوالها بتحس معاه بمشاعر قوية جداً.. وبالتالي بيكون عندها القدرة إنها تحس «براحة» بسرعة مع الأشخاص الكويسين، وبتحسش براحة أبداً مع الأشخاص اللي مش (كويسين) ودايمًا إحساسها بيبقى صح .

– ردود أفعالها دائماً عاطفية وقوية شوية عن الطبيعي، يعني مشهد في مسلسل درامي حزين والأبطال بتموت في نهايته هتبس عليها هتلاقي عينيها كلها دموع، ولو مشهد كله فرحة ونشاط تلاقيها منتبطة وفرحانة وكأنها هي البطلة اللي بتتجوز البطل....

– أصعب حاجة عليهم «القرارات السريعة»، فكرة إنها تاخذ قرار في التوّ واللحظة بتبقى من أكثر الحاجات المعقدة والصعبة ذهنيًا جدًا عليها) لأنها قراراتها عاطفية دائماً وبتزيد لدرجة إنه القرارات دي بتوديها في داهية دائماً).

– مش بس القرارات اللي بتكون صعبة عليها، كمان التعلق بالآخرين واللي حوالها بيكون قوي جدًا جدًا، وبتكوّن روابط عاطفية قوية جدًا معاهم، ولما بيوجعها فعلاً بتدمر وبتنهار .

– على عكس الشخصية «الاجتماعية» الشخصية الحساسة بتميل إنها لما تيجي تعمل أي نشاط «إنها تعمله لوحدها.. خوفًا من إنها تكون» عبًا» على الآخرين في حياتها..

* عندي صديقه من النوع دا، كانت هتغرق، ومن كتر خوفها لتغرق معاه المنقذ سابته ليغرق معاه.. وأنقذوها في الآخر .

– بيركزوا في التفاصيل أوي أوي، الألوان والحيطان والديكوريشن أو حتى الخطوط للكلام أو مجرد (إيموجي) حلو في وسط الكلام بيفرق معاهم جداااا .

- يميلوا دائماً «للاكتئاب» أو الإحباط، لأنه تعاطفهم وتفاعلهم العاطفي مع كل اللي حواليهم يخلي عقلهم مش قادر يتعامل مع كمية الإحساس بالوجع اللي بيحسوه في وشوش اللي حواليهم.. ويحسوا بالعجز إنهم مش قادرين يساعدهم:
- بيكرهوا أفلام «الأكشن» أو العنف.. ويحبوا الأفلام الرومانسية والهادية.
- بيعيطوا كتبيير جدا... بس يرضوا بيعرفوا يضحكوا من قلبهم .
- عندهم وفاء وانتفاء شديد للي بيقربوا منهم، مش بيتسرعوا في تكوين صداقات جديدة وياخدوا وقتهم، لكن بيكونوا عندهم القدرة إنهم بمجرد ما يكونوا الصداقة دي إنهم يعملوا كل اللي يقدروا عليه ويضحوا بكل ما يملكوا في مقابل الشخص دا .
- خلوا بالكوا وإنتوا بتتعاملوا معاها في الكلمات اللي هتقولوها، ممكن كلمة بهزار توجعها بس متبينش دا، ولو كلمة وجعتها مش هتبين دا ولا هتقوله لحد لكن هيبان على وشها أوي إنها زعلت .
- الشخصيات دي بتكون «متعبة» أحياناً للشخصيات الصدمية إنها تتعامل قدامها بطبيعتها.. فلو في شخصية صدمية هتيجي قدامها لازم الشخصية الصدمية تتجنب تصادمها.. وعلى الأقل تتفاعل معاها عاطفياً وتبطل «صداميتها» قدامها .
- أجمل ميزة فيها بقى في البنت «الحساسة» (هو حضنها) أكثر مكان في العالم هتحس فيه بدفء وأمان وهدوء بعيداً عن العالم المزعج اللي مليون ضوضاء حواليك دا، لأنه حضنها لما بتحضن بتختار إنها تدليك من قلبها وأمانها وحنانها اللي مش هتلاقي زيه في أي مكان :

(الصدامية بزيادة – بتاعة المشاكل)

الشخصية الصدمية

- هتشوف إيه الكلمة اللي (بتوجعك) وتقولها لك..
- دي ببساطة البنت #الصدامية، بتكون بنت شخصيتها قوية..



بتظهر قدام الناس بشخصيتها القوية دي، صدامية لأبعد الحدود .
 ممكن كلمة تفرحها وتخليها طابيرة من السعادة ..
 وممكن كلمة تضايقها وتخليها « تجييلك القديم والجديد » وتقول لهولك ..
 - بتعرف ترد كويس أوي بأكثر كلام ممكن يوجعك، « وانت مالك؟ » دي كلمتها المفضلة.
 هي وكل مشتقاتها بقى ...
 عندها كاريزما وحضور مُبهر، عندها هيبة وقوة بتفرض على « الآخرين » احترامها ..
 معندهاش وسط « يا أبيض » يا « أسود » ..
 يا تحب يا تكره، يا تبقى رقم واحد يا تبعد عنك ..
 - بتلعب بينج بونج بالكلام .. يعني لو جاتلها كلمة ضايقتها، هترد بكلمة أكثر قوة تضايق أكثر ..
 مش بتفكر في الرد كتير، هيتيألك إنها مدربة على الردود دي وحافظهاها ..
 مع إنها بتكون حساسة جداً وبتستخبي ورا صداميتها أحياناً علشان متبينش « ضعفها » لحد ...
 مستحيل تعيط قدام حد ... اجتماعية، بتحب تشارك الناس « همومهم » وفرحتهم وتنصحهم ..
 بتحب تجرب حاجات جديدة، وأنيقة دائماً في لبسها ..
 في الحب :وفية لأبعد الحدود، لما بتحب بتبقى أنثى تانية خالص ..
 بتتحول لشخصية رقيقة، ودیعة وكيوت كدا وعسولة ... وبتبقى أنوثة طاغية بس لما تحب .
 بتضحى بكل حاجة علشان حبها ...
 والأهم إنها بتتوجع بشدة لما بتتجرح ...
 دائماً بصوا على ما وراء كلامها، مهما كان دبش هتلاقوه بيعبر عن حب واهتمام ...
 لأنها لو مهمتمش هيبقى عندها «لامبالاة» ناحيتهم ..
 بس أجمل حاجة في شخصيتها إنها «مهما ضعفت «مبتنهارش» ...

وإنه من قوتها «الرجالة الكسر بيترعبوا منها» ..

يخافوا حتى ينكشوها.. ويكتفوا إنهم يشتموها من وراضهرها ..

لأنهم في وشها أقل منها رجولة وقوة وهيبة وسيطرة..

(البت الحدية- متقلبة المزاج)

التقلبات المزاجية عندها -البت الحدية- وما أدراك ما البت الحدية...

في الحقيقة كل البنات * وهنا فعلاً أقصد كل البنات عندهم mood swings بطريقة ما، بتختلف درجتها وأوقاتها والظروف اللي بتتعرض لها أو حتى المود نفسه اللي بيدخلوه، لكن التركيبية الفسيولوجية والسيكولوجية عند المرأة هي إنها كائن هرموني متقلب المزاج وبيتغير مزاجه بسرعة وبقوة جداً .

في شخصيات بقى بتكون تقلباتها المزاجية أقوى من العادي بشوية، زي الشخصيات ال sensitive الحساسة، أو الشخصية الحدية.. borderline ...

الشخصية الحدية أقوى شخصية عندها تقلبات مزاجية «حادة» ممكن تقابلها في حياتك..

* في الحقيقة أنا بأشفق جداً على أي راجل بيرتبط أو بيتجوز واحدة كدا، كان عندي صديق مرتبط ببنت كدا جننته تقريباً، وكان كل ما يحكي لي أقوله: «دي ذنوب إنت عملتها وربنا بيكفرها دلوقتي»

الشخصية الحدية في البنات مش بس مجهددة في التعامل مع الإنسان العادي، كمان مجهددة في العلاقات) لأنه العلاقات العاطفية هي عاطفية وتفاعلية) في المقام الأول، فمممكن تبقى في شغلها نسبياً مزاجها مستقر، لكن في الارتباط نادراً وشبه مستحيل تبقى مستقرة أبداً عاطفياً.. وطبعاً لما الموضوع بيزيد عن حده وبيوصل لدرجة اضطراب شديد وبيأثر على «فاعلية» حياتها ومش بيخليها تعرف تعيش طبيعي يبقى هنا لازم) الاضطراب) دا يكون ليه علاج



كيميائي عند طبيب متخصص، لكن أنا هنا هكتب عن «سمات الشخصية الحدية» اللي هي أي نعم عندها تقلبات مزاجية لكن موصلتش للدرجة اللي تخلي الدكاترة تصنفه («disorder») محتاج علاج كيميائي .

سماتها بقى

١- ردود فعل عاطفية، شديدة أحياناً، بتكون أوفر شوية، ومش منطقية للي حواليا.. يعني مثلاً لو شافت راجل شحات في الشارع ممكن تعيط جنبه، لو شافت بطل مسلسل بيتعذب بتلاقيها بتعيط وتدمع معاها، حتى مع إدراكها إن دا تمثيل.. وكذلك في الفرحة بتفرح أوي وتبتنطط وتطير من الفرحة لمجرد إنها سمعت كلمة حلوة وعجبتها.. دائماً بتروح في الإكستريم لكل حالة مزاجية عندهاش وسط .

٢- نظرتها لنفسها self image عندها مش مستقرة، أحياناً واثقة في نفسها جداً، وأحياناً شايفه نفسها أقل حد في الكون وملهاش أي لازمة ودا اللي بييجن أصحابها واللي حوالياها .

٣- علاقاتها العاطفية صعب تستقر، ويبقى عندها تاريخ فشل علاقات عاطفية محترم، أو بتجيب من الآخر ومش بتدخل علاقات عاطفية أصلاً، وبتكتفي (بخيالاتها العاطفية) مع أبطال وهميين في دماغها بتعيش معاها.. ودا اللي بييجن اللي يرتبطوا بيها .

٤- عندها رغبة في العزلة، والبعد عن الناس معظم الأوقات.. وأوقات بتحب تلزق فيهم متسييهو مش.. كمان بيصاحبها) اكتئاب) حتى في أوقات الفرح بتاعة الناس العادية.

٥- لما يرتبط بتعشق من كل قلبها، بتحب وتتعلق بطريقة مش طبيعية أبداً، ممكن تعمل أي حاجة لمجرد إنه حبيبها يكون مبسوط * أي حافة حريفيا، وبسرعة بتنتقل لحالة من الكره الزائد وبتبقى عايزه تقتله أو تمنى اختفاه من على الأرض .

٦- عندهاش كارير واضح لمستقبلها، كل فترة بتطلع بشغف وبحماس لفكرة جيدة وبعدين ترهق وتروح شغلانة تانية... وهكذا .

٧- ودي يمكن أخطرهم إنه ٨٠ ٪ من الناس اللي عندها اضطرابات الشخصية الحدية



يحاولوا أو حاولوا على الأقل الانتحار قبل كذا، بس اللي عايز أوضحه هنا إنه طالما هي مجرد suicidal thoughts أو أفكار انتحارية يبقى الموضوع مش خطر.. الخوف كله من» المحاولات الفعلية للانتحار«.. ودي يمكن حاجة بتكون صعبة على اللي حوالها إنه رغبته في الانتحار بتقلقهم جداا عليها .

ندخل بقى في الجزء الثاني: إزاي تتعامل مع تقلباتها المزاجية؟ أو تقلبات المزاجية عند البنات عموماً .

١- المود الأول: الرغبة في البعد: دائماً البنات دي بالذات ودا بيحصل كثير، وأحياناً البنات العادية وعموماً بيجيلهم رغبة مفاجئة في الابتعاد عنك أحياناً، وبيسبقها دائماً المرحلة دي شوية خناقات على حاجات تافهة، أو انفعالات مش منطقية.. أو إنها ترعق فيك بدون سبب منطقي.. فأنا عارف إنه صعب عليك كراجل إنك تتحط في موقف زي دا خصوصاً إنك مبتكونش فاهم هي بتعمل كدا ليه؟ أفولك بقى على السر(متحاولش تفهم هي بتعمل كدا ليه)، لأنه دا هيضايقها أكثر، لأنها نفسها مش فاهمة هي بتعمل كدا ليه؟ ولا حتى المخرج ولا المشاهدين عارفين هي بتعمل كدا ليه... !

كل اللي عليك تعمله إنك متتكلمش في أي حاجة وتديها مساحتها الخاصة في التعبير عن الأفكار اللي في دماغها، مهما كانت مش مترتبة، ومهما كانت مش منطقية ليك.

يعني احضنها، خليك جنبها، متسيبهاش، لكن في نفس الوقت متتكلمش كثير عن مشاكلها معاه، خليها هي اللي تتكلم .

٢- المود الثاني: الغضب: في فارق بين» الإحساس بالظلم« و»الغضب«.. فرق بينهم كويس كراجل في التعامل مع الست عموماً، لأنه الإحساس بالظلم التعامل معاه ببساطة بيكون يا بتعبرلها إنه (الظلم دا واقع على الكل)، فالمشاركة فيه مش اختيارية، والكل مظلوم فيه.. يا تشيل الظلم دا من عليها وتريحها، وخلي بالك السوشيال ميديا بتشحن ليل نهار بسكرين شوتس ومسلسلات تركي الرجالة فيهم» خياليين»، فلا إراديا عقل المرأة عمال يستوعب إحساس بالظلم بيزيد كل يوم. الغضب، بقى مختلف شوية.. لأنه الغضب عند النوعية دي من البنات غضب «على الذات self anger نادرًا لما بتغضب على غيرها، ولو غضب على غيرها ممكن تحس بالذنب إنها غضبت عليه وتزعل إنها زعلت منه!! آه والله ز مبقولك كدا.. فاللي عليك بقى أول ما تلاقيها



غضبانه امدحها قولها كلام حلو، زود ثققتها في نفسها، بالتالي الغضب على نفسها دا هيقل تدريجيًا.. ولو متحوزين» اتحرش بيها» .. هتفرح بحبك لتفاصيل أنوثتها حتى لو تحرش لفظي فقط .

٣- «المود» الإحباط والاكتئاب»، ودول أكثر مودين هتقابلهم في حياتك معاها، لأنه عقلها دائماً بيميل ليهم ويروحلهم كمكان للراحة أحياناً وكمكان بيعيش فيه كل انفعالاته العاطفية» داخلياً»، والبنات دي في الإحباط والاكتئاب خصوصاً على عكس الناس الثانية مش بتطلب مساعدة حد، ومش بتعبر عن دا أصلاً، ويتميل إنها متتكلمش فيها مع اللي بتحبهم .. إنت مع الوقت هتعرفها وهي في المود دا، هتلاقياها شعرها منعكش وألوان لبسها بقت كئيبة ومش مهتمة بالميك أب ولا أي حاجة .. هنا» الهدايا» والخروجات الرومانسية بتعمل العجب معاها ..

وهنا على عكس اللي فوق (إوعى تتحرش بيها)، لأنها هتشوفك مجرد شخص حيواني هرموني قدر مش بتفكر غير في جسمها فخليك رومانسي مؤدب وكيوت كدا الله يخليك .

ندخل بقى في الجزء التانيأهم حاجة» إوعى تضغط عليها تكلم بالمنطق»، أو تقنعك بأسباب منطقية لتقبلاتها المزاجية دي، وافتكر إنه البنت الحدية من أكثر البنات حبتها لأنوثتها بس نظرتها لأنوثتها بتتغير حسب نظرة شريكها في الحياة ليها، ودايمًا هتكون متشككة في مدحك أو كلامك في أنوثتها، ودا مش معناه إنك تزهق .. لكن معناه إنك كل مرة تظهر لها جانب أثوي أعمق فيها .

وافتكر كمان إنه الشخصية دي اتولدت» بمتناقضات طبيعية» جداااا جواها .. يعني مستغريش إنها هتكون خجولة وكيوت وتتكسف تعلي صوتها، بس جواها» رقاصة» خفية محدش يعرفها غير ها .. أو إنها تعلي صوتها لما تنفعل عادي وتشتم بأبشع الألفاظ لما بتتعب .. ودايمًا» .. حونة» ..

أحن وأكثر حضن أمان ممكن تترمي فيه .. لأنه مهما كان» خوفك»، ومهما كان توترك تأكد أنها عاشت اللي أسوأ منه، فلما بتحضنك في لحظات ضعفك هي بتكون أكثر حد في الكون عارف يعني إيه «احتياج» وخوف وضعف ..

(النسوانجي وسنينه)



ملحوظة: مصطلح نسوانجي أطلقته على الرجل اللي بيدخل علاقات جسدية متعددة كاملة بدون التفاعل العاطفي مع الطرف الآخر تمامًا.. يعني النسوانجي مش مجرد الرجل اللي بيعجب) بأجسام الجنس الآخر * لأنه كل الرجالة بتعجب بأجسام الجنس الآخر ودي غريزة بقاء من أيام رجل الكهف موجودة في المخيخ (المخ البدائي) عند كل الرجالة.

النسوانجي بمختلف أنواعه دائماً يسعى إنه يملي شوية احتياجات عنده بتتقسم بين شقين أساسيين، وهما: الجانب النفسي (احتياجات لإشباع insecurities – عدم الأمان اللي عنده)..

وطبعًا الجانب اللي يميزه كنسوانجي (الجانب الجسدي) لأنه زي ما قولت كتير سابقًا، دا اللي بيفرق بين «النسوانجي» وبين «اللعوب playful» إنه بطريقة ما ٩٥٪ من الرجالة يالعبوبة يا نفسها تبقى كدا بس الظروف مش مساعداتها..

المهم نرجع تاني للنسوانجي اللطيف، بطريقة ما وعلى الرغم من تشابه «احتياجات النسوانجي النفسية ورغبته في إشباع إحساسه بالأمان الوهمي».. لكن الدوافع نفسها مختلفة.

أولاً: كل النسوانجية عندهم نزعات «نرجسية» قدرة – مش بيتفاعلوا عاطفيا مع ضحاياهم إطلاقًا، ودي طريقة مخهم طورها كحيلة دفاعية علشان ميحس بتأنيب الضمير أو حتى يحب الضحية ويتعلق بيها.. ولا بيصعب عليه حتى الشحاتين اللي قلوبنا ممكن تنقطع عليهم في الشارع دول .

سمة كمان من سماتهم كنسوانجية) الرغبة في تلقي المدح المستمر) حتى لو أنه يتمدح باللي مش فيه.. لكن سماعه لكلمات المديح والتشجيع وأنه بقى الرجل الواو اللي محصلش دي بتكون واحدة من أقوى نقاط الضعف اللي هنستخدمها ضده).. وهقولكوا إزاي كمان شوية .

ثانيًا: نرعة سيكوباتية قدرة برضو – ساحوني على كلمة قدرة لأني هكررها كتير ونرعتة السيكوباتية دي هي اللي بتخليه ينجح جدًا عمليًا وماديًا ولو) نسوانجي سكة)، ولسه في بداية مشواره هتلاحظوا إنه شخص showy – بتاع فشخرة أو وي ويميل إنه يتباهى حتى باللي مش عنده أو ببالغ في تفخيمه للممتلكات اللي عنده.

لكن النسوانجية «السكة» دول بيتقفشوا بسرعة، والبنات بتحس بيهم بسرعة، وبالتالي خطرهم أقل – ودول مش اللي عايز أتكلم عليهم.. اللي عايز أتكلم عليهم هما «الحيثان الكبيرة»،



الأساتذة المتمرسين اللي فعلاً هيزعلوا من سلسلة المقالات دي.

ثالثاً: نزعة السيكوپاتية دي بتصاحبها نزعة (مش نزعة بقى) دا متشرب ميول (سوشيوبات)، ودي اللي بتخليه دائماً محتقر/ يبلغى آراء الآخرين وبيستمتع جداً باستخدام سلطته سواء في شغله أو بيته (لو كان نسوانجي متجوز *)، بالمناسبة النسوانجية شاطريين جدا في إنهم يفصلوا بين» حياتهم الهلس («وبين» أدوارهم كأزواج أو كأباء»، بالعكس هتلاحظوا إنه أغلبية النسوانجية (الحيثان) اللي معديين الـ ٣٥ ومتجوزين وحياتهم الزوجية مستقرة.. إنهم شاطريين جدا!!! في إشباع احتياجات زوجاتهم العاطفية وأدوارهم كأباء وبيكونوا حنينين جدا * (مش عارف أنا كتبت حنينين كدا صح ولا غلط.. مع أولادهم ومراعيين لكل المسئوليات الزوجية) من الآخر هو عارف إنه بيدمر أسر ونفسيات ضحايا كثير وبالتالي عايز استقرار أكثر في بيته) وبرضو (بيصعب قرار الانفصال أو الطلاق للزوجة المسكينه) لأنه نظريا هو مشبع لكل احتياجاتها سواء الجسدية أو العاطفية والنفسية والمادية وكمان الاجتماعية)..

(النوع الأول)

«- نسوانجي، ماما كانت بتلوسعني على قفايا، وأنا صغير وبتحضن أخويا أكثر مني»....»

أو نسوانجي (أنا عندي تبول لا إرادي)، والجملة دي حرفيا اتقالت لواحدة من ضحايا النسوانجي العجيب دا، وبمجرد ما قالت الكلمة انفجرنا في نوبة ضحك هستيري لأنه لو عايز» يدمر» نظرتها الرجولية ليه، مكانش هيقول كلمة بالغباء دا .

المهم النسوانجي دا من النوع النسوانجية «السكة» حاجة كدا أي كلام ، self esteem في الأرض ومعندوش أي إنجازات لا عملية ولا اجتماعية ولا مادية تذكر بالمره.

ولذلك معظم ضحايا من البنات (الهبله) ومنتزعلوش من هبله كمصطلح أنا بأستخدمها للتعبير إنه البنات دي طيبة للدرجة اللي تخليها تتعاطف مع أي حاجة بدرجة مبالغ فيها .

عارفين البنات اللي بتعيط لما تشوف شحات في الشارع أهو ده النوع اللي بينجح معاها النسوانجي السكة دا .

لأنه النسوانجي دا أسلوبه بسيط جدا، وهو تكتيك قدر ورخيص وسهل بس بينجح مع البنات غير الناضجة دي.



التكتيك هو) استعطف الضحية) أو وضعها في) معضلات أخلاقية) بحالة مستمرة، ودا اللي بيخليها تتجاوب معاه وتتحول لضحية ليه.

في الغالب بيكون عندهم مشاكل sexual مش لطيفة خالص، ومدمنين بورنو وحاجة قرف كدا .

يعني إيه استعطف بقى؟ يعني هيكون كل كلامه «الدنيا حطت عليا» وأصل أنا مفسوخ في الحياة اجتماعيا وماديا، ومحدث حنان من أي حد في الدنيا، حتى أمي كانت بتحضن أخويا وبتنفضلي وأنا صغير .

تحسوا إنه كلامه عبارة عن كليشيهات من مسلسل إسباني قديم معدي ال ٣ آلاف حلقة هيكشف البطل في الآخر إنه أمه هي خالته ومامته كانت الخدامة بتاعتهم .

قصة مملة وحكاية متدخلش غير دماغ ناس متعرفش كتير عن الحياة غير المسلسلات الإسباني المدبلجة سوري دي.

وبعد كدا لو البنت بعدت عنه، بتبقى دخلته: (أنا جالي سرطان في قفايا)، والمضحك إنه فعلاً أنا أعرف نسوانجي ادعى إنه جاله سرطان وخف في خلال وقت قياسي لمجرد إنها رجعتله وشعره تقريبا طلع ثاني يوم . * اتفاجئت أنا كدا بقى.

أو أصل أنا قلبي وجعني، أو كلام زي: «أنا عندي تبول لا إرادي» وخايف أتقدم لواحدة ترفضني .. والله العظيم زمبولك كدا .

المعضلات الأخلاقية بقى هي إنه بيحطها في معادلة صعبة على الأنثى الشرقية اللي اتربت على مسلسلات ونيس وأرابيسك وليالي الحلمية وشخصية فاطمة تعلقة وجو التمانينات الدافى اللي المرأة فيها معطاءة بزيادة عن اللزوم دا .. إنها هتبقى السبب)، إنه حالته هتبقى من سيئ لأسوأ .

وعلى عكس نسوانجي (البيت من بابيه) أو نسوانجي) «أليس في بلاد العجائب»، ودول نسوانجية في مستوى أعلى شوية من الهري بتاعه دا تحسهم نسوانجية محضرين راكبين عربيات bmw أو مرسيدس، لواحد راكب توكتوك لو لمستله التوكتوك، يتكلم بصوت معوج بشعره المفلفل اللي مليون جيل تصاحبه سيجارة محشورة فوق أذنيه: «إيدك والتوكتوك يا برنس !!»

ونسوانجي التوكتوك دا، على عكس النسوانجية المخضرمين اللي بيحاولوا يخبوا علاقتهم



النسائية ويتجنبوا الكلام المباشر عنها علشان مدمروش خط الثقة اللي بيحاولوا يبنوه مع الضحية..

لا النسوانجي» الأهل» دا، بيحاول يبالغ في علاقته النسائية والصولات والجولات النسائية اللي عاشها طول فترة حياته ويلاعب دور» النسوانجي التائب» بقى.

وكان على عكس بقية النسوانجية التانيين اللي بيكون هدفهم استغلال جسدي كامل، ومادي ومعنوي كمان.. دا بيفرح بأقل حاجة، صورة مثلا أو آخره makeout لأنه كما أسلفنا سابقا في الغالب هو عنده مشاكل جنسية، و insecurities فشيخة بقى في الجانب دا في شخصيته.

أنا مش هتكلم كثير، بس بدمتك يا شيخة دا شكل واحد» نسوانجي» تكلمي معاه في أي حاجة في الدنيا؟!!

(البنت الى عينها مليانه) .

من كام يوم كنت بتكلم مع صديقة لطيفة وقالتلى الجملة دى "دى عينها مليانه يا عويس"، فى الحقيقة الجملة دى بتتقال حوالينا كثير وشخصيا مكنتش فاهمها بالمعنى الحقيقي بتاعها "العين المليانة" كنت دائما بترجمها البنت اللي فى مستوى اجتماعى ومادى أعلى من المتوسط، أو متوسط وشخصية "انساوية" يعنى بترضى بأبسط الأشياء وتتنسبط بيها و 'تكيفه' تقدر تتكيف مع ظروف صعبة ماديا واجتماعيا حبا لشريكها.

لكن لما بقيت بقابل أي شخص فى استشارة أو غيره بسأله "يعنى إيه بنت عينها مليانة بالنسبة لك؟" ومع إجابات مختلفة اكتشفت إنه دى أكثر "سمة شخصية" ممكن تبقى مريحة وقوية ورائعة وأثوية جدا.

لأن البنت اللي عينها مليانة مش "بتجيب اللي قدامها من فوق لتحت"، ولا "بتشوف ايه الى مش عندها وعند غيرها وتبقى نفسها فيه" بطريقة شريرة وسلبية زى البنت "الى عينها جعانة".

لا البنت الى عينها مليانة "طموحه جدا" وفى الحقيقة دا سر قوة" عينها المليانة".

لانها مش معنى "إنها عينيها مليانة" وشخصية انبساطية وتكيفية، إنها تفقد "الطموح" بتاعها فى الحقيقة هى طموحها جاى من قوتها ويقينها انها دائما تقدر تبقى "أحسن" وتقدر تنجح اكر من أى حد ، ولانها "عينيها مليانة" مش شاغلة نفسها باللى عند غيرها وعارفة تستمتع بالى عندها مهما كان بسيط او كثير، ولان طموحها مبيقفش فهى مش رابطة سعادتها "بحاجة معينة" لانها عارفة ومتيقنة انها دائماً هتزيد ودائماً هتكبر ودائماً هتبقى احسن واحسن . فبالنالى هى مش محتاجة اصلاً تبص فى اللى ف "ايد غيرها" .

"الى عينيها مليانة" مش معناه مستوى اجتماعى معين، او مستوى مادى معين .

"العين المليانة" ملهاش علاقة بأنه البنت "غنية" أو متوسطة أو حتى فى بدايات "متواضعة .

العين المليانة انعكاس "التربية" الأهل لبنتهم إنها تقدر توصل لأى حاجة نفسها فيها .

وانه "الحقد" وتمنى زوال النعمة من الغير دى حاجة (بتستهلكها) هيا .. وهتخليها دائماً "عينيها جعانة" بتنهش فى تفاصيل وعيوب الى حواليتها علشان تحسس نفسها انها أحسن منهم باستمرار .

البنت الى "عينيها مليانة" كمان حتى فى ثقتها فى أنوثتها وجسمها مختلفة، الوحيدة اللى ثقتها فى نفسها مبتتهزش من نظرات حد أو حتى انتقاد حد . يعنى مش معنى انه واحد قالها "انتي مش جميلة" يبقى تفقد ثقتها فى أنوثتها . ولو حد قالها إنتى أجمل بنت فى "الكون" متفرح لكن مش هياثر عليها ويخليها طايرة من الفرحة مثلاً .

الوحيدة "الى عينيها مليانة" هى اللى تلاقىها بكل "اريفية" بتقول "البنت دى جميلة جداً" فعلاً، ودائماً بتشوف اللى حواليتها جميلات لانها عارفة انه جوا كل انتى انتى تانية أجمل مستحبة، وانه الكل جميلات بس بطريقة مختلفة .

" الى عينيها مليانة" مش بتحارب علشان تبقى " محبوبة الجماهير" ولا بتجهد نفسها انها "تعجب العالم" اللى حواليتها . ولا بتدخل فى "سباق لايكات" على صورها على الانستجرام . عفويتها وبساطتها واهتمامها بانوثتها اللى بيكون شئى طبيعى ومش متكلف بالنسبة لها بيخلي الكل لا إرادياً ينجذب لجانب أعرق فى "شخصيتها" مش بس جسمها ولا شكلها ولا صورها ..



البنيت الى "عينها مليانة" مبتدخلىش فى "صراعات" على تثبت نفسها قدام أى بنت "عينها جعانة"، لانها بتبقى عارفة انها هتستهلك نفسها فى "صراعات على الفاضي".

وانه " البنيت الى عينها جعانة" مهما خدت ومهما حصلت ومهما أنجزت برضو هتفضل تبص فى اللى مش عندها وفى ايد غيرها . ومهما كانت رائعة برضو هتشفوف نفسها مش جميلة حتى لو أظهرت ثقه ، مزيفه ، فى انوثتها . ودأبما هتشفوف كل الى حوالها مش ' جميلات ، لانهم مش على ' مقاسها ' الجمالى .

بصراحه يمكن دى حاجة "بسيطة" لكن " البنيت الى عينها مليانة" اختصار للأنوثة والقوة والطموح والأهم (الراحة) فى وجودها وجنيتها ، وراحتها مع نفسها وجبها للغير .

لانه ' تقبل الآخر ' بيبدأ من تقبلها لنفسها

البنيت ال clumsy - المدهولة فى نفسها ، العبيطة الهبلية فى الحب .

النوع دا مسخره بقى فى البنات ، لانه عكس (الظاهر عليها) الى هو بتحاول تبين نفسها " راجل " جامد ومش بيهمها حد وعلى اد ما بتقدر بتحاول تتجنب انها تظهر نفسها خجوله ، وتظهر انها (شبح) وتعرف تسد فى اى خناقه وتعدى فى اى "حوار " وجو "شبيه معاه حكاية دا".

لكنها فى الحقيقه بتكون " طيبة " جدااا وبسيطه فى كل حاجه فى حياتها ، ودا بيظهر اوى على ستايلاتها ولبسها الى نادرا لما بتشتري حاجه brand او اصلا بتركز فى موديلات والكلام دا بيكون بالنسبة لها مجرد "تضييع" وقت وهرى بنات مالوش لازمة.

بتبقى فاشلة فى الميك اب، بش بتعرف تظهر نفسها جميلة، هادية من جواها لكن بتتكلم بحكم الواجب قدام الناس كتبير .

-شكاكه بطبيعتها، معظم (خوازيق) اصحابها العاطفيه بتخليها تفضل سنين لحد احيانا (٣٠)×ومرة قابلت بنوته كدا كانت فى ال ٤٠ تتجنب الدخول فى علاقات عاطفيه او حب او ارتباط وبتكتفى بالافلام الأبيض والأسود والمسلسلات التركى الى بتحلم بيها ليل نهار دى -مهو ووسه بالتفاصيل ، بتحب التفاصيل زى عينها ، شخص بيركز فى كل تفصيله وعلى

عكس نظرتها لنفسها البسيطة ، لكن نظرتها للعالم الخارجى معقده وصعبه وليها تاتش خاص بيها فى المنظور دا .

- ناجحه جدااا ، وبتحب التنافس . لانه كل طاقتها رايعه فى شغلها تقريبا ، بتحب تنافس غيرها وتوصل لمراكز نجاح اعلى دايمًا وبتطور نفسها باستمرار ومعندهاش مشكله تغير كاريهها لمجرد انها حست انها هتنجح فى كاريه تانى او زهقت من الكاريه القديم او من الاخر (جابت اخره) ومبقتش تتعلم حاجه جديده .

- بتفكر زى الرجاله كويس جداا ، ويمكن دا الى بيخلى معظم صداقاتها الناجحه مع ولاد ، بتفهم الجانب (المظلم والقذر) فى دماغ الراجل ، ولو ب مش هتحس انه الكلام الى بيقوله ' غريب ' او جديده عنها لانها باختصار فاهمه جدال التسلسل المنطقى والغريزى للرجاله فى نظرتهم للجنس الاخر ، وبما انها (انثى جداا) وفى نفس الوقت " انوثتها صدت " لانها مش بتستخدمها ، وحينه جدااا ووفيه بطبيعتها . (لكن شكاكه فى الارتباط ودى هشرحها تحت) . فمعظم الرجاله بيحطوها فى خانه (الصديقه المقربه) او " امهم " الى بتراعيهم وبتهتم بيهم وبتنصحهم وبتعرف تسمعهم .

- مريحه فى " السماع " جدااا ؛ مش بيخاف القرييين منها من انهم ميتفهموش صح ، بتعرف تسمع وتخلى الى قدامها يفضض بطريقته وتحسسه براحه انه يستخدم اللغه الى تعجبه فى النقاش مهما كانت صعبه او مش سهل على بنت تانيه تسمعها ، ولانها بتفكر زى الرجاله فهى بتبقى عارفه انه (كل الرجاله بتشتتم) عادى فى كلامها فبالتالى مش بتقفلهم .

فى الحب بقى (المعلم الى فوق دا) بيقلب بطه بلدى حرفيا ولذلك سميتها clumsy - او المهوله فى نفسها لما تحب . بتبقى العكس بقى فى كل حاجه .

- فجأه هتعمل تصرفات مراهقين وبالرغم من نضجها العملى والعقلى لكن لما بتحب " بتراחק " بما تحمله الكلمه من معان . مبتبقاش عارفه تلبس ايه اى تتكلم ازى معاه ولا تتصرف بطبيعتها زى الاول ، لانه الموقف دا بيتطلب انها تتعامل بانوثه (وهى كانت بتشوف الانوثه المصنطعه دى حاجه رخيصه) . يعنى مره هتجرب

- حساسه للنقد ؛ بتحب النقد الا من الى بتحبه ، وبتزعل جدااا لو اتريق على انوثتها ، مره



شاب كان مرتبط بنبنت كدا فقرر يرخم عليها و اتريق على الميك اب راحت مسحته و عيظت .
لانها كانت بتتعلمه علشانه .

*فخليك ذكى لو مجرد اصدقاء اتريق ورخم للصبح ، لكن للحب حسابات اخرى .

-جبانه جدا فى اى خطوات مش محسويه : على عكس شخصيتها المغامره فى كل جوانب حياتها العمليه والشخصيه . فى الحب بقى جبانه و متردده و مبتعرفش تحلل ايه الى المفروض يحصل فى المستقبل ، ولانها نادرا (لما راجل يملى عينها) . مجرد ما يتلاقيه بسمع الجملة المستفزه دى (اخليه يتجوزنى ازى فى اسرع وقت ممكن يا عويس) اهدى يامناااا مش كدا منتقلى شويه . لانه الجواز بالنسبه لنضحها العاطفى المتواضع الضمانه الوحيدة للاستقرار العاطفى (متعرفش الى فيها ياعيينى) ودايما هتلاقىها كل خطوه عاطفيه بتفكر بزياده ، وبتحلل بزياده overthink and over analyzing . ودا بيسبب ضغط على ال partner العاطفى او حتى خطيبها او زوجها .

-خجوله بطريقه تزهق بقى : مش هتستحمل اى معاكسات بسهوله ، ولا هترتاح لنظرات عينيك المريبه و ممكن تشتتمك عادى .

-هتكره الغيره ، و تضايق لو مغارص

بتشوف الغيره نوع من انواع السيطره (ودا الجانب الخارجى او الذكورى الى فيها) انما برضو هتضايق لو محستش انك بتغيير (ودا الجانب الانثوى الى فيها)

-بتعرف تبقى (كيوت) وهى دايما كيووت فى نفسها ، لكن مبتعرفش تبقى " مغريه كائى " دايما لما بسألهم البنات دى السؤال الروتينى الى بسأله فى اول ما بقابل البننت

- (من صفر لعشره اد ايه واثقه فى نفسك ؟) بتبقى اجاباتهم من ١٠ ل ٧ . ودا رقم كبير وكويس .

لكن لما بسأل من ١٠ ل ٠ اد ايه واثقه فى " انوثتك " مبيعرفوش يدونى رقم ، وانا بهلك ضحك لانه دايما بتبقى الاجابه واحده بعد السؤال (ماهو على حسب معنى ايه انوثه يا عويس ؟) ونبداء نتناقش فى مفهوم الانوثه نفسه وبتعمد تجاهل انى اعرف الاجابه على السؤال دأ ، لانه فى الغالب بيكون مش دقيق فى المرات الاولى الى بتكون لسه مطورتش مفاهيم عميقه

متخيلها راجل من لبسها وشعرها القصير وحتى طريقتها الذكورية فى المشى .

البنات ال boyish فيهم نوعين (نوع مسترجل) ودا النوعية اللي فاقدة اى تواصل ' انثوى ' مع نفسها ' داخليا ' او خارجيا ' ..

ونوع ال boyish الى عنده تواصل انثوى داخلى فقط ، لكن خارجيا مفيش اى نوع من التواصل الانثوى دا اطلاقا .

سماتها بقى :

١ - بتحب شعرها قصير ، او بتلمه بطريقة تخليه ميبانش طويل . ولو زهقها بتقصه وبتريح دماغها) بالنسبة لها المجهود المبذول فى الشعر حاجه overrated ملهاش اى تلاتين لازمة) . ولذلك معظمهم شعرهم قصير البنات دى .

٢- عصبية جدا ، خصوصا على الرجالة اللي بتشوفهم سطحيين وبيصنفو البنات على أساس مظاهرهم الانثوية . بس فى المجمال هى شخصية عصبية وبتميل لاستخدام العنف .

٣- بيحبو الهزار والضحك ، وده جزء من طبيعتهم الشخصية، بيحبو اللعب والهزار والغلاسة والمنافسات حتى فى الحاجات الذكورية زى (الكورة) .

٤- ليسهم رجولي، ولو مش رجولي بيكون بسيط جدا، بيحبو الجينزات الواسعة على عكس معظم البنات الى بتميل للضيقة علشان تحس بأنوثتها، البنات ال boyish بتميل انها تخفى سماتها الانثوية الخارجية دائما، وبتخاف حتى وزنها يزيد علشان سماتها الانثوية متزيدش او تظهر . ودايما دايما بتواجه مشكلة فى انها تحط (make up) ومش بتحبه اصلا . بيكون للضرورة القسوى فقط .

٥- عندها معايير عالية فى ' الارتباط ' ، لكن معايير قليلة جدا فى ' الصداقات ' : يعنى ممكن تصاحب وتبقى صديقة وفيه جدا لاي شخص هى شايفة انها محتاج (الصداقة) ووجودها هيفرق معاه ومعطاه جدا معاه ، لكن مش اى راجل بتقتنع ' برجولته ' بسهولة .

لانها فى الغالب بتشوف نفسها ' اكثر رجوله ' من الرجالة فى العموم .

٧- مبتحبش ترقص قدام الناس ، ولا حتى اصحابها البنات ، لكن لو حدها فى اوضتها هى ' رقاصة فى نفسها '



٦- طموحيين اجتماعيا وماديا جدا، وشغفهم بالحاجات الى بيحبوها مبيتغيرش ومش بيتأثر بدخول او خروج (اشخاص فى حياتهم) لانه تعلقهم بالاشخاص بالرغم من حبهم الشديد للغير مش بيخليهم ينهاروا لما يختفوا من حياتهم .

× ويمكن دى لعنة الرجالة الى بتحاول ترتبط بيهم، انهم مش بيظهرو علامات ضعف لو الرجل هددها انها هيسيبها، فى الغالب مش بيفرق معاها وبتقوله ' طز ' وبتكمل حياتها عادى .

ليه البنات ال boyish؟ يا بتكون (الرجاله هتريبل عليها؟) يا (بيخافو منها ومبيقر بوش منها اصلا) مفيش فى النص يا ابيض يا اسود .

لانه السمات المتناقضة بين الذكورة والانوثة فى البنت بتشد الرجل ' لا اراديا '

يعنى شخصية قوية ومظهرية ذكورية وفى نفس الوقت مهتمه بنفسها ولبسها حتى الذكورى وبرفيوم انثوى وصوت ناعم بيخليه لا اراديا يشوفها تحدى ويقتى عايز يسيطر على قوتها دى ويستكشف انوثتها الداخليه دى لوحده . (المزة دى تاعتى انا) .

لكن لو شيلنا اى (صوت ناعم او اهتمام بالمظهريات الانثويه ١٠٠ %) هتظهر ذكوريه ١٠٠٪ ودا بيخوف الرجالة منها . "لا ياعم دى مسترجلة" ومش هقدر عليها .

ليه البنات ال boyish اصلا بقو كدا؟

١- ضغوط مجتمعيه لكونها انثى ، فبالتالى بتشوف انه "السمات الذكورية اقوى" وعملية اكثر من السمات الانثوية وبتقمص الجانب دا .

٢- يا فائقه الانوثة" حرفيا فائقه الانوثة".معنى الكلمه وبالتالى اى نجاح عايزه تحققه بيرتبط بانوثتها او اى حد يشوفها ييقى بيعاكسها او عايز يرتبط بيها فبتزق بقى وبتتحول للشخصيه دى وبترتاح فيها .

٣- تعرضت للتحرش المستمر فى الطفولة (خصوصا لو من شخص من الاقارب) ولما كبرت بدأت تلوم نفسها وانوثتها انها هى السبب فى انه الشخص دا اتحرش بيها (ودى كارثة لوحدها) .



٤- انه الستايل لايف بتاع البنت الـ boyish اريح وسهل ، مفيش ميك اب ، مفيش شعر يتطلب ، مفيش الطرحه لازم تتكوى ، مفيش مش عارف ايه ومش عارف ايه . ولذلك هما اسرع ناس بتلبس وهى خارجة ولذلك هما أصدقاء مريحين جدا .

٥- بنت وسط اخوات ولاد كثير : النوعية دى يا بتكون قمة فى الانوثة ، وتلاقيها بنت انثويه لدرجه انها ' هبله ' وانوثتها مسيطره على كل حاجه فى حياتها واللون البينك عمانى ورب العرش نجانى يا بتكون ذكورية وبويش جدا علشان تتماشى مع الصراعات جوا البيت والخناقات الـ بتدخلها مع اخواتها . مفيش فى النص ايدا .

- " طب يا عويس كراجل بقى ازاي اتعامل مع البنت من النوعية دى ؟ "

١- استحمل الزعابيب الـ فى الاول، والشتايم والخناقات الـ هتعملها علشان هتفضلك بشده فى البدايه "لا اراديا منحها ارتاح فى فكره انها بتتحول مظهرها وبالتدريج داخلها لشخصيه ذكورية". وممكن تنهزق عادى بس استحمل دا .

٢- خاطب الجانب الانثوى الداخلى ، حتى لو متفاعلتش معاك انثويا، معظم الرجاله كائنات بتستعجل النتائج ، دى مش كذا اطلاقا ، حاول دايمًا تعاكسها او تخاطب الجانب الانثوى دا باستمرار . ومتوقعش منها سلوك انثوى ابدأ زى الصوت الناعم مش دايمًا موجود ، والشتيمة عادى منها هتعاملك كانها راجل فاهمك وعارف فى دماغك ايه .

٣- اكشن اكشن اكشن : البنات دى عمليه جداا وبتحب ' الافعال ' بحبك وعايذ اخذك فى حضنى وانى مراتى والجو دا رخيص فشخ بالنسبه لها وهتفضل تتريق عليك بسببه . لو فعلا بتحبها يبقى شوف ايه الاكشن الـ محتاجك تاخده ومن نفسك اعمله وتدرجيا هتثق فيك .

٤- متكلمهاش ابدأ بصيغه المذكر : بنوته لطيفه كذا كان الكل بيكلمها بصيغه المذكر باستمرار "انت، عايز، مش عارف) وهكذا وبالتدريج هى برضو لانها boyish كانت بتتكلم عن نفسها كذا، دايمًا بصيغه المذكر

٥- ارفض انها تلعب اى دور ذكورى فى علاقتكو : لا اراديا هى اتحولت لشخص بيتحمل المسؤولية وبيشتغل على نفسه وبيشتغل على انجازاته ييشتغل على حل مشاكله ومشاكل الآخرين وبالتالى لو دخلتو فى علاقة هى دايمًا هتلعب الدور الذكورى وهتميل ليه، انت دايمًا وضحلها انك بتحبها ومش عايزها تلعب غير دورها الانثوى ومتشيلش هموم فوق همومها او حتى تحلللك مشاكلك او تقصيلك مشاويرك والجو دا .

عاملها على انها انثى، lady تستحق الدلال والغزل والراحة وبالتدريج هي هتأخذك للعالم (ال pink بتاعها) ولو صبرت بقى هتشوف شخصيه "الراقصة فى نفسها" دى .

– البنت "الأم فى نفسها" الحنينه بزياده .. "الام المفقودة للرجالة"

دى بقى "اختصار للشخصيه ال extreme ارضائيه ، و extreme انبساطية"

يعنى شخصيه ابسط حاجه بتبسطها فى الحياه ، حتى لو حاجات هبلهضو هتبسطها.

وشخصيه ' ارضائيه ' جدااا ، يعنى بتستمد راحتها الشخصيه من راحه الى حوالها وانها تخليهم هما الى دايما مرتاحين وميسوتين .. ومن هنا بتبدأ رحلتها (الجميله اللطيفه) المريحه جدااا لكل الى حوالها وتبقى ام لكل اصحابها .

ويمكن للاسف الموضوع يقلب (العكس) دايما مع "الكراشات" الى بتعجب بيهم مش لانهم بيسيبوها مثلا او بيعدو عنها، لأ مطلقا اطلاقا بتاتا، دول بيحبوها برضو ويحبوها جدااا لكن بيعاملوها "كأمهم"

سماتها :

– قادرة على خلق جو "الراحة". بمجرد ما اى حد يقربها : البنت دى لا اراديا " وهى مش بتكون مدركه لدا اصلا" ما حد يقربها او يقعد حتى جنبها لا اراديا هو بنفسه بيلاقى نفسه بيحكى ويفضفض ويتكلم عن مخاوفه وعلى عكس "أغلبية البشر" الى مش هيهتمو يعرفو او يتفاعلى عاطفيا او معنويا معاها – لانه كل واحد فيه الى مكفيه – هي بتعرف تغذى الشعور دا وتخليه يتكلم عن (مخاوفه) اكثر ويشاركها اسراره الغير طبيعيه دى "حتى لو لمجرد المشاركة".

– بتسمع كويس جدااا : المهارة رقم واحد عندها ، مش بتسكت والسلام ، لأ بتعرف تخلى الى قدامها يتكلم ويطلع الى جواه وتسمعه بكل مشاعرها وترعل وتفرح معاها وحتى تفاصيل كلامه بتعيد الكلام فيه وبتخليه حتى يعيد المواضيع الى متضايق انه يشاركها مع حد ويطلعها من جواه بتعرف تسمع من كل ذره فى كيانها وفى قلبها .

– متواضعه لابتعد الحدود : بسيطه فى لبسها ، بسيطه فى تواضعها وحتى فى كلامها عن نفسها قليل بطبيعتها الى بتحب تسمع اكثر ، لكن حتى لو اتكلمت هتتكلم عن تواضعها وبساطتها وعن "مخاوفها" (ويمكن اعشق مخاوفها) فى الحياه هي الخوف دا × والى بالمناسبه



مش الكل هيعترف بيه وهو "خوفها انها متكونش رقم ١ فى حياه الاشخاص حوالها زى ما هما رقم ١ فى حياتها".

حتى لو لبسها براندات وافخمها هتلاحظوا انها هتتجنب تتكلم عنهم قدام حد هى شايفة انه - بسيط - ويمكن يزعله الكلام او يضايقه .

× موقف شخصى "مرة كانت بنوته كدا وكنا بندردش عن البرفيوم وانواعها فواحدة ' قليلة الذوق " قالت بكل فخر " انا بقرف من البرفيومز الى مش اوريجينال انا مش عارفة الناس بتحطهم ازاي دانا اقل برفيوم عندى بكذا وجايلى من كذا " قامت البنت ' الام " بعفويه لانها ادركت انه فى الشله ناس ايسط والكلام دا هيزعل بنت ما ويخليها تزعل قالتها "على فكره انا عندى برفيوم بعمله فى العتبه ب ٢٥ جنيه وريخته حلوة جدا وبجبه وبجب احطه فى خروجاتى المهمة كمان " ومعرش هل دا حقيقى ولا لا ، لكن احساسها العاطفى العالى خلاها تتجنب انها تزعل الى قدامها حتى لو مش هى الى غلطت " ام بقى " .

- بتدى شعور بالامان وبتهتم بزيادة بالشخص "لعب دور الام المفقودة" حنينه لا بعد الحدود بقى ، فى قسوه العالم الخارجى الى بيزداد قسوه كل يوم ، وكل ما الرجاله - خصوصا - ويمكن البنات هتستغرب النقطه دى لكن معظم الرجاله دلوقتى مفتقدين (الاحساس بالامان والحنان) لكن بيترعبو يعبرو عن احتياجهم دا . هى بقى - لا اراديا - بتخليهم يحسو انه طبيعى يعبرو احساسهم (بالحنان) الى هى بتفيضه دا ، وتدرجيا بيتعلقو بيها ودايما يبشعوا احساسهم ' بالامان والحنان " منها ويظهرو افتقادمهم للحنان عن طريق وجودها فى حياتهم . (بتكون أمهم المفقودة فى عالم المفروض يتخلصو من طفولتهم دى) ولكن القاعده بتقول - كل الرجاله اطفال - .

- بتبقى حريصه انه الى حوالها يقو (مبسوطين) ، حتى لو (هتاكلهم) وهتعلمهم أكل ، شخصيه معطاءه جدا ويمكن دى لعنتها فى الحياه بقى ، حتى لو حسنت انهم ممكن يقو جعانين ممكن تجيبهم (اكل) هههههه اعرف بنوته كدا (كانت بتجيبنا اكل بعد الامتحانات) وتيجى شتكى انه الكراش منفضلها ، قولتلها " انتى بتجيبه اكل !!! يخرّب بيت ما ناقص تتأكدى هو اخذ تطعيمة ولا لا يا هبله".



النسوانجي وسنينه

(نسوانجي البيت من بابه)

«أنا بحبك وهدخل البيت من بابه.. وهنتلك إني شاريكي وإنتي عارفه إنه محدش بيدخل البيت من بابه دلوقتي... بس في المقابل عايز منك شوية تنازلات»..

* وطبعاً كلنا عارفين أي نوع من التنازلات اللي بيطلبها..

(نسوانجية البيت من بابه) ابتدوا يلعبوا على نقطة ويستهدفوا ضحايا محددين بعناية..

– بنات في أوائل إلى منتصف العشرينات .

– طبقة اجتماعية ومادية أقل منه، ولو حاجة بسيطة ودي مهمة جداً (وهشرح بعدين).

– بنات كارهة حياتها العائلية، ومن ضغط العيلة عايزة تتجوز أي واحد وتخلع من البيت – بنات «بتعافر» في شغلها وحياتها وطموحها علشان ترتقي بمستواها الاجتماعي والمادي.. ومن هنا بتبدأ عملية الخداع بتاعته في إغرائها بوصوله لمستوى و حياة أفضل بكثير من اللي هي فيها لمجرد إنه هيكون معاها وتديله اللي هي عايزاه.

سيبكوا بقى من الكلام اللي فوق دا وخدوا الصدمة «النسوانجي» دا بيلف بطقم شبكة مبيتغيرش تقريباً..

وأعرف واحد نسوانجي قال لي: «أنا بس غيرت الخاتم كام مرة علشان البنوتة كانت قلبوطة»، إنما هو هو طقم الشبكة.. الشخص دا بيتعرف على البنت، وبعدين بيهرها بالمستوى اللي هو عايش فيه.

بيخرجها خروجات مبهرة.. بيكلمها كلام حلو .

بيقولها كل كلام في الدنيا يظمنها ليه.. ومش زي النسوانجية الباقيين بيطلب بقى «التجاوزات» اللي عايزها ويتجنب الكلام في ارتباط طويل الأمد أو عرض جواز أو خطوبة.

لأ، دا ذكي.. دا يقولها أنا بحبك وهنتلك دا، وفعلًا بيتقدم ويعمل خطوبة على الضيق



حرصاً منه) على عدم انتشار الموضوع بالطريقة التي تخليه يتفضح قدام الكل .
وبعد الخطوبة اللطيفة دي بيبدأ يطلب كل حاجة في الدنيا ممكن تطلب بقي .

مفيش خطوط حمراء، ومفيش أي موانع لأنه مرره: (أنا خطبتك أهو وأثبتلك إني بحبك، بس لحد الجواز الوقت هيطول) ويستخدم إيموجي عادل إمام (مش النهاردة عيد ميلادي.. فهاا بقي)

المضحك إنه زمان كنت شخصياً بقول إنه طالما اتقدم ودخل البيت من بابه يبقى مستحيل يبقى نسوانجي.. وكان المعيار إنه دخل البيت من بابه بيلغي فكرة إنه نسوانجي، لأنه النسوانجي بيهرب من الجواز أو الارتباط والالتزام وحتى الاعتراف بالحب .

لكن النسوانجي اللعين (دا) نسوانجي البيت من بابه) دا، ألقى حتى النقطة دي) الله يخربتكم يا بُعدا) فبقى حتى التقدم والخطوبة والتجهيز للجواز مش مقياس لإلغاء النسوانجي)... طب نعمل فيكم إيه بس حسبي الله ...
.، طب دي خطة الدخول بقي..

بيخلع إزاي بقي؟

بيخلع بعدة طرق بقي، يا خلاف مع أهلها بعد ما يوصل للي هو عاوزه.

يا بيبعد بطريقة غير مربرة ويقولها) الحب بينا اختفى) والجو دا .

يا نسوانجي أذكى بقي بياخذ أهله فعلاً في زيارة لأهلها) ولأنها من مستوى مادي أو اجتماعي أقل) فيقول للبت أهلي رافضينكو لأنكو ساكنين في المنطقة الفلانية أو باباكي شغال كذا، أو الهري المجتمعي دا.. وكأنه- يا مسكين- مغصوب على أمره..

اللي هو) وإنت لسه متفاجئ دلوقتي إنها ساكنة في المنطقة الفلانية يا ابن ال#%& يا %&!!
“ يلا ما علينا..

وأعرف نسوانجي مامته وافقت وقالتله:» إنت كل شوية تودينا في حته شكل يا ابن ال@%#%
إنت.. طب أنا موافقة بقي وهكلم أمها وأبوها وأقولهم أنا اللي هتكفل بكل حاجة في الجواز، ووريني بقي هتروح تضحك على بنات الناس تاني إزاي؟ وكان الشخص اللطيف دا بغض





نسوانجي . . أنا حرامي بس تايب)

(أنا كان ماضيا أسود وزبالة، وكنت منحرف، لكن خلاص ربنا هداني على إيديكي)..

النسوانجي هو الرجل الوحيد اللي معندوش مشكلة إنه لما يتنزق بيعترف إنه «كان نسوانجي»، وركزوا على (كان) دي... له بقی بيجعل كدا؟ مش المفروض إنه النسوانجي يتضايق من فكرة (الاعتراف بالخطأ).. وإنه الطبيعي إنه البنات «تنفر» من الرجل النسوانجي صاحب العلاقات المتعددة والجسدية في السابق؟

في الحقيقة -دا اللي المفروض يحصل يعني- لكن خيلنا نرجع بالزمن لورا شوية.

في فيلم عربي أبيض وأسود لعين ما بيطهر شخص نسوانجي وكان خاربها لكن ظهر البطل وهو في قمة عربدته وبمجرد ما شاف البنات حبتها وارتبط بيها وهوب مرة واحدة تاب على إيديها ومباش يعمل أي حاجة غير إنه يسعددها ويسطها.. يمكن دي من أسوأ الصور النمطية اللعينة في دماغ البنات دلوقتي عن الرجل النسوانجي.. (إنه هيتوب على إيديها).

كمان البعد السيكولوجي المرتبط ارتباط وثيق بالجانب الغريزي عند المرأة أنها بتشعر بنشوة إنها «أنتي مميزة» بطريقة ما إنه خلته «هذا العرييد اللعين» يتوب ويتحول على إيديها.. وطبعًا الجانب النفسي في إنه المرأة- لا شعوريا- بتنجذب ناحية الرجل اللي بتحسه صاحب قيمة وليه تأثير على أخريات في حياته.. فبالتالي الشعور بأنها امتلكت شخص ليه «تأثير» أو مرغوب من البنات الثانية بيخليها حاسة بالتميز أكثر وأكثر.

القفا المحترم بقی.. و(ساحوني على كلمة قفا)

إنه الرجل النسوانجي هرمونيا مستحيل (أو شبه مستحيل) يتغير أو يتوب على إيدك أو إيد بنت خالته أو صاحبته اللي «فشخته» في مراهقته.. * أو ووبس أنا قولت فشخ تاني.. ساحوني بقی.

لأنه هرمونيا) وبدون ما أتكلم في أسماء هرمونات ومواد كيميائية مكلكعة في دماغ الرجل) لكن هرمونات الإثارة الطبيعية اللي هي المفروض بتفرز بنسب طبيعية عند الرجل الطبيعي



العادي علشان يقدر يحس» بالتجاذب» أو الرغبة ناحية الطرف الآخر .

لنفترض مثلاً شخص مدمن ولسه في بدايات إدمانه وحب التجربة بييجرب حاجات بسيطة .. دوس قليلة ممكن تخليه مسووط وتخليه في أسعد لحظات حياته وكيميائية جسمه بيقدر يتفاعل مع المادة الدخيلة أو الدوس دي بطريقة قوية .. بعد فترة من الإدمان جسمه مبقاش يتفاعل مع الدوس البسيطة دي .. وبقى محتاج دوس أعلى وأقوى علشان يحس بنفس الإحساس الأول بدرجات الإثارة والنشوة أو «الدماغ» اللي محتاج يعملها مع المخدر اللي من النوع دا .

كذلك نفس الدرجة من «الإدمان» على العلاقات والنساء بالنسبة للنسوانجي .. بيحتاج كل فترة دوس أعلى علشان يعرف يدخل على نفس الدرجة من «الراحة» أو المتعة أو الإحساس بالإثارة اللي المفروض الرجل الطبيعي يحسه مع شريكة واحدة طبيعية بتكفيه وبزيادة ويستكشف نفسه معاها .

بتبدأ علاقات النسوانجي من سن صغير في الغالب، أحياناً يقابل حالات نسوانجية بيبدأ بعد الـ ٣٠ ودي نادرة نسبياً بعد رفاهية مادية مثلاً أو مستوى اجتماعي قدر يوصله في الفترة دي .. لكن في الغالب بتبدأ من سن الـ ١٨ وربط «مستوى رجولته» وإحساسه بذاته بدرجات وقوة العلاقات اللي بيدخلها .. فمن علاقاته بصاحبه اللي في سنه .. للي أكبر منه .. لخطيبته صديقة لبعدين مرحلة الوحش بقى ودي بيوصلوها في السن ٣٠ فما فوق إنه يستهدف (المتزوجات) .

ليه النسوانجي المخضرم يفضل «المتزوجة» يا عويس؟ السؤال دا لطيف أوي وبسمعه كثير .. علشان نقطتين) درجة الإحساس بالمخاطرة) العالية في علاقته بزوجة متزوجة وكمان درجة الإحساس بالأمان لأنها متزوجة فالـ **abusing** بيكون أعلى وكمان درجات الأمان أعلى .

لكن حتى النسوانجي المخضرم اللي بيستهدف المتزوجات، لازم كل فترة يرجع تاني لواحدة أصغر منه وأكثر جمالاً وأكثر إثارة وتكون فائقة الجمال علشان يقدر يحس بمستويات قدراته على جذب الجنس الآخر الجميل اللطيف اللي تقدر تقوله لأ في عينه دي ...

«هل في وجهة نظرك تهترمي راجل مكانش عنده مشكلة يعبر عن إعجابه بواحدة هو مدرك كويس إنها متزوجة؟» ... بأي منطق تهترمي حتى راجل زي دا .. خصوصاً لما بيعرف إنه الزوجة دي بينها وبين زوجها مشاكل .. وخصوصاً ببقى لو الزوج «مهمل» وزوجة عندها احتياجات عاطفية عالية ومش حاصلها أي درجة من درجات الإشباع .. دي ببقى الفريسة



المثالية «الزبونة» على رأي المثل بالنسبة له .

لأنه» النسوانجي» عارف ومدرك أن الطريق للي هو عاوزه «مش جسدي»، لكن عاطفي هيوصله للجانب الجسدي تدريجيًا .

فأبوس إيد اللي خلفوكي يا شيخة، لو سمعتي جملة: «أنا ربنا هدايني على إيدك وقررت أبطل كل بلاويا السودا بعد ما اتسحرت بجمال عين اللي خلفوكي وشعرك اللي ملوش مثيل» يبقى اعتبري دي علامة خطر وخطأ وكارثة تخليكي تقويله: «شكرًا وفلة عليك أوي وعلى عيونك وسعلى كدا»، واتكلي على الله وصدقيني مهما كان القرار مؤلم دلوقتي لكنه أكثر درجات الراحة في المستقبل بعدين .

(نوقف لحظة هنا بقى) كثير بقبال السؤال اللطيف دا.. هو يعني النسوانجي مبيتغيرش أبدًا؟

أحب أقولك أيتها البنت اللطيفة إنه من خلال خبرتي اللي امتدت سنين في مجال الاستشارات الزوجية والعاطفية عمري في حياتي ما قابلت غير نسوانجي واحد تاب.. ودا بعد ما جاله ED وال ED دي حاجة مش لطيفة خالص يعني.. ومعناها erection dysfunction – عجز جنسي.. يعني حتى التوبة كمان مبقتش اختيارية

لكن النموذج الوحيد اللي ممكن تكملني معاه هو النسوانجي اللي «تاب» اختاريا وتاب قبل وجودك في حياته أصلاً وإنتي وجودك ساعده وكملة وحسسه بدرجات إشباع نفسي وعاطفي أولاً وبعدين بقى حبك وحببتوا بعض .

يعني لما تسمعي منه جملة: «بصي، أنا كدا كدا كنت متغير ومتغيرتش علشانك ولا حاجة»، على الرغم إنه دي مش بنفس درجة رومانسية الجملة في أول البوست لكن أهي دي جملة تطمني جدا.. لأنه هنا مش بيشغلك أبدًا.. ولا عايز يديكي إحساس وهمي» بالتميز» لكنه فعلاً بيقولك بطريقة مميزة أكثر صدقاً إنه اتغير علشان نفسه.. وناوي يكمل معاكي علاقة طبيعية زي مخاليق ربنا يعني .

طب.. وهل إنت شوفت حد كدا يا عويس» نسوانجي» وعرف يدخل علاقة طبيعية زي مخاليق ربنا؟ لأ والله، وبعد السنين دي أبقي كذاب لو قولت آه.. كلهم لمواخذة شمال (على رأي الممثلة اللي طلعت مع مكى)..



- هو النسوانجي ممكن يتجوز واحدة أقل منه في المستوى «الاجتماعي»؟

سؤال لطيف من الإنبوكس.. وقبل ما أجاب عايز أوضح معلومة عن «النسوانجي» لطيفة أوي. النسوانجي أكثر حد بيعرف يتظاهر بالاحترام والمساواة لكنه من جواه هو أكثر شخص «عنصري» وقدره في نظره للأقل منه، لكن استغلاله ليهم بطريقة بترجعه بمنفعة ما أو استغلال بتخليه يظهر إنه» محب «ومتسامح وطيب وخلق <

لكن خيلنا نتكلم بالمنطق، والعقل لثواني.. (إيه اللي هيخلي واحد زي ده ارتبط وعمل علاقات مع طوب الأرض يقرر إنه يكمل بقية حياته معاكي إنتي بالذات؟! مع الاحتفاظ بمعلومة إنه أصلاً عنصري واستغلال.. يعني ببساطة يقدر يتجوز واحدة من مستوى أعلى اجتماعياً علشان -يرتقي- أو علشان باباها يرقيه في شغله ووظيفته مثلاً... أو حتى مصالح بيزنيس ممكن تنجز لو ارتبط بنت فلان الفلاني.

ثانياً: طب ليه بيجير لما بيلاقيك عايزه تشوفي حياتك وترتبطي بحد عايز يكمل معاكي أو شخص من مستواكي؟ لأنه بيبصلك على إنك «ملكية خاصة» أو، آسف في اللفظ محظية) أو «عاهرة شخصية» ليه هو.. فمعندوش مشكلة يكمل معاكي في دور العشيقة اللي بتعمله اللي هو عاوزه مقابل شوية «امتيازات مادية» ممكن يديهالك، أو حتى درجات من التطمين ليكي إنه «عمره ما هيسيبك وبيحبك وعاوز يتجوزك في أسرع وقت»، لكن محتاج وقت يفكر ويدبر ويخطط، أو حتى علشان يعرف يقول إيه «لبابا وماما» وعيلته اللي هتنزل لمستواكي.. وفي الحقيقة دا مش أكثر من تكنيك لكسب الوقت علشان يضمن لنفسه فرصة أكبر في «استغلالك» ولحد ما يحس إنك بئستي فيجهز نفسه لضحية جديدة..

عمرى ما هنسى بنوثة مسكينة استغلها نسوانجي وفي الآخر لما عرفت خبر إنه هيتجوز قريب بواحدة تانية قالها: «إيه يعني، أنا ببحبك برضو وهفضل معاكي، لو بتحبيني فعلا مش هيبقى عندك مشكلة إنه حبنا يكمل حتى لو إنتي اتجوزتي بعدي».. اللي هو «المنطق اتحرر» أقسم بالله.. really بجد إنت تقصد اللي بتقوله دا.

اللي هو بيفكرك بالنكتة بتاعة: (حبيبي إوعدني إنك هتفضل تحبني للأبد؟ فقالها: لو جوزك معندوش مشكلة)..



مكافأة تتساوى مع المجهود المبذول دا، إيه أكثر حاجة يا عقل يا باطن بتحب تكافئ نفسك بيها؟» الأكلللال، طول عمرنا بنكافئ نفسنا بالأكل وهو ووب يرجع ياكل تاني احتفالاً بالوزن اللي خسره، وهوب يرجع وزنه يزيد تاني، وهكذا.. ولحد ما يتعلم طريقة يكافئ بيها نفسه جديدة يبقى هيفضل في الدايلاما دي كثير .

كذلك الشخص النسوانجي، ال cycle عنده ماشية إزاي؟ ماشية كدا» أنا بتعب في الشغل جدااا ولازم أنجح ماديا < فرصة أكبر في الاهتمام بمظهر أحسن < علشان أقدر أجذب بنات من مستوى أفضل أو أعلى أو أغرب < هرمون السيروتونين يبهركني ناحية أنثى أصعب كل مرة < فكافئ نفسي بالأشئ المعينة دي على مجهودي في الشغل < فبالتالي أنا محتاج أبذل مجهود أكبر في شغلي ولازم أنجح أكثر ماديا.. وهكذا بتتحول» الستات» بطريقة مباشرة إنها تكون هي المكافأة بتاعته على مجهوده في الشغل.. دا السبب الأول .

السبب الثاني هو» مادي يحت»، يعني هل البنات أو النوعية من البنات اللي بيستهدفهم النسوانجي هيعجبوا بيه فقط لشخصيته الجميلة وطيبة قلبه؟ في الحقيقة آه في بنات بتكون» طيبة» جدااا وهيلة * مش عايز أقول مغفلة.. بيخدعها فقط بطيبة قلبه وتمثيله عليها كويس وممكن تصرف عليه هيا كمان * وأنا بشوف دا كثير، لكن في الغالب النسوانجي لما بيستهدف بنات من طبقات مادية واجتماعية ما أعلى لازم يكون محقق» مستوى أمان مادي» ورفاهية تسمح له إنه يعرف يلفت نظرها ليه حتى، ودا اللي بيخليه يهتم بعريته كويس جدااا، ويهتم بلبسه أكثر من اهتمامه بعفش بيته واحتياجات زوجته المسكينة، لو كان متزوج..

لأنه مش هيروح للبت دي يقولها» تعالي نخرج في المكان الفلاني ونركب المترو، أو تاكسي أو الميكروباص الفلاني».. ببساطة هي هترفضه لو حسته مش مستقر ماديا لأنه النوعية دي زي ما قولت: (بتهتم جدا بالمستوى المادي اللي هيضمنلها إنه يقدر يليب احتياجاتها المادية بعدين)، أو لطول فترة العلاقة الموقته بينهم .

فهو مش بيشتغل علشان ال self fulfillment إشباع الذات زي البني آدم الطبيعي.. أو حتى علشان دا شغفه، أو علشان يحقق مستويات مادية واجتماعية لأهله وأسرتة أحسن ويضمنلهم شوية رفاهية في حياتهم وتعليم أحسن ومستقبل أحسن!! لا، هو بيشتغل وبيتعب نفسه في الشغل علشان سبب تاني خالص) النجاح المادي هيديني فرصة أكبر وقدرة أعلى في إني أقدر



٣- النسوانجي بيكون حريص) بكل أنواع النسوانجية بقى) إنه يظهر جانب معين في حياته وشخصيته للضحية الجديدة بتاعته وبالتالي قدرته إنه (يظهر) الجانب المعين دا (سواء) إيمانه المزيف) أو (لعبه دور الضحية) أو إنه (حياته مليانة جميلات من كل حذب و صوب (وبالتالي بيحولك لواحدة من)) نسوانه .

فإحساس المرأة إنها امتلكت شيء مميز وجديد وصعب ومرغوب من نساء أخريات بيحسها بالتميز .

فوق كل دا في سؤال اتسألته مؤخراً من شخصية لطيفة: (إيه اللي يخلي بنت قوية فوق التلاتين أو حتى أنتى مطلقة وشافت من الحياة أشكال وألوان يا عويس يوقعها راجل نسوانجي حقير ملوش أي لازمة في الحياة؟)

فعلاً إيه اللي يخلي واحدة» ملو هدمها» وقوية كدا وياما اترمي تحتها رجالة وتفكسلهم وتقع في نسوانجي «نملة» كدا ملوش أي لازمة في الحياة؟

الموضوع متعلق بشقين في تركيب الشخصية نفسها بتاعه «البت دي» أو الأنتى (السبع رجالة في نفسها دي؟)

١- أنتى مسترجلة طول حياتها.. ودا نموذج بنشوفه أحياناً ومش منتشر.. بس أنا هنا بأتكلم عن اللي عدوا ال٣٠ وال ٣٥ كمان ولا عمرها ارتبطت غير مرة أو اتنين رسمي وهي صغيرة كدا والمشروع فشل، فكرهت الفكرة وركزت في شغلها وطموحها وحياتها وبالتدريج وصلت لنقطة إن تواصلها مع صفاتها، الرجولية « أقوى بمراحل من تواصلها مع سماتها الأنتوية الداخلية* حتى لو هي سوبر أنتى من الخارج أو جسديا ملهاش علاقة بإحساسها الأنتوي نفسه.

البتن المسكينة دي مجرد ما بيصطادها النسوانجي (نسوانجي البت بمية راجل دا) بيحب النوعية دي من البنات أووووي بالنسبة له إدمان، وهوب بيبدأ بقى يحسها بأنوثتها وينفض التراب عن أنوثتها اللي محتفية بقالها سنين وتربت وعصلجت كمان..

ولأنه ذكي يبصر كويس أوي على ردود أفعالها الذكورية اللي بيعملها مخها كوسيلة (defense mechanism) أو طرق دفاعية يحافظ بيها على (رجولتها) اللي بقاله سنين بينها..



فالبت دي مثلا مش هتفرح بلمسات الايد السريعة أو يعديها الطريق.. أو إنه يفتحلها باب العربية.. أو الأحضان وحتى لما بيحاول يتحرش بيها) وأعرف حد لطيف كدا) اترزع قلم محترم ابن ناس .

لأنها بالنسبة لها دي حاجة مؤرقة جدااا ومرعبة إنها تنحط في خانة أو في زون «الأنتى» من أول وجديد .

بس في الغالب النسوانجي * أو في معظم الحالات اللي قابلتها شخصيا.. بيزهقوا لأنها بتكون بالظبط زي بنت لسه بتعرف يعني إيه أنوثة ومش بتخليه (ينول) أي حاجة ليها قيمة بالنسبة له.

لأنه مجرد «الحضن» لو بريء وعفيف وشريف وخفيف ولطيف كدا مش بيفرق معاه..

الراجل بيكون طموح بزيادة عن اللزوم بعيد عنكوا .

النموذج التاني (الأنتى اللي فضل عقلها الباطن يتغذى لسنين طويلة إنها مش مرغوبة)

غالبًا بتكون «مطلقة» أو في علاقة زوجية مضطربة .

الأنتى دي بتكون معندهاش مشكلها في تواصلها الأنتوي، لكن عاشت طول حياتها مع أم أو أب أو خالة أو جدة بتتريق على جسمها أو لون بشرتها أو طول شعرها وتقولها: «فلانة بنت خالتك» أحلى منك.. والجو الرخيص دا * ولذلك أنا بنصح الأمهات دايماً إنهم مينسوش مدح الصفات الأنتوية لبناتهم الصغنتين...

البنت دي لو اتجوزت وجوزها مشى على نفس المنوال ونفس الطريقة في إنه يتريق على أنوثتها أو جسمها أو صفاتها الأنتوية وإنه مش شايفها... مجرد ما بيصطادها (نسوانجي) وتدريجا يشبع أنوثتها بالمدح والغزل والتحرش والكلام الحلو أو حتى إنه يشجعها تمارس رياضة أو تغير ستايلها في اللبس... وهكذا بيكون) الربط بين وجوده وبين إحساسها بأنوثتها)..

ولأنها بتكون لسه جديدة في اكتشافها لأنوثتها دي... بتتعلق بالشخص دا تعلق مرضي أحياناً... وأي راجل تاني مش بيكون) كافي) ليها لأنه مفيش راجل هيكون) بالدقة) دي في إنه يشبع إحساسها بأنوثتها .

في الغالب بيكون النسوانجي دا) (abuser – استغلالي) جدااا سواء جسدياً أو مادياً أو عاطفياً..



وأحياناً يكون الثلاثة عادي..

وبنسمع هنا السؤال الأزلي من صاحبتها المقربة (هي ليه مش عارفه تتخلص منه يا عويس؟) لأنه مش مجرد «شخص» أو «إنسان» في عقلها الباطن .

هو شخص بعد سنين بتحس إنها «مرفوضة» أو متستحقش جالها يشبعلها إحساسها الأثوي اللي لسه بتتعرف عليه.. وبالتالي التخلص منه مش بالسهولة المتوقعة زي ما تقطع علاقتها مع شخص آخر .



(ما بعد النسوانجي)

(العلاقات السامة)

٥ علامات تدل أنك في «علاقة سامة»؟

يعني إيه مبدئياً «علاقة سامة».. عارفين الناس اللي بتاكل «الضفدع» «بتطبخها إزاي؟ لو مسكت ضفدعة وحطيتها في مية مغلية وسخنة مرة واحدة، إيه اللي هيحصل؟ هتنط بسرعة وتهرب بأسرع وقت ممكن، ومش هتستحمل تقعد في المية المغلية دي.. ولذلك الناس اللي بيطبخوها بيحطوها الأول في مية عادية وبعدين تدريجياً واحدة واحدة يسخنوا المية لحد ما تغلي والصفدعة تتطبخ وتموت بدون أدنى مقاومة حتى!

ليه؟ لأن الضفدعة مش بتعرف تركز غير في التغيرات الحرارية الكبيرة حوالها، لكن التغير التدريجي واحدة واحدة هو اللي بيأثر وبيخلي الضفدعة متدركش حتى إنها بتتقتل بالبطيء إلا لما تموت.. كذلك الناس اللي في العلاقات السامة، مش بتدرك إيه الخطورة بتاعتها إلا لما تبقى على وشك الانهيار أو الدخول في دوامة اضطرابات نفسية لأنه العلاقات السامة مش بيكون مكتوب عليها قبل الدخول فيها «احذر دي علاقة سامة»، ومش بيدرك خطورتها إلا بعد فوات الأوان .

١- أول علامة هي «الشخصية النرجسية»، في الحقيقة الشخصية النرجسية من ألغن وأكثر الشخصيات المستهلكة والمدمرة نفسياً سواء كانت صداقة أو ارتباط أو حتى زواج،



لأنه سمات الشخصية النرجسية تتعارض تمامًا مع مفهوم العلاقات الصحية والتواصل الطبيعي بين طرفين عندهم احتياجات عاطفية والمفروض يحصلها إشباع ليها.. فبالتالي أول ما تلاقي علامات الشخصية النرجسية موجودة في الطرف الآخر، يبقى اعرف إنه حان الوقت إنك تاخذ بالك من قراراتك العاطفية مستقبلاً، ومن سماتها: عشق الذات، الأنانية، عدم التفاعل العاطفي، يعني مش بيتأثر عاطفياً بأحوال الآخرين أو يهتم لمشاعرهم، ولا حتى أقرب الناس ليه)..

٢- هيلغي «عيلتك وأصحابك»: دي البداية دائماً لأي علاقة غير صحية ومجرد التسخينة للعلاقة السامة، لأنه العلاقة السامة الطرف الآخر فيها يحاول («يسيطر») ويوجه تفكيرك ويستنفذك تدريجياً، فبالتالي هيكون عداوات مع الأشخاص القريين منك والأشخاص أصحاب التأثير عليك أو حتى الأشخاص إلى بيدعموكي وقت ضعفك واحتياجك، فدي علامة خطر و كارثية جداً .

٣- التغيير التغيير التغيير، لازم يكون عندك إنتي فقط، التغيير كلمة هتكون على لسانه» لازم تغيري للأحسن»، إنتي لازم تغيري الحثة دي فيكي» لازم تخلي تفكيرك يتغير للأحسن، وعلى أدا ما الكلام نفسه معسول وحلو لكنه مش بيفترض أبداً إنه التغيير لازم بمشي في الجانبين وهو كمان لازم يتغير زيك.. لكن بالإقناع والثبات على موقفه والإصرار إنه دائماً الأخطاء مش بتكون من عنده وبتيجي من عندك بس، هيخلي كل التغيرات تيجي من عندك إنتي فقط.. *كمان علامة بشوفها دائماً في البنات اللي بترتبط بشخص بيحول العلاقة لعلاقة سامة إنه يفرض التغيير حسب حالته المزاجية، يعني مثال يوم يكلمك في إنك تغيري صفة معينة «والصفة دي شخصية فيكي ملهاش أي تأثير عليه»، لكن لمجرد إنها مش عاجباه يعمل كدا، هوب تاني يوم يقولك إنه الصفة دي أحلى صفة فيكي وإوعي تغييرها!! فالتضارب والتناقض دا اللي مبني على تقلبات الحالات المزاجية.. بيدل إنه ده علاقة خطر .

٤- إليسي نضارتي للحياة: زي ما الضفدعة بتتسلق في ميه مغلية بتزيد درجة حرارتها تدريجياً، كمان هو هيلغي «فرديتك واختلافك وتميزك» وهيقى حريص إنك تشوفي العالم كله من نضارته ومنظوره هو عن الحياة.. فطبعاً إوعي تسمححي بدا لأنه من هنا هتبدأ مرحلة (الغليان).



٥- التهديد المستمر: في الغالب البنات يتحسس إنه في حاجة غلط، وكمان أصدقائها المقربين يستشعروا إنه في حاجة غلط بتحصل معاها، فيبتدوا يحذروها من التغييرات البطيئة لكن مؤثرة في شخصيتها دي.. أو حتى إنه البنت نفسها تستشعر التخوف دا من إنه العلاقة ابتدت تكون مش مريحة ليها وإنها بتفقد كثير منها كل فترة، عارفين إيه رد فعله لما بيحس الطرف الآخر سواء بدأ بيهدد بالانفصال على طول) مفيش عتاب، مفيش نقاشات، مفيش كلام)، مرة واحدة التهديد بالانفصال وطبعًا لأنه الانفصال هيكون شيء مش منطقي هنا، فالبنت أو الولد هنا بيبتدوا يضطربوا تدريجيا ويوصلوا لمرحلة يعرفوا فيها إنهم أخطأوا لما عبروا عن تساؤلاتهم المنطقية ومع الوقت ومرار الوقت بيكتشفوا إنهم انتقلوا من علاقة «سامة» لـ (زواج سام)!!!

- on and off relationship

أكثر نوعية من «العلاقات» بتجهد البنت عاطفيًا وبتستهلكها وبتخليها «تكره» أحيانًا فكرة الارتباط نفسها ...

لأنه ببساطة دي أكثر» نوعية» علاقات بتخليها تتصادم مع أبسط وأول احتياج «رئيسي» لعقلها الباطن قبل ما تكون حتى أي «روابط عاطفية» مع الطرف الآخر .

كلام مجعلص يا عويس قول كلام نفهمه!!

- حاضر، خلوني أسأل كل البنات اللي هنا سؤال بسيط أوي وخذوا وقتكوا تفكروا فيه» إيه أول شعور بتدوروا عليه في الطرف الآخر قبل ما تبتدوا تدخلوا أي علاقة عاطفية»؟

فكري شوية في السؤال دا، في اللحظة اللي قبل ما تقولي لنفسك، أوبس أنا شكلي هحبه «في إحساس أو فكرة ما بتطلع في دماغك إنتي محتاجه تعريفها عن الطرف الآخر، إيه هيا؟ ببساطة وعند الكل وهي أول» احتياج «رئيسي بيدور عليه العقل الباطن في أي علاقة بين» طرفين «حتى لو علاقة صداقة أو بيزنيس هو» الإحساس» بالأمان ...

وهو نفس الدافع اللي بيخلي العصفور بيني عشه؟ ويخلي كل حيوان يدور على مكان ينام فيه ثابت آخر الليل بعد يوم مجهد وشاق» الإحساس» بالأمان ..

تقدر تدخل في بيزنيس مع حد حاسس معاها «بالتهديد»؟



طب هل ينفع تبدأ صداقتك مع حد حاسس إنه» هيغدر» بيك؟! طبعًا لا لأنه دا هيتصادم مع أول احتياج رئيسي لعقلك الباطن وهو» الإحساس بالأمان» ومن هنا بتكون خطورة العلاقات الـ on and off وباختصار هي العلاقات اللي فيها طرف ما بيظهر ويختفي مرة واحدة في حياتكوا العاطفية..

يعني يوم حلوين أووووي وتعيشوا وكأنكوا في قصة خيالية من عالم ديزني.. وأسبوع تاني متعرفش هو فين، أو بيقابلك وبيعاملك برود، وإنت متعرفش السبب لمعاملته دي.. باختصار عقلك الباطن بيوقف» متنح» ومش عارف المفروض هو يعمل إيه بالطبط.. هل يكون» روابط عاطفية» بناء على كل موقف حلو حصل معاه في اليوم الواو الخرافي اللي بتقضوه كل شهر دا؟

ولا يبعد لأنه مش عارف المفروض هل دا:» طرف أنا حاسس معاه بالأمان؟ ولا مش حاسس معاه بالأمان؟!.. ومن هنا بتبدأ الكارثة بالنسبة للبنات الجميلة اللطيفة الكيوتة العسولة..

(إنه عقل البنات الباطن بيحس برغبة أعلى في الطرف اللي ميحسش معاه بالأمان المطلق) لأنه البنات * على عكس ما توقعوا بتزهق أسرع من الرجل في إشباع إحساس الأمان .

يعني البنت بتحب تحس بالأمان المطلق وبعدين هو با شوية جنون، بتحب تدخل في شوية صراعات كدا تخلي العلاقة «حية»، لكن تقوى روابطها بالطرف الآخر * البنات أحيانًا بيكون عقلها غريب أنا عارف .

كمان الرجالة كدا، لكن هي عند الرجل مرتبطة أكثر، بمدى ثقته بنفسه وإحساسه بالأمان الداخلي...

العلاقات اللي من النوعية دي، مجهدة مش بس لعاطفته البنت، كمان مجهدة لعقلها ومجهدة لقدرتها على توطيد وخلق أي ذكريات عاطفية في المستقبل مع الطرف الآخر دا، وعلى الرغم إنها في الغالب بتتعلق أكثر بالطرف دا في العلاقة المجهدة دي، لكن برضو بتلاقي نفسها» مستهلكة» عاطفيا وواقفة في حالة (سكون عاطفي) ومش عارفه هل المفروض تكون» روابط جديدة ولا تتجنب دا خوفًا من» ألم عاطفي» مستقبلي عقلها الباطن بيتوقعه زي ما» اتوجع»



قبل كدا في علاقاتها السابقة ..

الحل إيه يا عويس؟

الحل ببساطة هو إنك كبنت تطلبي «توضيح» لاختفاء الطرف الآخر دا من حياتك العاطفية مرة واحدة أو حتى معاملتك) وكأنك غريب) وهو لسه كان مخليكي طيارة في السما من كام يوم .

اطلبي التوضيح دا لأنه هيو ضحك هل هو عنده security issues - مشاكل في الإحساس بالأمان وانعدام الثقة) ولا هو ببساطة شخص عنده commitment issues - مشاكل في الالتزام)، وبالتالي إنتي مجرد حد بيحب يخرج ويتفسح ويقضي وقت لطيف معاه بدون ما يتطور دا لعلاقة جديدة يقدر يلتزم بيها مستقبلا؟

الفكرة إنك متفضيلش كثير في ال on and off دي .

لأنه كل ما هتاخدي وقت أطول وتجنبي «الصدام» المؤقت اللي هتطلبه دا، هتلاقي نفسك بتعلقلي أكثر، وهتلاقي نفسك «بتستهلكي» عاطفتك ومشاعرك وببساطة عاطفتك وعقلك مش هيقدروا يجاروكي وقت كثير في محالواتك لخداع نفسك .. وهيتوقف عن تطوير أي روابط عاطفية مستقبلية.. وفي أسوأ الأحوال مش هيكون روابط عاطفية مع أي حد تاني لفترة طويلة (لأنك كل اللي هتكوني عملتيه) هو إنك سييتيه يحس بالألم لوحده، وختليه يسجل» ذكريات مشوشة» مش عارف يحطها في خانة «الألم» ولا الفرحة في العلاقة دي.. ودا هياخد وقت طويل في عملية ال recovery <

فنصيحتي ليكي من أخ وصديق.. وحد قابل كثير في «حالات اضطراب عاطفي»

إوعي تتجنبي أو تأجلي «الصدام» أو السؤال المنطقي اللي من أبسط حقوقك تسأل به دا ..

(علاقات إعادة الربط العاطفي Rebounding)

خطورة ال Rebound أو) علاقات إعادة الربط العاطفي»

يعني إيه الكلمة دي؟ يعني ببساطة الناس اللي بتفشكل أو بتنتهي علاقتها وبعدين هوب تقوم ترتبط بأول شخص يقابلها علشان تقدر بيه تنسى الشخص الأول .

في الغالب بتكون الضحايا هنا هي «البنت» بحكم شغلي بشوف إنه البنات هي أكثر شخص



بيتأذى» من Rebound له بقی؟

لسببین: الأول: إنه البنت عاطفية أكثر من الولد بكثير.. وبالتالي لما بتشوف صديقها المقرب أو حتى شخص تعرفه خارج من علاقة عاطفية ومنهار ومتألم وموجوع بتعمل اللي تقدر تعمله علشان تساعده يخرج من الحالة العاطفية دي وتعمله فعلا كل اللي بتقدر عليه..

وهو في حالة» الضعف «البنت -لا وعيا- عقلها الباطن بتستفز فيه جانبها «الأومومي» وحنيتها وطيبة قلبها، هو كمان بيقدر يعتمد عليها كويس وبيغازل أنوثتها وممكن مع شوية مدح في حنيتها وأنوثتها عقلها الباطن معترفش يفرق إنه دا شعور شخصي) ويسجله على إنه «ذكرى عاطفية» عندها فهو ب دبل كيك تلاقي البنت عقلها بدأ يكون «روابط عاطفية مع الشخص دا» فمع أقرب اقتراح منه إنهم يرتبطوا بترتبط بيه.

السبب الثاني: إنه في سلوك الرجالة إنه لما بيدخل علاقة قوية ولفترة طويلة * خصوصاً لو جواز وبتنتهي بأي طريقة ما، بيتسرع في الارتباط بأخرى * قبل ما يتعافى حتى من الأولى كنوع من «رد الاعتبار الرجولي» وإيضاحاً للمجتمع ولنفسه وللأولى إنه) مش فارق معاه وإنه قادر على الانتقال) بسرعة من علاقة لعلاقة.

ليه Rebound خطر جدا عاطفياً؟

لأنه الشخص اللي بيدخله أولاً بيكون لسه عقله الباطن مقدرش يرفع المشاعر العاطفية) اللي عاشها على «قواعد منطقية» ويسجلها في (الذاكرة العاطفية - emotional memory - الذاكرة العاطفية) عنده على أنها» ذكريات»...

يعني باختصار مش بيكون تعافى ولا عنده القدرة إنه لما يفتكر الشخص دا جسمه وهرموناته وعاطفته تتفاعل مع المشاعر وكأنها لسه حاصلة..

لأنك لو لقيت شخص * حتى لو بعد سنين كل ما يفتكر شخص ما كان معاه في علاقة وكل ما يتكلم في الموضوع تيجي سيرته ولقيته (فسولوجيا وسيكولوجيا) بيتفاعل مع الذكريات وكأنها لسه حاصلة إمبارح فيعيط أو يبكي أو تجيله رغبات في إنه يكلمه تاني يبقى اعرف إنه الشخص دا لسه «مدخلش في مرحلة التعافي» حتى لو أخذ سنين.

لأنه العقل الباطن بعد الصدمات العاطفية كوسيلة إنه يحمي نفسه من «الألم العاطفي» بيحاول



يعمل» حيل دفاعية» مؤقتة لحد ما يبدأ يقنع نفسه» منطقياً» بعيوب العلاقة دي ومميزات إنها انتهت ودي كلها عملية التعافي .

الشخص بقى اللي بيكون لسه خارج من علاقة بتكون كل مشاعر» مضطربة أصلاً» وبيكون مش قادر يفرق حتى بين مشاعر مختلطة زي الفرق بين) الغضب والكراهة) (الحب والإعجاب) (الشهوة والراحة) (الندم والحزن) (عقله بيكون مش عارف حتى يفصل المشاعر دي مع بعض في كل الذكريات اللي سجلها مع الشخص اللي قبله.

ففي الغالب بيكون الشخص الثاني اللي دخل معاه في علاقة Rebound مباشرة بيكون مرحلة «مؤقتة» وتتلاقوه قدر يكون) روابط عاطفية) سريعة جداً معاه، يعني اللي كان بياخده عاطفياً قبل كدا في شهرين ثلاثة تلاقوه أحده هنا في (أسبوع) وشهور قليلة جداً وتتلاقوا الولد مثلاً عرض على البنت» ارتباط «أو خطوبة أو جواز .

وبرضو معدل التسارع العاطفي دا بيفضل مستمر بعد الارتباط فتلاقي الولد بدأ يطلب حاجات المفروض متتطلبش دلوقتي أصلاً، أو حتى بيضغط على الزوجة الجديدة إنها تعمل كل اللي كانت بتعمله الزوجة السابقة، وهكذا .

ومع الوقت بيحصل حاجة من اتنين .

١- يا بياخد وقته في التعافي وهو في العلاقة الثانية، وبتكمل وبتنجح عادي لكن بيعبد فترة عنها) وأنا دائماً بأنصح البنت هنا إنها تسيبه بيعد وقت ما يحس إنه محتاج بيعد.. (والبعد دا عقله الباطن هو اللي بيختاره علشان يبدأ (get over - يتخلص) من كل" الروابط العاطفية بالأولى" ويسجلها بقى أخيراً كمجرد (ذكريات عاطفية) فيبحتاج يعمل دا بدون أي شوشرة عاطفية من البنت الثانية وبيرجعها طبيعي وعادي وهتلاحظوا هنا إنه يبدأ" يستكشفها" بعد الجواز أو بعد الارتباط بفترة كمان.. ويبدأ يركز على كل حاجة جميلة فيها .

٢- يا مش يعرف يتعافي صحيا في وجود البنت الثانية، ومخه يدخله في سيل مقارنات غير طبيعية وغير صحية بينهم وكمان لو ظهرت بنت تالته (ولأنه متوتر عاطفياً ومضطرب) يبدأ يلاقي نفسه بيرتاح لها هي كمان ويبدأ يعرض نفسه لمشاعر جديدة



وغريبة مع كل بنت جديدة تظهر في حياته، والمضحك إنه لو كانت علاقته بالأولى قوية وعاطفيا كانوا مميزين والعلاقة انتهت، يبدأ عقله "ينتقم" من الأولى في الثانية. وعلشان يعمل دا مراتح) لأنه العقل الباطن بيستريح أكثر في دور الضحية) فتلاقوا الراجل هنا بدأ يشوف "سمات مشتركة" بين الثانية والأولى ..

فتسمعوا مثلا جملة: «مانتوا كلكلوا زي بعض ...» أو «إنتي برضوا بتعملي زيها بالظبط وبتوجعيني».... إلخ بقى ويرر لنفسه «أذيتها» والانتقام منها كمان .
طب الصح إيه يا عويس؟

الصح إنك تكون قريب من الشخص وتساعدته يتعافى، لكن ترفضى أي اقتراح بالدخول في علاقة لحد ما تلاقيه قدر يركز في حاجات جديدة في حياته، ويعود لحياته وشخصيته الطبيعية .. هنا هيكون اقتراحه صحي ومنطقي وطبيعي .. وكم ان هتلاحظي دا لما تلاقيه ابتدا يتكلم «طبيعي» جدا عن الأولى، بدون أي انفعال عاطفي عليها حتى.

وهتلاقيه أخذ وقته لوحده كدا وبعد عنك كصديقة فترة ورجعلك لوحده برضو .. هنا اعرفي إنه بدأ يتعافى، وهنا تقدري تدخل في علاقة صحية معاه.



تكتيكات عاطفية)

– الانتقال بين مرحلة «الحب» ومرحلة «التعلق» عند المخطوبين.. إزاي الانتقال بيكون أحياناً خطر ومقلق للعقل الباطن لكلا الطرفين) بس هنا الرجل أكثر؟

الأول يعني إيه «حب»؟.. الحب سيكولوجيا هو إشباع لاحتياجات عاطفية وفسولوجية وترجمة لشوية «دوافع» عاطفية ونفسية للشخص دا.. ويرضو جزء منه رئيسي هو ترجمة «للاحتياجات الجسدية» لكلا الطرفين.. هو ببساطة ميكس هرمونات كدا بيضرب في نافوخ النبي آدم «دوبامين على أو كسيتوسين على سيروتونين على إيميمينفرين..»....

التعلق بقى.. هو ربط الطرف الآخر بإشباع» احتياج» قوي جداً في عقل الطرف الآخر الباطن، بمعنى إنه ممكن ميكونش في إشباع أصلاً لأي احتياجات تانية، بس كون في إشباع، للاحتياج الرئيسي، دا الشخص بيبدأ مرحلة تعلق بالطرف اللي بيعمله إشباع هنا.. وهنتكلم النهاردة عن» التعلق الآمن» لأنه التعلق نوعين، نوع صحي (تعلق آمن) ونوع غير صحي (تعلق غير آمن) واتكلمنا فيه قبل كدا في پوست تفصيلي.

طب.. هل التعلق بالضرورة شيء سيء يا؟

أبداً.. لأنه أصلاً الانتقال الطبيعي والنمو الصحي لأي علاقة بين طرفين إنها يكون فيها جزء كبير» من الإشباع» للاحتياج الباطني للعقل دا في كل طرف .

مثلاً) احتياج الأمان)، وهو احتياج رئيسي عند كل البشر، لو اتنين لسه «بيستكشفا بعض»، ولسه معروفش بعض، هياخدوا وقت علشان يوصل كل طرف أي إشباع احتياجات الطرف الآخر، وهوب) وبعد الخطوبة أو قبل الخطوبة حتى) بنلاقي إنه في طرف ما حصله إشباع بدرجة كبيرة أوي للاحتياج دا) الأمان)..

ولو اتكلمنا عن) احتياج الأمان) دا شيء رائع عند البنت * لأن المرأة مبتعرفش تكمل في علاقة مش حاسة فيها بالأمان..

لكن عند الولاد.... خيلنا نقول مش دائماً، لكن بيحصل إنه بيتحول لكارثة أحياناً .



إزاي بقى يا عويس، مش المفروض دي حاجة تفرحه وتبسطة؟

أقولك نظرياً آه.. لكن خلونا نغوص أعمق في دماغ الرجل، في عقله الباطن ونتخيلها مع بعض..

(المثال): شاب عمره ما حسّ بالأمان في حياته وهو طفل، ولا لقي حد يوجهه نفسياً إنه يشبع الاحتياج دا بطريقة منوعة وصحية ما)، فعقله الباطن علشان يشبع الاحتياج دا * لأنه لازم لازم يحصله إشباع وإلا ينهار .

بيدور على طريقة وأقرب وأسهل طريقة إنه يشبع الاحتياج دا..

لو لقي إنه الأمان في «الروحانيات» فبتتشكل شخصيته في مراهقته بأنه يكون شخص متدين..

لو لقي إنه «الأمان» في الصحة والجسم، فبيتحول لشخص دائماً رياضي.

ولو لقي إنه «الأمان» في المادة بيتحول لبيزنيس مان أو رجل أعمال وشخص بيعرف دائماً يعمل فلوس .

ولو لقي «الأمان» في الشلة والصحاب بيتحول لشخص اجتماعي وبيحب كل الناس .

طب لحد هنا مفيش مشكلة، الشاب اللطيف دا بيقابل بنوثة لطيفة وبيحبها ويخطبها عادي مفيش مشكلة، وبيجي قبل الفرح بكام شهر ألقىه مرة واحدة عايز يفشكل والبنوثة جبالى بتعيط..

أقوله طيب خرينا نبدأ.. وبعد كلام كثير، يلاقوني بضحك ضحكة خفيفة..

بتضحك ليه يا عويس؟ أقوله: «أصل الأسباب اللي إنت قولتها دي كلها تافهة جدا ومش منطقية»..

أقولك أنا على السبب بقى، بس متتصدمش؟

قول يا عم؟

إنت بدأت تكرهها لأن عقلك الباطن بدأ يحس «بفقدان السيطرة» لما لقي أنه «احتياج الأمان» بدأ يحصله إشباع من حد تاني غير «الحاجة» اللي كنت متعود عليها.. وإحساسه بالتهديد إنه بقى في «شيء» (خارجي دا خوِّفه جدا، لدرجة إنه بدأ يخدع نفسه ويكوّن ويطوّر) حيلة دفاعية defense mechanism (ضد البنوثة الجميلة اللي جنبك دي، بتحبك وكل ما



بتباعد عنها بتخاف منك أكثر وتوجعها أكثر وأنت مش عارف إنت بتعمل كدا ليه .

صمت مطلق في المكان لفترة كدا .

طب نعالج دا إزاي؟

لأن الاتنين شبه بعض جدا، والاتنين المفروض يكون ليهم ردود أفعال مختلفة:

التعلق بيحي بعد الارتباط بفترة طويلة نسبياً، لكن) الاحتياج للحب (بيبدأ في أول العلاقة وفي بدايات التعارف .

١- التعلق بيظهر فيه الشخص إنه «يقدر يتخلي» عن الطرف الآخر، لكن (الاحتياج للحب) هتسمعوا كلمة «أنا مقدرش أعيش من غيرك كتير».

٢- في التعلق دا الراجل في الغالب بيتحول لشخص نكدي وكتيب ومش متحمس لأي حاجة في مستقبل العلاقة، في (الاحتياج للحب) بيتنط من الفرحة في كل حاجة بتعملها .

٣- في بدايات مرحلة التعلق هتلاحظي عليه إنه قبل ميعاد الجواز أو الخطوبة ابتدا (يبعد عنك) مؤقتاً ويشوف بنات تانية، أو حتى يبعد مؤقتاً ويهتم أوي بشغله ويشوف هل يقدر يعيش من غيرك عادي ولا هيتعب نفسياً وفي الآخر هيرجعلك.. في الاحتياج للحب هيلزق فيكي حرفياً .

٤- في التعلق العقل الباطن بيزود أوي (الإيجو) أوي عند الراجل * كنوع من إيهام نفسه إنه المسيطر على نفسه وإنه مش متأثر في العلاقة.. لكن في (الاحتياج للحب) هتتلغي الإيجو تدريجياً عند الراجل..

ببساطة «التعلق» هو مرحلة متقدمة من «الاحتياج للحب» وبعدين الحب.. وبعدين التعلق .

طب المفروض أعمل إيه في الموقف دالما أشوف العلامات دي من خطيبي؟

- (الصح في مراحل) الاحتياج للحب) وبدايات تكوين روابط عاطفية إنك تبقى معاه ودائماً تسانديه، لكن لو لقيتته في مراحل «تعلقه» بيعمل اللي قولته فوق دا.. يبقى الأصح إنك) تبعد عنه بطريقة مفاجئة)، ويحس بتهديد إنه ممكن يخسرك مرة واحدة..



والتكثيف دا ميتكرش * وإلا عقله الباطن هيطور) دفاع (عاطفي ناحيتك ويقول لعقله الواعي: «شوفت ما هي كل مرة بتفكسلنا وبتمشي وبتسينا موجودين، أنا مش لاعب معاكي بمشاعري تاني)..

هو مرة واحدة كدا ابعدني عنه واقفلي موبايلك واختفي من حياته بدون أي مبررات ولو في بينكو ميعاد متروحيهوش ..
شوفي رد فعله هيكون إيه ..

هيتحول للنقيض، وهيجري وراكي وهيحاول يعرف إنتي عملتي كدا ليه .. وهنا عايزك ترددي رد واحد ثابت تحافظي عليه: قوليله: «أنا عملت كدا لما حسيتك بتخرجنني من حياتك ومبقتش حاسة بالأمان في وجودك» .. بطريقة ما الجملة دي لما جربتها مع ناس كتير بشوف إنه العقل الباطن ابتدا يستجيب بطريقة معاكسة لما كان مخططه ..

باختصار وعلشان أتجنب الكلام السيكولوجي المجعلص، «العقل الباطن بيعمل خداع للخداع» بتاعه من أول وجديد لمجرد إنه كلمة «عدم الأمان» عملتله triggering للاحتياج الرئيسي بتاعه .. الموضوع عامل زي ما تكون في رمضان وقبل المغرب في الحر والعطش حد يقول قدامك: «أنا هروح أورش الزرع ميه علشان ينتعش» لا إراديا عقلك هيتخيل الميه الباردة المنعشة اللي نازله على الزرع دا وهيتمنى إنه هو اللي يكون مكان الزرع دا .

لو لقيتني إنه تقبل عادي اختفائك وعدم وجودك .. يبقى حاجة من اتنين: يا لسه مدخلش في المرحلة دي ولسه قدامه وقت علشان يتعلق بيكي، يا أصلا هو عامل إشباع للاحتياجات بتاعته بطريقة صحية متنوعة في جوانب كتيرة في حياته فهضايق لكن مش هينفع عليك لما تختفي وهيتوقع إنك اختفيتي علشان حاجة تخصك وهيحترم دا ويبعد عنك وقتها لحد ما ترجعيله .

(عبر لها بحبها)

(مراتك بعد الثلاثين أقرب لطفولتها من العشرينات) همسة .

(٧) - حاجات ركز عليهم كزوج مع زوجتك بعد الثلاثين :

في مرحلة الثلاثين للزوجة، الدنيا بتبقى أوسع شوية في الجوانب العاطفية والنفسية للأنتي، وبالتالي حاجات كتير بتتغير في تفكيرها وفي حياتها وفي حتى طريقة حكمها ونظرتها

لحاجات كثير بتحصل جواها، بتكون أكثر انفتاحاً على متغيرات كثير حوالهاها.. احتياجاتها العاطفية والنفسية بتزيد وبتتوسع مش بتقل .

بتكون أكثر استقرارا عاطفيا ونفسيا، لكن برضو بتكون أكثر احتياجا لحاجات كثير منك كزوج وكعاطفة وحتى التغير في الاحتياجات الجسدية برضو هتجدد وتختلف .

١- مساحة أكبر من« احترام الفردية الشخصية ليها» : يعني مساحة أكبر من احترام رغبتها في إنها تحقق حاجة متعلقة بيها هي، حتى لو تظهر حاجة جديدة أو مش منطقية أو عايزه تجرب تعمل مشروع أو تدرس حاجة أو تعمل فكرة في دماغها.. الوقت دا خصوصا بعد مرحلة استقرار نسبي بعد تحبظات العشرينات المرأة بتكون أكثر انفتاحا إنها تكتشف نفسها.. فاعى تصادم دا فيها وتحاول تحافظ على روتين العشرينات لأنك هتخسرهما في الآخر .

٢- ديرة أصدقائها هتتغير أو هتتوسع: دا طبيعي جدا في المرحلة دي، المرأة حتى حكمها على الآخرين بيتغير، فلو كان ليها نظرة في العشرينات على صفات معينة في البنات بأحكام مش منطقية زي إنه البنت اللي تعمل كدا تبقى وحشة وشمال ومينفعش أصحابها، لأ في مرحلة الثلاثينات بيكون عندها تقبل واسع للاختلاف دا وهتلاقها بدأت تكوّن علاقات مع ناس كانت في العشرينات مستحييل تتعرف عليهم حتى، فدا مش معناه إنها هتبقى زيهي. ببساطة هي بس اتعلمت) تقبلهم) مش أكثر .

٣- احتياجاتها العاطفية بتتوسع جدا: بتطور بطريقة أكثر تعقيداً من مرحلة العشرينات اللي كان فيها مجرد الكلام الحلو بيفرحها ويبخليها مبسوطة، في مرحلة الثلاثينات الإشباع العاطفي هيكون ليه طرق تانية زي (مشروع مشترك بينكو) نقاش عميق فلسفي في البلكونة، اختلاف على قضية ما وبتحترموا اختلاف بعض فيها .

٤- اخرجوا أكثر: سينما، بحر، تمشية على الكورنيش.. بس على الأقل خصصوا وقت ثابت ولو نص ساعة يوميا أو يوم كامل أسبوعيا تخرجوا بره جو البيت والترتيبات المنزلية والتنظيف والأطفال والجو دا كله.. افصلوا ولو نص ساعة حتى لو هتتمشوا حوالين البيت وترجعوا تاني.. التمشية البسيطة دي هتعمل« ترابط» عاطفي أعمق مما تتخيلوا .



٥- مارسوا نشاط رياضي أسبوعياً مع بعض: زي ما زيارة العائلات شيء مقدس عند البعض، وزى ما مينفعش يوم يعدي من غير) أكل وشرب ونوم) يبقى كمان الرياضة والأنشطة الجسدية المشتركة زي ماراثونات أو ركوب عجل أو إيفنتات فيها أنشطة جسدية.. دي مش بس هتخليكوا مهتمين بصحتكوا أكثر.. دي هتحوّل ارتباطكوا لشيء مريح لعقلكوا ولجسمكوا بسبب إفراز هرمونات كتيرة متعلقة بالحب وبالرياضة.

٦- الحُضن) سواء كان بريء أو غير بريء: لكن على عكس الشائع المرأة في الثلاثينات بتحتاج الأحضان بشكل أكبر من مرحلة العشرينات، الحُضن هو الشيء الوحيد اللي يرجعها للحظات)) أنوثتها الحقيقية)) وإحساسها بالأمان في أحضان راجل بتشارك معاه الحياة.. حتى مجرد الـ cuddling وإنتوا بتتفرجوا على فيلم مع بعض بيفرق معاه كثير .

٧- تحرش أكثر، اتحرش بزيادة: الثلاثينات مرحلة مخيفة عند بعض الزوجات، فكرة إنها خرجت من العشرينات ومتجهة للأربعينات بيخليها دائماً خايفة إنها هتفقد جزء كبير من أنوثتها، وعلى الرغم إنه أنوثتها أصلاً بتبتدي بعد الثلاثينات وتبدأ المتعة الحقيقية بأنوثتها المكتملة في الوقت دا.. لكن دائماً دائماً هتحتاج إنك كزوج)) تحرش تحرش لفظي)) أو تحرش جسدي بقى دي حاجة بتاعتكوا.. بس المهم إوعى تنسى تحسسها إنها أكثر)) الإناث ((جمالاً وإثارة شوفتها في حياتك.. لأنه دا مش بس هيخليها واثقة في أنوثتها أكثر ويخليها تشع أنوثة بزيادة، كمان هي بما أنها)) كبرت وفهمت)) هتعرف تكافئك كويس، ومحدث يسألني هتكافئه إزاي، لأنه في رجالة بتحب الأكل عادي يعني .

٨- حسسها دائماً بالأمان، بص المرأة مبتعرفش عقلها الباطن يكون أي مشاعر عاطفية ناحية أي شخص في الدنيا إلا لما يحس بدرجة أمان معينة.. وكل ما زاد قرب الشخص منها كل ما احتاج عقلها الباطن درجة أمان أعلى.. فبالتالي لو أنت هتكون شريك حياتها العاطفي يبقى لازم درجة أمان عالية جداً.. (والأمان بالمناسبة مش بس مادي وإنك تقدر تغطي الاحتياجات الأساسية عندها)، كمان الأمان العاطفي واللفظي زي جمل هادية بتقولها: ((إنتي حب حياتي اللي عمري ما حسيتيه قبل كدا)) أو ((نفسى أقضي طول عمري في حضنك دائماً))، ولو متجوزين استغل فرصة إنها في حضنك في مرة وقولها: ((نفسى أقضي بقية اليوم في حضنك كدا)) مع ابتسامة هادية وقبلة خفيفة على خدها هتبقى فرحانة طول اليوم وهتحس معاك بالأمان .



جملة «أنا بدعمك» أو «أنا جنبك مهما حصل» هتخلي عقلها الباطن يشيل أي تخوفات منك للأبد .

٩- عاكسها على طول: أيوه، زي ما بقولك كدا.. حتى لو لقيتها اتضايقت، لكن المعاكسة والغزل حتى لو كان مبالغ فيه وقليل الأدب ومش متوافقة معاه، وحتى لو اتضايقت منك بسببه وطلبت إنك متكرروش تاني.. لكن دائماً دائماً هيبسطها لأنه الجزء دا في عقلها الباطن إنها تحس» بأنها مرغوبة» هيخليها دائماً أنتويا منشكحة.

١٠- ناديها بأسماء اخترعها لها أنت وتكون خاصة بيكوا إنتوا بس.. أسامي أو مصطلحات أو أي حاجة مجنونة تناديها بيها وتكون أنت الوحيد اللي بتناديها بالاسم دا مهما كان شكله غريب أو مختلف أو حتى اسم شخصية كرتونية حتى .

١١- تواصل تواصل تواصل: العلاقات العاطفية مبنية على مفهوم التواصل خليها تتكلم خليها تفضفض.. خليها تحكي اللي مخوفها.. خليها تقول أي حاجة غريبة أو مجنونة تيجي في دماغها.. المرأة بتميل إنها تكون روابط عاطفية قوية جدا جدا ناحية الرجل اللي بيخليها تتكلم عن نفسها أو عن حياتها وعن مشاعرها ناحية الحاجة اللي قدامها أو الموقف اللي بتمر بيه في اللحظة دي.. بدل ما تقول (إنتي إيه اللي خلاكي عملتي كدا؟) قولها: (إيه الشعور اللي خلاكي تاخدي موقف قوي زي دا؟) خليها تتكلم عن مشاعرها.. لا إراديا عقلها الباطن هيخليها تحبك أكثر ويكون روابط عاطفية أكثر .

١٢- اعمل أحياناً عكس اللي بتقولها لك: بس مش باستمرار، لكن المرأة بتخاف من الراجل اللي بيعمل كل اللي بيتطلب منه.. (لا إراديا عقلها الباطن يشوفه أقل رجولة)، فخليك ذكي في النقطة دي ما بين إنك تظهر إنك» عنيد» وما بين إنك تظهر «فرديتك الشخصية» وقدرتك إنك تاخذ موقف حتى لو ضد اللي حواليك .

١٣- فاجئها واكسر روتينها بحاجة مجنونة: زيارة لشغلها، اعملها أكلة بتحبها، هدية من غير مناسبة، احترف قدرتك على إنك تكسر، روتينها» بدون ما تستأذنها وتخليها دائماً فرحانة ومبسوطة».. دي حاجة هتخليها دائماً فرحانة ومشبعة من وجودك في حياتها .

١٤- خلي العلاقة تنمو: العلاقات اللي مش بتنمو بتعفن» هل من الطبيعي إنه اتنين يفضلوا يحبوا بعض ١٠ سنين بدون ارتباط؟ هل هتبقى دي علاقة صحية؟ أبداً. ليه؟ لأنه



العقل الباطن دائماً بيدور على النمو في كل حاجة بتحصل في حياته حتى لو زرعت زرعة مش بتطلع كل يوم ورقة جديدة ومش بتنمو مخك هيزهق منها وهيخليك تهملها.. فبالتالي كمان علاقتكوا لازم تنمو في الخطوة الجاية في حياتكوا العاطفية؟ مثلاً مرتبطين يبقى تخططوا للخطوبة.. والفرح ولو مخطوبين يبقى الأولاد والشقة وحتى الديكور يشن.. حتى لو هتاخذوا baby steps كل يوم ناحية نمو علاقتكوا.. لكن دائماً خلوها تنمو) لأنه العقل الباطن لو محسش بالنمو لفترة بيبدأ يخدع العقل الواعي في عملية معقدة اسمها deception كنوع من أنواع الخداع تمهيداً إنه يضخم العيوب في الطرف الآخر ويربطها بمشاعر مؤلمة في مكان) الذاكرة العاطفية (تمهيداً إنه يفشل العلاقة.. يعني العقل الباطن بيخدع نفسه في اللحظة دي في موضوع معقد كدا)...

١٥- أظهر احترامك وحبك ليها قدام الناس: حبك ليها واحترامك مش بس كفاية ليها، كمان احترامك ليها قدام الناس) بيديني مكائتي قدام الناس يا عويس ودا بيخليني أحبه جدا) الجملة دي سمعتها من زوجة بتعشق زوجها اللي دائماً بينهم خلافات، وكانت دي واحدة من أسرار حبها ليه.. فديماً أظهر احترامك وخليك جنتل جداً معها قدام الناس .

١٦- خليها تطاردك من وقت للتاني الرجالة هو المطارد الرئيسي في العلاقات، لكن أحياناً المرأة عقلها الباطن بيحاول يطارد ويبحب يطارد من وقت للتاني الشخص اللي هي مرتبطة بيه.. (والغيرة هي واحدة من طرق عقل الباطن للمرأة للتعبير عن المطاردة)، فخليها تغير بس بطريقة لطيفة من وقت للتاني. أو في تكتيك تاني هو إنك كل فترة تبعد عنها بطريقة مش منطقية وتتحجج إنك مشغول في موضوع مهم ومتعرفهاش إيه هو لمدة يومين كحد أقصى وبعدين هوب تجيبيلها هدية بتحبها أول ما تحسها ابتدت تتوتر وتقلق .

(تكتيكات الجنس الناعم)

اتكلمنا في الجزئين السابقين عن «أهمية» المطاردة عند الرجل وإشباع غريزة «السيطرة» و اتكلمنا عن أهمية تأثيرهم على إشباع احتياجات العقل الباطن للرجل في علاقته بالبنات .

طب إزاي نبقى الرجل على «الاحتياج للمطاردة» و«السيطرة» باستمرار؟

دي شوية تكتيكات تقدري تجربيهم منفصلين، أو مع بعض، لكن مينفعش تجربيهم كلهم مرة

واحدة على الرجل المسكين لأنه» هيروح» في داهية.. وأنا حذرت أهو..

١- اربكيه بإشارات متناقضة: دي تنفع للي لسه في بدايات الارتباط أو الإعجاب، متنفّس للمتزوجين * وإلا هيفتكر إنك بتخونيه.. فركزي أبوس إيدك < : يعني إيه إشارات متناقضة؟ يعني مثلاً تقوليله في يوم» تعرف إنك أكثر حد بحس معاه بالأمان» وتاني يوم» أنت وفلان أكثر اتنين بحسهم قريين مني، إخوانتي كدا..» (وهكذا بقى في إشاراتك مبيقاش عارف إنه في مكانة مميزة وخاصة عندك.. وهل هو منفرد بدا ولا في حد بيشاركة؟

٢- زقططي من الفرحة بدون سبب منطقي مرة واحدة: هيري من السعادة والجنون في مرة ما، ودا كمان ينفع للمتزوجين جدا، خليه في يوم يرجع الشقة يلاقكي فرحانة وميسوطة بدون أي سبب منطقي أو وجيه، وخليكي حريصة إنه ميعرفش السبب، لأنه أصلاً مش موجود :

٣- احكيه قصة «ومتكلميهاش»: ودي كان تكنيك شهرزاد مع شهریار، إنه في كل يوم قصة مش بتخلص، كمان إنتي» احكيه على موضوع مهم أو حاجة مؤثرة في حياتك» ومتكلميهاش أبداً .

٤- خدي رأيه واعملي عكسه: تنفع للكل وبرضو المتزوجين والمخطوبين . ” بيبي.. إيه رأيك ألبس الطرحة النيبتي ولا الزرقاء؟» أو حتى تاخدي رأيه في أي طقم أو لون العربية أو ديكوريشن في البيت، ومتعمليهوش.. اعملي عكسه لو حبيتي.. دي حاجة مستغزة جدا ليه، ومش هيبقي فاهم إنتي عملتي كدا ليه!!!! وهو المطلوب إثباته إنه مبيقاش فاهم أو يقدر يحتويكي بعقله.

٥- اقلبي السؤال عليه دائماً، خليه يتكلم عن نفسه: دي للمخطوبين والمرتبطين في بدايات الارتباط أكثر: يعني لو سألك: إنتي بتحبي أي نوع من المزيكا مثلاً، ولا بتحبي تسمعي لمين؟ قوليله: «أنا بحب فلان، إنت بتحبه مين؟ هيقولك: «بحب فلان»، قوليله ومين تاني مثلاً؟ وخليه يتكلم على نفسه أكثر..) التكنيك دا أنا بأستخدمه وبعلمه للجنسين لأنه في اللاوعي عند الرجل والمرأة العقل بيرتاح لما يعرف إنه اتكلم عن نفسه».. بس لسه عنده فضول» يعرف عن الطرف الآخر لما بيلاقي نفسه اتكلم بزيادة عن نفسه»..



من أسألكوا

إجابة لأكثر الأسئلة اللي يقابلها شيوغاً.

السؤال الأول:

عندي سؤال ملح جداً.. مش لاقى حد يجاوبني عليه.. أرجوك جاوبني هنا أو نزل بوست
عشان الناس تستفيد.. براحتك!!

النسوانجي ده بيفكر إزاي؟ يعني مش قادرة أفهم إزاي إزاي إزاي إزاي إزاي واحد يسبب مراته
النضيفة الشريفة ويروح لواحدة هو عارف ومتأكد إنها بتعمل علاقات مع رجالة غيره، ويمكن
في نفس اليوم كمان.. لا، ويقعد يتحايل عليها إنها ما تكلمش حد غيره وسوري يعني يتحايل
عليها إنها ما تعملش علاقة مع حد غيره.. إيه القرف ده.. الناس دي بتفكر إزاي؟ يعني ما
بيخافوش من ربنا ولا من الأمراض.. طيب كرامتهم راحت فين؟

معلش محدش هيقدر يجاوبني عالسؤال ده غير راجل، وكمان فاهم في السيكلوجي زي
حضرتك كده.. بجدل لو جاوبتني عالسؤال ده بيقا حليتي لغز كبير وبيقا كتر ألف خيرك..
شكراً مُقدماً!!!

– سؤال محتاج إجابة طويلة، لكن هحاول أختصر الأسباب على أد ما أقدر، وافتكروا إن دي
أسباب، لكن مش مبررات أبداً للخيانة الجسدية..

مفيش حاجة اسمها مبرر للخيانة أو –خونتك غضب عني– لأن محدش مسك مسدس فوق
راسه وقاله يخون يعني.

لكن قبل ما أبداً محتاج أعرفكوا يعني إيه نسوانجي «النسوانجي» هو اللي بيعمل علاقات جسدية
مع نساء متعددة..

مش زي اللي بتاع– البنات اللي بيحب لمة البنات حواليه) هو أقل من النسوانجي مرتبة)، لكن
مش في حقارته.

أو مش زي محب– النساء ودا طبعي في أي راجل إنه يحب البنات» دي حاجة غريزية فطرية



يعني...))

لكن الرجل مكتمل الرجولة بتلاقي حوالبه جميلات كثير، لكن «مركز» في حياته وشغله ونجاحه وطموحه، ومهما كتروا حوالبه مش بيتغير ولا بيستغل أو بيأذي أي واحدة منهم سواء ماديا أو عاطفيا أو جسديا .

النسوانجي بيكون في الغالب نسوانجي قبل الجواز، وبيحاول يقلل علاقاته بعد الجواز لكن -صعب- يقطعها بسبب إنه اتعود يوصل هرمون السيروتونين عنده لمستوى عالي من الإثارة بسبب تغيره المستمر للنساء اللي بيدخل معاهم في العلاقات دي، فالتنوع الشديد والمغامرة اللي بيلاقيها في العلاقة دي مش بيلاقيها في علاقته بزوجته، لكن مبيحاولش يخسرهما أبداً،* لأنه مدرك إنها نضيفه أو عفيفة زي ما بتقولي في سؤالك* ..

علاقات النسوانجي بالنساء دول بتكون حيوانية بحتة، علاقة جسدية مفهياش أي تواصل عاطفي أو روحاني بينهم .

هي (متعة مشتركة) لتلبية احتياج غريزي بدائي عند كل طرف ..* في الغالب السيدات بتكون أعقد في النقطة دي لكن هشرحها بعدين دي) .

- في رجالة نسوانجية للاحتياج النفسي، ولأن معظم النسوانجية بيكونوا عندهم احتياجات نفسية في المقام الأول، فتلاقي النوع دا مش همه الجنس أد ما همه (الهاله) اللي حوالبين العلاقة الحميمية بأخريات نفسها أو لأنه يثبت لنفسه إنه لسه قادر على جذب الإناث ليه خصوصاً في (عمر ال ٤٠) (تلاقيه بيدور على بنات في العشرينات وخلافه) ..

Self secure issues أو مشاكل في الإحساس بالأمان الداخلي بيكونوا حملوه من طفولتهم .. أثناء التربية مع أب قاسي أو أسرة مفككة أو شخصية ضعيفة ذكورية مضطهدة في شغلها من رئيسها أو حياتها من أب أو عم أو شخصية ما متسلطة وأحياناً بتكون الأم نفسها السبب في خلق فقدان الإحساس بالأمان دا عند النسوانجي وهو لسه طفل ..

مبيخافوش من «ربنا» دي محتاجة حد شرعي يتكلم فيها، لكن من الشق النفسي إحساسهم بالروحانيات بيكون قليل لأن النسوانجي مؤمن بالمادة والسلطة والقوة والنفوذ أكثر ما مؤمن بالأخلاقيات والمبادئ) وإلا مكانش هيبقى نسوانجي) ..



هقولك موقف مرة حصل قدامي من واحد نسوانجي عرض على بنت شديدة الاحترام إنه يعزمها في مكان ما فخم كدا، وأي بنت تمنى حد يعزمها في المكان دا، لكن البنت رفضت فأنا قولت هيسيبها بقى، لكن تعرفي عمل إيه، أصر إنها يوصلها بعربيته في طريقه وقالها: « طالما رفضتي العزومة يبقى على الأقل سيبيني أو صللك »

البنت ركبت ورا، مركبتش جنبه (ومع إن دي تعتبر إهانة لأنه مش الشوفير بتاعها)، لكن هو فرح جدا، وسألته بعدها بكام يوم) « ليه أصرت إنك توصلها حتى لما ركبت ورا » قالي يا عويس النهاردة ركبت ورا بكره هتركب قدام هي مسألة وقت مش أكثر .

استغربت من عقليته الحقيرة والمريضة اللي بتلعب على التنازلات البسيطة دي تدريجيًا لحد ما يوصل للي هو عايزه .

ولذلك دومًا نصيحتي لأي بنت لما تعرفي إن دا نسوانجي أجري بكل سرعة من قدامه واهربي واكسي راحة بالك وجنبي نفسك أمراض نفسية كتير وانهيارات وعاياط مش هتخلصي منه .

السؤال الثاني:

«ليه الرجالة فجأة بعد صبر واهتمام مبالغ فيه بتفقد اهتمامها»؟

- في الحقيقة (والإجابة هنا عن الرجل التقليدي الطبيعي ابن الناس اللي نعرفه)

تمام، يعني مش الرجل النسوانجي أبدًا..

السبب الأول: راجل معندوش قدرة على التعامل الاحترافي أو الخبرة الكافية بالاحتكاك بالجنس الآخر، فبالتالي مش عارف يقرأ هل دي علامات (تقل) منك، ولا علامات «رفض»...

و بمناسبة الرفض في حاجة لطيفة بلا حظها في الشاب الشرقي اللطيف ابن الناس برفضه..

إنه مبيتعاملش كويس مع «الرفض» (وبيتخيل إنه الرفض دا رفض شخصي، وبيظهر عليه علامات غضب لو انفعال أو في سيناريو تاني بيشكك في «رجولته» ونظرته لنفسه إنه مش) راجل بما فيه الكفاية إنها مترفضوش) وفي رجالة تانية بتاخذ موقف (هجومي جدا) ضد البنوثة اللي رفضتهم دي، وفي رجالة تانية بتاخذ موقف «انغلاقى» على نفسها وبتعتزل التعامل المباشر أو الإدلاء بإعجابها الطبيعي حتى لو في إطار مجاملات أو تعامل في إطار العمل وخلافه.



الشخص بالموصفات دي بقى بيبقى عاصر على نفسه ليمونه أصلاً قبل ما يبدي علامات الاهتمام دي أو حتى إبدائه لإعجابه.. وبالتالي بيتخيل إنك بطريقة غير مباشرة ولطيفة (رفضته)..

السبب الثاني: ود أقل انتشارا بس هتلاحظوه برضو هو إنه (رد فعل البنت نفسه بيبكون مبالغ فيه) يعني إيه؟

.. مثال.. واحد لطيف أبدا إعجابه بزميلته في الشغل أو في كورس أو الجامعة وهي بكل «هل» كدا قامت عينيتها قلبت (قلوب) وفي ورد ودباديب طلعا في المكان فجأة واتفاعلت معاه بترحيب أزيد من اللازم وكأنه كان كراش حياتها..

هو ووب ستوب هنا.. وتعالوا ندخل في دماغ الراجل لدقيقة اتخيلي إنك صغرتي صغرتي صغرتي، لحد ما دخلتي دماغه حرفيا، دلوقتي ادخلي برجلك اليمين هتلاقي في كل حتة.. (أكل أكل أكل أكل ومثلات بيتابعهم ويفكر فيهم وموديلز متابع كل صورهم على الانستجرام وصحابه وبعدين شوية صناديق أولهم على يمينك) صندوق الكورة، ودا متسجل فيه كل ماتشات الكورة اللي شافها بكل ذكرياته معاها كل تفاصيل حياة اللعبة اللي بيحبهم . وبعده كدا) صندوق الخيالات) ودا صندوق قدر ملكيش دعوة بيه وفي صندوق (الشغل) ودا صندوق طموحه العملي وأهدافه الحياتية وبعدين في الركن البعييد خالص ورا الشمس كدا) صندوق المكافآت)..

وذا الصندوق اللي بيتحط فيه كل مشاعره وكل المكافآت اللي حصل عليها من أيام ما جه الدنيا..

من ساعة ما مامته كانت بتكافأه على الواجبات لحد الهدايا اللي كان بيتلقاها من أبوة لما يعمل حاجة صح لحد كمان أول بوسة أو أول حضن أول أول احتكاك أو تعامل جسدي مع بنت الجيران لما صبر وعبر عن حبه ليها وفضل يتحايل شهور عليها إنها توافق بمسك إيديها ويعديها الطريق..

اخرجي بقى من دماغ الراجل، واحفظي الجملة دي كويس) لو الراجل محسش بالمجهود الكافي إنه يوصلك أو يتعب علشانك ببساطة مخه هيسشعر إنه في حاجة غلط حصلت وإنك

مش مكافأة كافيهِ لإحساسه بالإِنْجَاز)...

همسة (معظم الرجال مبتعرفش تفرق بين علامات «الرفض» وبين علامات «المعادنة») أحياناً
الأتين عندهم بيكونوا واحد)..

السؤال الثالث (عن خيانة الزوجة)

«إمتي الزوجة بتخون؟»

السؤال دا بقباله بطريقة مباشرة أحياناً، وأحياناً بطريقة غير مباشرة زي بنت تسألني عن مامتها
اللي اكتشفت مؤخراً إنها بتخون باباها .

وزي ما إنتوا اتعودتوا مني إني لما بتكلم عن «موضوع» أو مشكلة أو سؤال بتجنب النقاش في
الأبعاد غير العاطفية، لأنني مؤمن إنه في أشخاص آخرين أكثر علما ودراية وخبرة مني يتكلموا
في الأبعاد المجتمعية أو الدينية أو الغلط والصح دي، أو لمهاجمة الزوجة حتى .. فأنا هتكلم
عن «البعد السيكولوجي» والدوافع النفسية والعاطفية اللي بتوصل «الزوجة» للخيانة وهدأ
بالأكثر شيوعاً بحكم خبرتي بالتعامل مع الحالات اللي زي دي:

١ - احتياجات عاطفية: ودا السبب الأكثر شيوعاً، في الغالب الرجل الشرقي عموماً مش
بيترى على التفاعل العاطفي مع شريكة حياته، لأنه المجتمع والبيئة والأهل بيوصموه
لو عبر عن مشاعره وحبهِ (بالضعف)، وإنه أقل رجولة» دا تلاقيها ساحراله» إلخ
إلخ، بالتالي عدم تمرينه وعدم قدرته إنه يعبر عن مشاعره للطرف الآخر بيسبب عندها
احتياجات عاطفية كتير وقوية * حتى أبسط المشاعر للزوجة زي الحُضن والكلام
الغزل أو الحلو برضو مش بيعمله، فيسيبها غير مشبعة عاطفياً، وبالتالي أي صدام
أو افتقار للإحساس بالأمان معاه بتدور الزوجة عن طرف ما خارجي يشبعها
الاحتياجات دي، والعملية دي مش بتتم أبداً بطريقة مباشرة منها، يعني هي مش
بتكون قاصدة إنها تعرف على راجل غريب آخر يشبعها الاحتياجات دي خصوصاً
لو هي متحفظة، لكن عقلها الباطن بيخدعها بإنه يختار إنه يصنف الشخص الجديد دا
إنه مجرد صديق في البداية لمجرد إنه يحافظ على احتياجاته العاطفية مشبعة وتدرجياً
بيتحول دا لتواصل أكثر عمقاً بينهم .



٢- الإحساس بالرغبة («التبعية»): الزوجة اللي بتقعد سنين مع زوج أقل رجولة من مستواها) «الأثوي»، أو زوجة بتلعب أدوار فوق طاقتها في الأسرة والعيلة مع الوقت بتحب تشبع احتياجها إنها» تابعة» لرجل أكثر رجولة من زوجها، وتحس إنها تابع ليه وتبدأ معاه حياة عاطفية بتتسم بسلمات مراهقة عاطفية من أول وجديد، زي إنها ترجع تراهق في لبسها، طريقة كلامها، طريقة حياتها، حتى ممكن تشارك في أنشطة لبنات أصغر منها بكثير، وأحياناً ممكن ترجع متعرفش تفتح برطمان الصلصلة من أول وجديد.. الأثنى طبيعتها لياها احتياج سيكولوجي إنها تحس» بالانتماء» والتبعية لرجل أقوى في الشخصية دائماً .

٣- الرغبة في الإحساس» بالاهتمام»، أو احتياج شعورها بالأنوثة.. إحساسها إنها لسه أنثى مرغوبة وقادرة على جذب الرجال خصوصاً مع اقتراب سن اليأس أو حتى بعد) التغيرات الفكرية) اللي بتمر بيها، بتحب الزوجة هنا مع إهمال الزوج لياها إنها تحس إنها لسه مرغوبة من الجنس الآخر، والأهم إنها لسه مفتقدش قدرتها على جذب أي راجل نفسها تجذبها لياها، لكن المرحلة دي بتكون مؤقتة ومش بتبقى خيانة أد ما هي محاولة منها للفت الاهتمام من أول وجديد ولتجديد ثقافتها بأنوثتها ونفسها .

٤- حيلة دفاعية للتعامل مع الضغوط.. بعد الصدمات العاطفية بالذات زي موت أحد الأبوين أو خسارة شخص عزيز × خصوصاً مع الناس اللي عندها مشكلة في (الفقد) بتميل الزوجة مع غياب دور الزوج في التواصل العاطفي معاه، إنها تدور على طرف آخر يملأ عندها الفراغ المؤلم دا، والدافع هنا مش احتياجات أبداً، لكن دي طريقة من عقلها الباطن إنه يحمي نفسه من الألم والانهيار الناتج عن الفقد دا بأنه أقرب وأول شخص يدخل حياتها تحس إنها مرتاحة ليه وتطور ناحيته مشاعر وروابط عاطفية لمجرد إنها تحس بالأمان وتتخطى (فقدانها) وصدمتها العاطفية دي.

٥- دي حاجة في جيناتنا»: ودي نظرية ظهرت مؤخراً بتقول إنه المرأة زي الرجل في نفس الدوافع الداروينية» × ... الدوافع الداروينية نسبة لداروين بتقول إنه الرجل بيميل للعلاقات الجسدية المتعددة علشان ينشر جيناته ويضمن لجيناته فرصة أكبر في الانتشار، وبالتالي فرصة أكبر لانتشار الجنس البشري على الأرض منذ أيام رجل الكهف، النظرية

دي بتقول بقى إنه المرأة زي الرجل في نفس النقطة وإنه الإناث زمان كانت بتتميل إنها تكون علاقات متعددة مع رجال متعددين لضمان أكل وأمان وفرصة أكبر إنها تخلف أولاد أكثر بجينات مختلفة فلو طفل جيناته ضعيفة ومات يبقى الجينات الأخرى في الطفل الآخر تعيش وهكذا، بس النظرية دي مش مؤكدة وعليها اختلاف كبير وناس كثير رفضوها لأنها مجرد نظرية.. وطبعاً نزع المرأة للخيانة لمجرد الاحتياجات الجسدية مش منطقية لأنه × في الغالب، المرأة هي كائن عاطفي والعلاقة الزوجية هي وسيلة من وسائل التواصل العاطفي مع زوجها، مش مجرد (تفريغ) أو مجرد علاقة وخالص .

ولأنه دائماً الرغبة عند المرأة لازم يسبقها روابط عاطفية قوية ومشاعر بالشخص دا.. على عكس الرجل اللي كثير بيكون «الرغبة» هي الدافع للحب والمشاعر، ولذلك الرجال دائماً عندهم مشاكل في القدرة الجسدية، لكن المرأة عندها مشاكل في «الرغبة الجسدية»

السؤال الرابع

(الرجل الخجول X الرجل الجريء)

– هل البنت «بتحب الرجل» الخجول؟ ولا الرجل الجريء؟

في الحقيقة الموضوع دا هتلاقي البنات معظمهم متشابهين على إجابته ومعظمهم هيجابوا إجابة من نوعية: (الأتنين يا صديق، إحنا عايزين رجل خجول ومحترم وابن ناس كدا، بس من جواه سافل وصايع وقليل الأدب واللي عايزه بياخده)..

نظرياً دا) «تناقض» وفعالاً للوهلة الأولى هتحس إنه: «يخرب بيت القرف يا بنتي متزهقنيش في حياتي؟... وإيه جو) ناشف من بره وطري مقرمش من جوا) هههههههه ؟

لكن فاكرين لما قولنا إنه المرأة عندها القدرة إنها تحمل سمات شخصية «متناقضة» عادي وتعيش زي الفل ومبسوطة، فبالنسبة لها مفيش تناقض بين «الخجل» و«الجرأة» في نفس الوقت .

ليه بقى؟

لأنه الموضوع بالنسبة لها هيكون «موقفي» يعني دائماً دائماً المرأة هتفضل الرجل «المؤدب» بس أدب اختياري... يعني هو عاش فترة طويلة مش «خجول» (وصايع وضايع.. لكنه اختار يبقى «محترم») في النهاية اختياريًا محدش أجبره على دا .



ولذلك المرأة تفتتن بالشخصيات الكاريزمية زي «النسوانجي» أو «اللعبوب» اللي بيعرف إزاي يكسر الحواجز اللي بتحطها حوالين نفسها .

قدرة الراجل على كسر الحواجز دي بلامبالاة، بتديها إحساس « بالأمان» لما هتكون معاه لأنه هيكون صاحب قدرة أكبر في التفاعل مع معطيات الحياة اللي ممكن تكون صعبة عليها أحياناً .

فالصح ليك كراجل إنك تظهر « الجانبين» كويس جدا .

أظهر خجلك وهدوءك أحياناً، وأظهر انفعالك وغضبك أحياناً أخرى، وأظهر رخامتك وسفالتك وجرئتك، أحياناً أخرى... وراعي إمتى تعمل كدا لو لوحدكوا أو قدام ناس ..

لكن هقولك بقى إيه أكثر حاجة «بتكره البنث في حياتها؟ هو إنك تكون ممل.»

أيوه ودي الشعراية اللي بين « الخجل» والملل .

لأنه الشخص الممل بيظهر قدامها وكأنه شخص « منغلق على ذاته»، وبالتالي مش هيقدر يتعامل مع الواقع ولا هيقدر يحميها، أو فكرة إنها تستشعر إنك معندكش حاجة « تقولها «أو معندكش حتى اهتمام تسمع لأنك مش بتتفاعل معاه بما فيه الكفاية.

فدي كارثة هتفقلها منك وبتكرها فيك من البداية وهتخليها ترفض تتفاعل معاك .

النصيحة بقى

بص حتى لو إنت « منغلق على ذاتك» وشايف العالم مكان كئيب وحزين ولا يستحق إنك تعيشه أساساً، أو حتى إنت مش عارف تتكلم في المواضيع اللي بتحب هي تتكلم فيها ولا عنذك أدنى اهتمام تسمعها بتتكلم عن إيه؟

برضو تقدر في الحالتين تاخذها للعالم بتاعك، يعني احكيلها عن نظرتك «السوداوية» الكئيبة للحياة ووريها ليه إنت وصلت للقناعة دي؟ وليه إنت شايف العالم كدا واحكيلها تفاصيل نظرتك وحياتك دي.

بالفطرة المرأة كائن فضولي، هتتحب تعرف كتير عن نظرتك المختلفة دي.

طب لو حسيتها مش مهمة تعرف التفاصيل « السوداوية» دي يبقى مارس مهارة تانية كل البنات بتحبها» إنك تخليها تطلع كل اللي جواها في نقاش خفيف وفي نفس الوقت ثري

ثقافياً).. يعني اسمعها كويس جدا وخليها تفضفض وتطلع كل اللي جواها ..
وبالتدرج في سماعك ليها احكيها معلومات قراتها أو تعرفها عن الحاجات اللي بتتكلم فيها،
دي هيخليها تعرف إنك مش «ممل» ولا حاجة، لكن شخص مثقف وبيسمع للناس كويس .
والأهم إنك في كل الحالات إوعى تنسى تتفاعل معاها» بصريا «يعني حركات عينك ونظراتك
وانفعالات وشك هتفرق جدااا معاها .

السؤال الخامس:

هو إحنا ليه لما بنبجي ناخذ قراراتنا بنبقى متلخبطين ومش عارفين نعمل إيه بالضبط، لكن لو لحد من
أصحابنا بنبقى شاطرين جدا؟

السؤال دا بقاله من حين لآخر، وأحياناً بلاقيه بيتكرر مع الناس اللي بقالها في الاستشارات...
إنهم بيقوا شاطرين أوي في نصح غيرهم، لكن بيبجوا عند نفسهم و«يقلبوا بطة بلدي»:
الموضوع ببساطة عند البنت إنه تقريباً كل قراراتها بتبقى مبنية على emotional basis مش
rational basis يعني مبنية على «أساسات عاطفية- مش عقلانية» دي البنت بطبيعتها في
كل حياتها حتى .

مثال لطيف أوي بتعيشه البنت كل يوم تقريباً...

لما بتعدي قدام فاترينة فساتين فرح تحفة بتعمل إيه؟ هل بتبص على السعر الأول؟ هل بتركز على
نوع القماش المصنوع منه الفستان؟ هل بتركز في لو كيشن المحل وحجمه وتصميمه؟
لأ، كل اللي بيجي في دماغها في اللحظة الأولى «التصور» إنها لابسة الفستان بتعيش الحالة
نفسها لما بتتخيل نفسها لابسة الفستان وداخله بيه الفرحة الفلاني مع حبيبها وجوزها الفلاني
اللي هيكون لابس بدلة تحفة.

هتبدأ كمان مزيكاً الزفة تشتغل في راسها وهي في لحظات التخيل العميقة دي، وهتتخيل
نظرات الناس ليها لما يشوفوها وهي عروسة زي القمر وبيتها مسوا على جمالهم ورقتهم
وأد إيه هما لايقين على بعض هتتخيل كمان صاحبته الفلانية اللي بتكرهاها وبتحقد عليها
لما تشوفها في فستان تحفة زي دا هيظهر أنوثتها وجمالها وأناقته وشياكتها في نفس الوقت



وهيخلي اللي بيكرهوها بموتوا من الغيظ

كل دا في لحظات معدودة العقل الباطن بيكون فيها emotional attachment - روابط عاطفية مع الفستان، وهو) جماد) وخذوا بالكوا من إنه جماد دي أوي بقى في اللحظة الثانية عقلها الواعي يدخل في نقاش لطيف مع العقل الباطن ويقوله:

- يا عم العاطفي الرومانسي مش تبص على السعر؟ لأنه العقل الواعي بيبيني قراراته أكثر على (قواعد منطقية وحسابية أكثر)..

- العقل الباطن: يا عم الفصلان دا، متسييني شوية أفرح بشوية التخيل بتوعي، هو الواحد Meyer حتى يتخيل، وبعدين هيطلع بكام يعني، يعني متوريني كدا؟

- العقل الباطن: هوووووووب هووووووب دا بكام ألف جنبييه، يا حسرتي السودا ياني ياما، هو الواحد هيفضل نحس كدا ومينسطقش بأي حاجة خالص) برضو روابط عاطفية مؤلمة)، وهنا دا بيسموه في السيكلوجي mood swing أو تقلب مزاجي بين حالتين) الفرحة) و) الحزن) (لكنه بمر بسرعة.

- العقل الواعي: مش قولتلك متبطلش تعيش بقى في جو الأحلام دا، إنت مش معاك غير نص المبلغ ويدوبك أصلاً هيكنفوك لآخر الشهر تاكل وتشرب بيهم.

العقل الباطن) مذبذبة عينا بقى وفرحان) ها، بتقول نص المبلغ.. طب ما تيتلا ناخذ القرار بتاع الشراء دا بسرعة بقى.

- يا غيبي وهنجيب الباقي منين؟ إحنا أصلاً معناش فلوس كفاية؟

- متقلقش هنجيب الفلوس من فلانة اللي سلفناها، ونستلف من خالتو وتيتة الباقي، بس لحظات الفرحة والمشاعر) الوهمية) اللي كوّنتها ناحية الفستان قوية أوي ومخليايني معنديش أي مشكلة أحس بأي) «ألم») على الديوون اللي هتبقى عليا بس انبسطلي حبة حلوتين.

- العقل الواعي: هو إنت كل مرة تدبسني معاك في قرارات عاطفية كدا وتسييني في الآخر أدفع التمن لوحدني علشان إنت ليك السيطرة والقدرة عليا يعني؟ ولا إكمنك عبيط يعني وبالفعل تشتري الفستان.



سيئة وخاطئة وإنه هو السبب في انهيار العلاقة دي وإنها عملت اللي عليها ودي حيلة دفاعية اسمها) إسقاط) يعني بتسقط مسؤوليتها العاطفية في فشل العلاقة... وشوية ألم ووقت وذكريات وإنها تشغل نفسها بتعافى وبتبقى زي الفل والجميل إنها بتنضج عاطفيا جدا بعد كدا.

وأي حد يقولها (بجك أوي ونفسي نرتبط)..

هتقوله:(اسسسسسكت مش أنا اتخزوقت والله اتخزوقت قبل كدا يا أهبل أنا سمعت الجملة دي مية مرة قبل كدا، ههههههه لو بتحبنى يبقى تقنعني وتنع الجانب العقلي عندي وأشوفك بتأخذ خطوات فعلية وعملية ملموسة)...

٢- بتتعلق في النص :ودي أكثر مرحلة مؤلمة ممكن بنت تعيشها في الكون، لأنه المرحلة ال static مرحلة السكون اللي عقلها الباطن مش بيبقى عارف يكره نفسه فيه* لو البنيت ذكية، منحها مش هيعرف يخدع نفسه علشان كدا أحياناً بقول للبنات اللي بتعاني في فترة التعافي لما تسألني ..

— هو أنا ليه تعبانة أوي كدا يا عويس؟

— علشان إنتي «ذكية» للأسف،عقلك الباطن مش عارف يخدع نفسه.

المرحلة دي مؤلمة لأنها مش بتكون عارفة تمسح الذكريات أو تخزنها أو تعيد صياغتها أو حتى تتناساها.. وبالتالى التعافي بيكون بطييء وصعب وبيصاحبه overthinking واضطرابات نوم وفقدان شهية مؤقتة أو حتى شهية بزيادة.

المرحلة دي دايماً بجانب شغلها والحاجات اللي بوضاهاها بقولها:) ابعدى عن كل اللي حواليكى). لفترة مؤقتة تريحي فيها عقلك وتبدئي تناقشي مع عقلك في كل تفاصيله وفي كل مرحلة لازم يقنع هو بالخطوة دي في التعافي.. وطبعاً لازم تقطعي علاقتك بيه مرة واحدة وتبعدي عن أي مكان كنتوا فيه مع بعض ومتزوريش حتى أي مكان كنتوا بتروحوه مع بعض علشان منسترجعش الذكريات العاطفية دي من الذاكرة العاطفية ونجبر عقلك يتعامل معاها من أول وجدديد .

طب إيه الفرق بين التعلق غير الآمن و«إدمان» الأشخاص يا عويس؟

في التعلق غير الآمن سيكون التعافي بطيء لكنه يحصل فيه progress كويس ومع الوقت بتتعافى البنت .

لكن مرحلة «الإدمان» هي المرحلة اللي فسيولوجيا وسيكولوجيا مفيش أي progress بيحصل لقدام أبداً .

فتلاقي العلاقة لو منتهية من سنة أو سنتين وتيجي سيرته ويبدأ عقلها يسترجع ذكرياتهم العاطفية تاني، تتفاجئ بأنها) فسيولوجيا -جسديا) بتتفاعل مع الذكريات كأنها لسه حاصلة إمبارح» فتعيط وتشنج وتنكمش في نفسها وتنهار في البكاء كمان».. وتتكلم وتتكلم وتتكلم كتبيير وتلاقي إنه ملايين الأسئلة بقت بتتسأل حتى لو مش هيفرق حاجة في إجاباتها .

كمان البنت مهما أقنعتها بالعقل وبدأت تجاوب على أسئلتها بمنطق وحكمة وعلم، هتلاقي حاجتين بيحصل..

الأولى: إنها بتشكك في منطقتك في الإجابة دي، وتحاول تقنع نفسها بأن إجابتك غلط، وإنه في شيء ما غلط مش مفهوم وإنها لازم تروحه علشان تفهم الشيء الغلط دا (مخها بيعمل deception لنفسه)..

الثانية: هتتشكك في نواياك إنت، حتى لو اللي قدامها دي صديقتها المقربة وهتقولها: (إنتي أكيد مش فاهمة حاجة لأنك محبتيش قبل كدا) (أو) (لأنك كنتي غيرانة مني) وتتفاعل وتتعذر.. لكن فعليا هي متقصدهش كلامها أو إنها توجعك لو إنتي صديقتها وقالتلك كدا .

السؤال السادس:

(عويس هو ليه لما الرجل يكون متجاوز ويحب واحدة أو يعجب بيها ويظهر علامات الإعجاب كلها ويوضح نيته غير المباشرة إنه يكمل معاها بقية حياته، حتى لو اضطر يطلق مراته الأولى.. لكن مرة واحدة يبعد لما مراته تعرف! وكأنه مكانش في حاجة حصلت ما بينا وسابني حاسة إني) (رخيصة) ومستغلة وموجوعة وكأنني مكنتش فارقة معاه وبمجرد ما بلاقي نفسي اتحسنش شوية بيقوم مكلمني يطمن عليا، وكأنه لم يحدث شيء وكل فترة بلاقيه بيكلمني من وراها، والمفروض إنه ناضح ومسؤول ويقدر كمان يفصل كويس وهو عنده ٤٠ سنة لأنني عارفة إنك بيفرق معاك السن وناجح جدا في كاريهه ويشغل كويس وعليه مسؤوليات دائماً كبيرة وأنا عمري ٣٠ سنة



مع العلم إنه عنده بنتين ويحبهم ومتعلق بهيم جدا وكان سبب تهديد زوجته ليا باني «هخر بيت وأدمر بنتين بيعشقوه أبوهم» قولي يا عويس: هل أنا غلطانة؟ ولية الراجل بيعمل كدا؟ وهل أنا كنت مجرد نزوة من نزواته ولا فعلا حبني؟ وإزاي بيقدر الراجل إنه يبعد عن اللي بيحبها عموماً؟ في حين أننا البنات لما بتبعدوا إنتوا الرجالة بنقى هنتجن ونقرب تاني ونفرك علشان نشوفكوا إن شاء الله نضربكوا بالقلم بس نرتاح.. لكن إنتوا بتبعدوا؟)

السؤال دا لطيف جدا وهو فيه أسئلة كثيرة غير مباشرة ومباشرة، وقبل ما أبدأ في الإجابة عايز أوضح النقطة اللي الناس كتير بتلخبط فيها» الرجالة لازم تمر بمراحل سيكولوجية معينة* شرحتها مسبقاً علشان تاخذ قرار الارتباط وجزء من المراحل دي إنه لازم يكون» مقتنع «عقليا أو -منطقيا - logically بالقرار دا) فبالتالي أي استعجال أو ضغط أو حتى مناورات ممكن تحصل ممكن تخليه ياخذ قرار الارتباط أسرع، لكن على المدى البعيد عقله الباطن هيحس إنه اتخدع وبالتالي هتقلب الدنيا عليكوا في الآخر .

كمان الرجالة في الانفصال* خصوصاً لما بيكبروا في السن وبيكونوا أصحاب خبرة وقدرة استيعاب قوية ونضج عقلي وعملي، برضو لما يفصلوا يبيعدوا بناء على قرارات) منطقية) في صدام مع الجانب العاطفي في عقله الباطن..

لأنه بيدخل معركة قوية جدا جدا بداخل رأسه إنتي مش متخيلاها كبتت..

يعني الراجل اللي بتكلمي عنه، بصي مدى التعقيد في الموقف اللي هو فيه مثلا) أولاً متزوج)، وفكرة إنه رجل يكون متزوج وناجح ومسؤول يقرر إنه يرتبط عاطفياً بأنتي تانية بتكون حاجة من اتنين:

١- يا هروب من) المسؤوليات) والمنظومة الزوجية والروتينية اللي بقت عليها حياته العملية وضغوط شغله من ناحية، ومسؤوليات البيت والبنات والحياة من ناحية تانية، فمممكن يكون هو مش حبك أد ما) احتاجك «كمنفس لعقله الباطن إنه يهرب من المسؤوليات والضغوط اللي عليه..

٢- يا ارتبط بزوجه اللي معاه وهو في مراحل الاقتناع أخذ قرار الارتباط عقلي بحت، بدون ما يدّي لنفسه الفرصة إنه يكون مشاعر عاطفية كافية ورغبات كافية فبالتالي عقله الباطن حاسس إنه مش حاصله (إشباع) لاحتياجات موجودة قديماً، لكن مخدش

بالب منها غير لما وصل لمستوى من الرفاهية المادية إنه يقدر يعيشها..

لأنه زمان وطول السنين دي كلها كان) مفحوت شغل ومسؤوليات العمل زي ما شوفتي)..
وفي الحاليتين في مشكلة ما في علاقته بزوجته الأولى.

ضيفي فوق كل دا إنه عنده بنتين بيحبهم ويحبوه ومتعلق بيهم زي ما قولتي، ودا بيصعب الموضوع أكثر عليه لأنه هنا» المنطق «بدأ يتضارب مع الاحتياجات العاطفية في عقله الباطن .
وكان تهديد الزوجة الأولى ليه وليكي بأنه البيت هينهار واستخدمت البنات كوسيلة للهجوم قوية عليه..

فطبعي كل الضغوط دي عليه عقله الباطن طور) حيلة دفاعية – defenses mechanism
بأنه «يتجنبك» تماماً لحد ما يقدر ياخذ قرار الابتعاد عنك عقليا .

ودا بيدل إنه فعلاً» حبك «وإنك مكنتيش مجرد سلعة أو نزوة أو شيء عابر في حياته، وبرضو بيدل إنه عنده مشاكل مع زوجته ومحتاج يعالجها فوراً لأنه العلاقة كدا على الـ long term
هيحل برضو فيها مشاكل طالما احتياجات عقله الباطن مش حاصلها إشباع .

الحيلة الدفاعية اللي عقله الباطن طورها دي بنشوفها إحنا كمان في حياتنا كثير لما عقلنا الباطن
بيعملها لما حد يجيب سيرة حد عزيز علينا أوي بس توفى، بنميل إننا منسمعش عنه حاجة في
وقت التعافي علشان منسرتجش ذكريات عاطفية مؤلمة ونفتقده أكثر..

ونفس الحيلة الدفاعية اللي بتحصلنا لما نكون بنكره المدرس الفلاني لما كنا بنروحله درس في بيته
وإحنا صغيرين.منحش نمشي في الشارع اللي كان ساكن فيه.. وهكذا .

فاللي حصل في عقله الباطن تضارب قوي وصدام ومعرفة قوية، قرر فيها عقله الباطن (لأنه
شخص ناضج وأربعين سنة) إنه يعد مؤقتاً لحد ما يبدأ يبني قواعد الابتعاد بناء على قرارات
(logical) في مرحلة بيعملها العقل الباطن اسمها deception لنفسه، والمرحلة دي
الراجل بيمر فيها بتوترات وتقلبات مزاجية رهيبة وأحياناً «نوبات غضب» غير مبررة وميول
إدمانية زي إنه يميل إنه يشرب سجاير الفترة دي لو كان يشرب زمان» أو قهوة» أو حتى يقضي
معظم وقته في الشغل علشان يتعافى.. ودا نمط شبه متكرر عند الرجال، وإن اختلفت الطرق
والحيل الدفاعية اللي بيستخدموها .



– طب ليه بقى يا عويس بيكلمني كل فترة ومش عارف بيعد عني مطلقاً؟

لو ركزتي في نمط إنه يرجع يكلمك هتلاقى إنه لازم بيحصل حاجة من اتنين

يا الفترات بتتباعد بينكوا والكلام بياخد منحى (غير شخصي) فتلاقيه لو كان بيعاكسك مبقاش يعاكسك، ولو كان بيقولك كلام حلو أو بيتغزل فيكي أو حتى بيقولك اسم مميز ليكي هو بس اللي بيناديكي بيه... والمكالمات وقتها بتقل..

وقتها اعرفي إنه عقله فعلاً بدأ يتعافى منك ومسألة وقت وهيخرجك من حياته للأبد .

يا الفترات هتتباعد برضو بس مرة واحدة تتناقص وبرضو ميقدرش يمنع نفسه عن الغزل أو الكلام الحلو في حقلك ويظهر في كلامه إنه أد إيه مضطرب ومش عارف يعمل إيه في حياته وإنه المسؤوليات اللي عليه أقوى من إنه يختار إنه ينهي «المنظومة الزوجية والعملية» اللي بناها .

وقتها اعرفي إنه مسألة وقت وهيرجعلك تاني برضو، لكن تأكدي إنه النمط دا هيتكرر تاني وهيفضل يبعد ويرجع يبعد ويرجع وهكذا .

– هل هو «حبك»؟ للأسف آه .

– وليه «للأسف»؟ لأنه حطك في أسوأ موقف ممكن تتحط فيه «أنثى» وهو إنك تبقى (الأنثى الثانية) في حياته.. وكمان لإنه هيحطك قدام معضلة أخلاقية ربما إنتي مش شايفه نفسك فيها لسه. بس مجربتيش تسألني نفسك سؤال..

– إيه هيكون إحساس الزوجة لو هو أخذ قرار الانفصال عنها؟ هل حطيتي نفسك مكانها؟

هل شخص زيه وبنجاحه ليه مراحش لحد متخصص يفيدته إنه ينجح علاقته بزوجته؟

بناته المتعلقين بيه وبماتهم، إيه هيكون إحساسهم وحياتهم واستقرارهم النفسي بعدين لما يعرفوا إنه باباهم كان بيخونهم مع واحدة تانية وطلق ماتهم علشانها؟

هل مش هتحسي بأي ذنب ناحية دا في المستقبل؟

هل إنتي شايفة نفسك تستحقي تكوني «الأنثى الثانية» في حياة رجل ما؟ ولا تكوني كل الإناث في العالم بالنسبة له؟

أنا عارف إنه مش خطأك و عارف إنه مش ذنبك، لكن كل اللي بأطلبه منك إنك تدي لنفسك فرصة تشوفي الحكم أو القرار دا من وجهة نظر ناس تانيين داخلين بمزاجكوا أو غصب عنكوا في المعادلة المعقدة دي..

(السؤال الأخير :)عويس أنا حبيته بشدة، حبيته ووقفت جنبه وكان بيستغلني كنت عارفه إنه بيستغلني ومع ذلك كنت بديله من قلبي، سنين يا عويس فضلت جنبه وبدعمه وبسنده، وفي الآخر سابني ومشى بعد ما استهلكتني جسديا ومعنويا وعاطفيا وماديا، حسيت إني بقيت مستهلكة، بقيت بحس إني رخيصة جداً ومليش قيمة في الحياة ولولا إن الانتحار حرام لانتحرت، أنا مش بس حبيته يا عويس أنا كمان عشقته ومش قادرة أنام أو أتعاش مع فكرة إنه سابني كدا وراح لغيري يترمي في حضنها.. قولي أعمل إيه في الحياة بعد كدا) .

– يا ريته كان عشق إنتي ببساطة «أدمتية»..

إدمان زيه زي إدمان المخدرات وأقوى لأنه إدمان شخص ..

إدمان الأشياء زي الفلوس أو المخدرات أو حتى الأكل بياخد وقت في التعافي لأنه على الرغم من إنه جماد لكن في مشاعر مربوطة بيه.

فتخلي إدمان الأشخاص اللي هو كائن حي لينا معاه ذكريات وضحكات وأم، شخص كل رد فعل كان بيعمله في وشه كنا بنقدر نعرف معناه ووراه إيه، شخص فضلت معاه سنين بياخد منك كل يوم حنة من عاطفتك وقلبك وشخصيتك ويرسم جواكي ذكريات وعاطفة قوية جدا مربوطة بيه.

– شخص كان حقير لدرجة إنه محترم أشد مقدسات الحياة وهي الحب، محترم حتى احترام الفراق بينكوا ولا قدر يفهم إزاي إن العاطفة دي أقوى رابط ممكن يكون بين اتنين .

– أخطئتي الاختيار في البداية لما لمحتي علامات استغلال من ناحيته ليكي..

– وأخطئتي لما أهملتني حقك في إنك تفهمي ليه بيعمل كدا؟ اتعميتي ورا حبك متخيله إن الحب هو العطاء بلا حدود ودي مصيبة .

لأن في العلاقات العاطفية الصحية لازم تمشي في اتجاهين بين الطرفين، مش هينفع طرف واحد بس هو اللي ياخذ بلا حدود وطرف تاني عمال يستهلك وهو واقف محللك سر .



أخطئتي لما وثقتي في شهوانية الرجال، الرجال كائنات شهوانية بالفطرة يا عزيزتي .. في منهم
يبتحكم في شهوته فيستحق لقب راجل وفي منهم اللي شهواته بتتحكم فيه فيياخذ لقب
حيوان .

—أخطئتي لما لغيتي المنطق في العلاقة، الحب مش منطقي من الأساس، لكن علشان الحب دا
يتحوّل لعلاقة صحية بين طرفين لازم يكون في منطق، كتير بيتخيلوا إن المنطق يبظلم الحب
ويقتل رومانسيته بجفائه وقسوته، لكن قسوته هي الأساس الصلب اللي بنقدر نبني عليه
علاقة حب صحية وبنائه بين أي طرفين .

قدامك اختيارين، يا تقررري تعافى من الإدمان اللي استهلكك لحد آخر قطرة دم في قلبك، أو
تفضلي تعيشي في الماضي تندبي الشخص دا .

وفي رأيي: أفضل طريقة للانتقام هو إنك تحوّلي النقطة دي في حياتك لمصدر قوة جبارة تزرك
لقدام وتخليكي أقوى علشان لما هيظهر الراجل اللي يستحكك في حياتك ..

تكوني مستعدة ومتعافية وقوية وتقدرى تدخلى علاقة الحب دي بقوة وتعيشي أحلى أيام
حياتك وتقدرى تدي كل حاجة صح للشخص الصح في حياتك ..

— إنتي كنتي قوية جدا ومتفانية ومعطاءة بلا حدود لما إديتي من كل قلبك أول مرة.

خليكي أقوى وأتعافى وكمان معطاءة لما هتدي لنفسك بلا حدود لنفسك فقط المرة دي ..

أنا واثق فيكي ثقة عمياء ومؤمن إن قلب بالنقاء دا هيقدر يتخط ويتعافى من الإشكالية دي
بسرعة وهدعمك طول الوقت وهقويكي لحد ما مش بس تكوني أقوى ..

لا لحد ما تبقى مميزة لأنها كلها كام سنة بسيطة وهتبصي لنفسك في الماضي وتضحكي أد إي
كنتي غبية لما تخيلتي إن الضعف هيحللك الأزمة وهيقويكي ...

همسة: «اختاري القوة دايماً» ..



#يقصد إيه؟؟؟؟

١- «لو أنا اتعصبت عليكى هتعملي إيه؟!»

الجملة دي واحدة من كليشيهات الرجالة المصرية..

عايز يقولك إنه معجب بيكي ومنجذب ليكي جدا، بس متحسس إنك إنتي صدامية زيادة عن اللزوم وخايف أو مترقب أو مرعوب من صداميتك لتخرجيه لو انفعل عليكى، وهو عايز يشوفك في حالة أو في وضع الخاضع هتعملي إيه أو تتأذيه ولا لأ..

فالسؤال ده مش حقيقي، لكن بيوضح أد إيه معجب بيكي..

النصيحة (متباينيش أبدا إنك صدامية، إخفيها وأظهري الجانب الأثوي وأظهري إنك أكثر وداعة وكبوت وعسولة)..

٢- «إنتى زعلتيني، أنا مش هدفع إدفعي إنتي»..

الجملة دي لو اتقالت في مرحلة ما قبل الجواز أو الارتباط تبقى كارثة، بتوضح أد إيه الشخصية دي ميتاريايستيك، وهيستخدم المادة كوسيلة من وسائل السلطة عليكى.. وطبعا دي حاجة سيئة جدا..

لكن لو أنتم متجوزين فشاييف إنك ربما مش ذكية في إدارتك المالية، فبيحذرك من إنفاقك المالي، وطبعا جواها جزء من أجزاء استخدامه للسلطة المالية، ودي علامة خطر بتوضح أد إيه إنه عنده إن سيكيور وحاسس إنه مش راجل بما فيه الكفاية بالنسبة لك، ولا عقلايا ولا عاطفيا لأن الحاجة الوحيدة اللي بيستمد منها رجولته هي الجانب المادي، فبالتالي ديه مش علامة جيدة ليكي..

٣- «إنتى بتردى الكلمة بعشرة»..

الجملة دي بتعبر عن إنه عنده إن سيكيور وإن أد إيه بيحبك جدا.. وحاسس بانجذاب قوي من ناحيتك، لكن متحسس من صداميتك.

النصيحة: «قللي من صداميتك»..



٤- أوقات كثير بتفسري الكلام غلط وبرغم إن ليه كذا معنى ((هو أسلوبه بيوضحلي إنه اتفسر غلط فيقولني لا إنتي اللي دماغك راحه شمال))..

الجملة دي في الحقيقة (دماغك شمال) لو الرجل قالهالك وبعدين قالك إنها راحت شمال، لا هو يقصد الحاجة الشمال..

بس يمكن هو متحسس، خايف تجرحيه أو تهزئيه أو خايف تقوليله حاجة فيقولك إن دماغك راحه شمال، فالحقيقة الحاجة دي هو اللي كان يقصدها من الأول، مش زي ما إنتي متخيله..

٥- الجملة التقليدية اللي بنات بتقابلها في جواز الصالونات خصوصًا لو البنات جميلة أو بنت لافتة جذابة..

((إنتي ليه مرتبطيش لحد دلوقتي _ أكيد إنتي حواليك ناس هتعيط عليك.. والخ))..

الجملة دي بتعبر عن عدم إحساس الرجل بالأمان فيبكر الجملة دي برغم إن فيها غزل غير صريح ليكي، لكنه متشكك هل أنا أستحقك ولا لأ..

وإنك اختارتيني أنا إن إحنا نقعد في خروجة أو مع صحابك مع بعض، أو ليه استنيتي إنك توصلي للمرحة إنك تتجوزي صالونات، والأهم إنه متشكك في نفسه: هل هيكون رجل بما فيه الكفاية ليكي، ودي بتكون للبنات شديدة الجمال في البداية.

النصيحة: ((معظم البنات بتجاوب في السؤال ده إجابات متقطعة، ومش مُنعة، لكن في الحقيقة فيه إجابة مختصرة لطيفة وهي

أنا شخص بيحب كل حاجة مميزة وحياتي مميزة وتعبت فيها جدا، فبالتالي مش هسمح لأي شخص يدخل في حياتي))..

الإجابة دي جميلة في شقين:

الأول... هتوضح له أد إيه مميز، فلو إنتي منجذبة ليه هياخد ثقة في نفسه أكبر وفي رجولته..

الثاني... هو لو مش مميز دي رسالة واضحة إنك بترفضيه، وإنه عنده عدم إحساس بالأمان عاليه ومش واثق في رجولته بما فيه الكفاية، فهو لا إراديا وتدرجيا هيخرج وهيبعد عنك، فالعلاقة هتنتهي من أول أو ثاني مقابلة بالكثير أوي، فهتريحي نفسك من خناقة كبيرة جدا..



٦- «أنا لو مش معايا فلوس هتستحمليني لو أنا شتمتك و ضربتك لازم تبقي فاهمة ده مش طبعي يس تسامحيني لو اعتذرتلك»..

الجملة دي بتعبر على عدم إحساسه بالأمان ومتعلقة بسلطته الذكورية أو الرجولية عليكى فهيستخدّم الفلوس في السؤال الأول..

وهيستخدّم الجزء الجسدي في السؤال الثاني باستخدام العنف..

٧- «الاعتذار كل شوية في الكلام اللي بيقوله في الرسائل بتاعتكم، وحتى فتح مجال في الكلام الردود مستفزة»..

ملحوظة: السؤال هنا بعيد عن يقصد إيه؟ لكنه موقفي أكثر بيعبر عن درجة من الإحساس بعدم الراحة، أو إن الشخص ده مضطرب عاطفياً وعنده مشاكل، ربما هو مش متعافى من علاقة سابقة أو هو أقل في المستوى الاجتماعي والمادي، وده مديله إحساس بعدم الرجولة، أو ربما هو شخص شايف إنك مش عاملاله إشباع جسدي فيستخدم الانفعال كوسيلة من وسائل الخداع من عقله الباطن أو إنه بيرفضك من دماغه تمهيداً إن العلاقة تنتهي..

النصيحة: «فرص نجاح العلاقة دي قليلة وضعيفة جداً، وعلاقة خطر من الأساس»..

٨- «أنا بتكلم بقالي ساعة وإنتي مفيش حاجة عايزة تقوليها أو تتكلمي عن نفسك»..

ملحوظة: رد الشخصية على السؤال ده كان (أصل أنا مش بحب جو الاختبارات.. ده بيوترني)..

حلوة الإجابة دي.. رغم إنها شديدة شوية..

الجملة بتعبر عن إن الرجل هنا بيتكلم بقاله ساعة.. ومش بتشاركه بنفس القدر فهو هنا مش حاسس بدرجة من الراحة خصوصاً لو إن الرجل بيكون متحسس أحياناً أن يشارك حد في العام لكن في جواز الصالونات مختلف شوية، فهنا يشارك حاجات خاصة بيه، فده معناه إنك مش متفاعلة معاه وهو مش حاسس بالراحة معاكى..

النصيحة: (متجوبيش إن السؤال ده بيوترني.. الحاجة اللي عايزك تعملها هنا إن قبل ما تردي امدحي الحاجة اللي بيحكهاالك أو حاجة من الحاجات اللي في الكلام ما بينكم..



لأن كل الرجال بتسألهم، كلنا كرجالة في بداية التعارف والارتباط بنسأل البنت أنا اتكلمت كثير إنتي متكلمتيش عنك..؟

مش معناها هنا إنه كارهك أو رافضك، بس إجابتك هنا عليه بتخلق جو من الراحة والتفاهم عكسها بتخلق جو من عدم الأمان والراحة وإنك مش فاهمة حاجات بديهية ليه..

وفيه لطيفة هنا معناها امدحي حاجة في وسط الكلام ده TRICK

ده هيخليه مسوط جدا..

مثال: ((إنك تقولي.. قبل ما أجابو على السؤال ده أو أتكلم عن نفسي أنا حا به أوضح إعجابي بموقف مثلا إنت عملتو أو كنت شاطر في الحاجه دي..

أو إنك تتكلمي عن حاجة متعلقة بحاجة اتكلم عنها..

ثانيا: عشان تتجني وتتخطي الموقف ده كل ما يتكلم في موضوع اتكلمي فيه أو في حاجة مشابهة ليه، بس متوضحيش إنك شديدة أكثر منه..

لأن الرجالة دائما متحسسه من فكرة البنت الصدامية الأكثر منه، بيشفوها إنها شخصية لعينة بتتبع الرجالة وبتخليلهم دائما ينفعلوا ويبشدوا في شعرهم حرفيا رغم اللي حبوه فيها.

٩- «لما أعرف إنه خطب فأباركلو فيعزمني ويصر على إني آجي، مع العلم إنه بيحبني جدا ازي ما أنا بأحبه، بس الظروف غصب عنه وعني ففشكلنا مع بعض»..

الجملة ديه المتلخصة في (غصب عني) والظروف... وإلخ، أنا بستضعفها إطلاقا ومقتنع بأن الظروف إحنا نقدر نشكلها بس خيلنا نتكلم إنه كان ضعيف وييعبر على إنه شخص عنده دراما ونزعة ليها وعائز يوضحلك أد إيه إن الموقف كان مجبر عليه وإنه صعب عليا وعائز يفهمك أد إيه إنه ضحية مجتمع وظروف وإلخ.. وديه علامة مش كويسة..

النصيحة: «خدي وقتك في التعافي وابعدي عنه وما تروحيش وأعتقد إن ده مش من الذوقيات حتى»..

١٠- «إنتي عنيدة وبتجادلي»..

الجملة دي بتعبر على إنه شخص صدامي، وإنك على نفس الدرجة من الصدامية، وهنا بيترجاكي إنه لو سمحت عشان متحسسنيش إن أقل رجولة من قدرتي على السيطرة عليك،



فإديني قدرة إني أنتصر عليك حتى لو انتصار في النقاش..

النصيحة: «إدبلو قدرة وفرصة إنه ينتصر عليك حتى لو انتصار لفظي حتى بعد كده هتلاقه كويس جدا معاك»..

١١- «مش بحب أتعصب عليك وهو بيتعصب جدا»..

الجملة دي «بتعبر على أن الرجل ده صدامي بس ديه علامة إنه بيحبك وبيوضح حبه ليكي، وإنه مش عايز ينفعل عليك بس هو عشان شخص انفعالي أو عصبي فيتعصب عليك ودي وسيلة منه للسيطرة»..

الرجل لما ينفعل وبيحس إنه هيفقد السيطرة فديه طبيعة الرجل هيفقد السيطرة على شغله فينفعل على الموظفين بتوعه هيفقد السيطرة..

١٢- «إنتي قوية أوي»..

الجملة دي «لو سابقتها كلام حلو غزلي فديه مش جملة وحشة خالص هي معناها أنا عايز أرتبط بواحدة أضعف مني، هو خايف..

معناها أد إيه كرجل شايف الشيء مميز فيكي، فحرفيا ده أحسن حد ظهر في حياتك بنفس الطريقة غير المباشرة شايف فيكي حاجة مميزة»..

١٣- «إنتي بتاعتي وأنا زي الفريك مبحبش شريك»..

الجملة دي «إنتي بتاعتي - إنتي مراتي والجوده هي واحدة من الكليشيهات المصرية إن الرجل لنفرض سيطرتي وتبرير ما سيحدث بعد كده من احتكاك طبيعي بينك وبين الرجالة في شغلك فلو قالك أي جملة من دول»..

النصيحة: «قوليله أنا مش شيء - أنا مش ملك ليك إحنا في علاقة لأن الجملة بتوضح إنه غير ناضج وفي نفس الوقت عنده وعنده عدم إحساس بالأمان متعلقة بالمتعة وبالسيطرة عليك»..

١٤- «البنات اللي أنا ارتبطت بيهم قبلك ادمروا وتعبوا نفسيا»..

الجملة ديه (تدل على أن الشخص ده نرجسي جدا عايز يوضحلك أد إيه هو شخص قادر على إنه يخلي الأشخاص الطبيعيين ينهاروا ويروحوا في سكة الاضطرابات النفسية، بس أنا



خرجت من حياتهم)..

١٥- «إنتي ليه خايفة من الجواز و مترددة أوي كده رغم شخصيتك القوية»..

الجملة ديه (هو عايز يعرف إنتي عندك علاقات سابقة ولا لأ)..

هل إنتي عندك مشكلة مع الارتباط ذاته _ هل أنا هو اواجه مشاكل كرجل في إني هخش معاكي فيه نقاشات مفتوحة أو يحصل بينا بعض الحاجات ممكن متكونش منطقية أو أنا كرجل كان عندي علاقات سابقة- علاقات قبل كده كثير مش هقدر أعيش معاكي درجة من الانفتاح خصوصاً لو إنتي بنت متدينة أو متحفظة أو خارجة من بيئة متحفظة..

ديه بردو نزعة للسيطرة عند الرجل..

١٦- «طميني عليكى أول ما توصلي- أول ما تروحي- أول ما تاكلي»..

الجملة دي «بتدل على علاقات إعجاب شديدة منه ليكي، خدى بالك مني أنا بحبك يا بنت اللذينة، هو بيحاول يتقرب منك وديه من علاقات الحب محتاج منك إشارة إنك شخص مميز في حياته عايزه تديها له ويكمل في علاقة شخصية- أو عايزه ما تديهيلوش بس واضح إن سنه صغير واحتكاكه وعلاقاته بالبنات كمان قليلة».

١٧- «أنا مش بفهم الهزار، وده بيعمل مشاكل، أفهم منين إنه هزار ومش جد»..

الهزار بيضحك أو بيرخم أو بيغلس أو حاجة مش منطقية..

لو عايزه تفهمي هزار الرجالة اقعدى فترة مع رجالة بتهزر من قرايبك (باباكي- عمك- أخوكي- صحابك)، احتكي شوية بهزار الرجالة..

هتفهمي إنه مختلف شوية عن البنات- عنيف شوية- شتيمة- كل الرجالة بتشتتم بالمناسبة- ممكن يكون مش منطقي أحياناً أو بيسفو على بعض ..

النصيحة: «اقعدى شوية معاهم عشان تفهميهم»..

١٨- «بيقولي أنا فيا سمة بس بتحمل معنيين متضارين سلبي وإيجابي»..

النقطة دي باختصار معناها إنه بيقولك أنا اللي هيكون عندي القدرة على التحكم في انفعالاتي، فأنا حابب فيكي نفس السمة لك بتدي معنيين متضارين يعني أنا اللي عايز أتحكم..

١٩- «إحنا مجرد صحاب.. قعدت يومين مبردش عليه، فقلالي إنتي خوفتيني وقلقتيني أو ووي-
بتردي برود عليا ليه كده مالك إنتي مكلمتنيش ليه من يومين»..

ملحوظة... هو مرتبط وعمرى ما شوفت اللهفة ديه منه عليا..

الجملة دي «معناها إنه شخص دخل علاقات كتير فأقلقي منه، وده من أخطر تكتيكات
النسوانجي بالمناسبة، فيحسسك إنك مميزة، فحسيسيه إنه مميز كصديق لأنه نموذج الإرباك- إنه
يربكك جداا..

النصيحة: «ارفضيه وما تسمحيش بأي حاجة من ديه- حطيه في خانة الصداقة وحاوي تبعدي
عنه على أد ما تقدرى..



#تكتيكات_ زوجية ١

(أسئلة الوعي الزوجي)

(أنت)

يعني إيه حب بالنسبة لك؟

- إيه أكثر «ميزة» شخصية فيك؟

- إيه أكثر «عيب» شخصي فيك؟

هل هتكتب كتاب عن حياتك، هتسميه إيه؟

هل تقدر تعيش يوم كامل لوحداك؟

هل بتشتغل ومخطط كويس لكاريرك؟

هل بيحصل تضارب بين كاريرك وجوازك؟

هل في وجهة نظرك «المرأة أم الرجل الأقدر على التعبير عن الحب»؟

وايه السبب لدا؟

إيه أجمل ذكرى «بتحملها» لوالدك أو والدتك في سن طفولتك؟

إيه أكثر لحظة «اتخرجت» فيها وأنت صغير؟

إيه أكثر «لعبة» كنت بتحبها وأنت صغير؟

وايه أكثر «لعبة» كانت بتخوفك وأنت صغير برضو؟

إيه أكثر موقف كنت فخور جدا بنفسك بيه وأنت صغير؟ اكتبه بالتفصيل!

هل مؤمن إنه «الجواز» شيء قدرى؟ ولا اختيار شخصي؟



هل مؤمن إنه شريك حياتك «قدرك الحتمي» في الحياة، ولا ممكن

إيه أكبر «مخاوفك» في الحياة؟

وإيه أكبر مخاوف شريك حياتك في الحياة؟

في وجهة نظرك، إيه أكثر كلمة الطرف التاني بيحب يسمعها منك؟

إيه أحسن حاجة كونك أنتي / رجل في الارتباط دا؟

(إنتو) أنت وشريك حياتك .

فكرتك عن « شريك حياتك المثالي »؟ عامله إزاي - اشرحها!

إيه أكثر « مبادرة » أو هدية جتلك منه عجبتك؟

هل بيكررها، ولا جت بالصدفة ومكرر هاش؟

إيه أكثر ١٠ هدايا حبتهم من شريك حياتك؟

هل شريك حياتك شخص مسئول؟ من صفر لـ ١٠ تديله رقم كام مسئولية؟

هل شريك حياتك مسئول اجتماعيا؟ من ٠ لـ ١٠ تديله كام؟

إيه أكثر « ٥ » حاجات بيعملهم شريك حياتك علشان يدعمك ويساندك؟

إيه أكثر حاجة « مميزة » سمة شخصية أو حتى عيب في شريك حياتك؟

× حاجة مش موجودة في حد غير فيه هو فقط؟

هل أنت مؤمن « بالزواج » للأبد؟

هل مؤمن بالحب من أول نظرة؟

هل مؤمن إنه الحب وحده كافي لنجاح العلاقات العاطفية؟

من صفر لـ ١٠ حاسس أد إيه « بالأمان » مع شريك حياتك؟

من صفر لعشرة أد إيه حاسس « بالسيطرة » في علاقتكو؟ × السيطرة الإيجابية.



من صفر لـ ١٠ أد إيه حاسس بالتواصل اللفظي مع شريك حياتك؟
هل بتحس إن «أصدقاك» بيدخلوا علاقات عاطفية أحسن وأفضل منك باستمرار؟
(الجانب العاطفي وإظهار المشاعر)
إيه أكثر (٣) طرق بيعبر بيهم شريك حياتك عن «حبه»؟
إمتى أول ما شوقتها / شوقتيه عرفتي إنك «بتحبيه» بعد أد إيه من ساعة ما عرفتوا بعض؟
إيه أكثر حاجة «جميلة» قالها شريك حياتك في حقلك وعجبتك جدا؟
هل شايف إن حياتك بقت أحسن بعد /ارتباطك /جوازك بشريك حياتك (أصعب -أسهل)؟
واشرح ليه دا حصل؟
إيه هي «عيوب» شريك حياتك الشخصية؟
- هل عيوبكوا بتكمل «بعض» ولا بتتضارب مع بعض - اشرح موقف!
إيه أكثر «لحظة» عاطفية عشقتها مع شريك حياتك؟ اوصفها!
هل بتحس بالراحة لما تيجي تطلب من شريك العاطفي أي حاجة؟ ولا بتحس بخجل وتردد؟
إيه الألوان المفضلة لشريك حياتك؟
إيه الأفلام المفضلة لشريك حياتك؟
إيه أكثر الكتب اللي أثرت في حياته؟
إيه الأغاني اللي بيحبها، وبيحب يسمعها باستمرار؟
إيه أقوى «الذكريات» العاطفية اللي بتعيشها مع شريك حياتك؟
(التحديات والمشاكل والانفصال)
هل مؤمن بالزواج مرة واحدة فقط؟ السؤال للجنسين..
إيه هيكون رد فعلك لو عرفت إنه شريكك «بيخونك»؟ عاطفيا أو جسديا..

إمتى تكون «اللحظة» اللي تقرر فيها تقطع علاقتك بشريكك العاطفي؟

أو تفكر في الانفصال والطلاق؟

هتعمل إيه لو لقيت شريك حياتك ابتدت تظهر عليه «سلوكيات إدمانية» زي المخدرات أو أي سلوكيات إدمانية أخرى؟

هل الـ exes بتوعك لسه موجودين في حياتك حتى لو على سبيل الصداقة؟

إيه إحساسك ومشاعرك ناحيتهم وهما موجودين في الخانة دي؟

(المادة والاستقرار المالي)

– في وجهة نظرك مين هو المسؤول عن «الاستقرار» المالي والمسئولية المادية في الارتباط والجواز؟

هل هيبقى عندك مشكلة لو شريك حياتك قرر إنه «ميشغلش» وتعوله بالكامل أنت فقط؟
السؤال للجنسين .

إيه نظرتك للراجل اللي مش بيشغل وزوجته بتتحمله ماديا بالكامل؟

هل طموحك المالي كزوجة أعلى من طموح زوجك؟

هل قدراتك المادية كزوجة أعلى من الزوج؟

هل عقليتك «ادخارية»؟ أم استثمارية؟ يعني بتميل إنك «تحوش فلوسك» (ولا) تشغلها في مشروع؟

وهل الطرف الآخر متوافق معاك في نفس العقلية المالية دي؟

هل عندكو خطة مالية للمستقبل؟

هل بتحوشوا لبيت / عربية / شاليه أفضل؟

إيه التوقعات المالية اللي منتظرها من شريكك في الحياة؟

(الجانب الحميمي والجددي)

من صفر لـ ١٠ أد إيه راضي عن التواصل «اللفظي» مع شريك حياتك؟



هل شريك حياتك «بيتغزل» بعباكسك بما فيه الكفاية بما يشبع» أنوثتك / رجولتك؟

إيه أفضل كلمات الغزل «المعاكسة» اللي اتقالتلك من شريك حياتك؟

هل مؤمن إنه «المشاعر» جزء رئيسي ومهم في الإشباع الجسدي والحميمي لشريك حياتك؟

– هل مؤمن إنه «الجنس» مهم علشان علاقة الحب الصحية بينك وبين شريك حياتك؟

إيه أكثر «جانب» حابب تطوره وتغيره مع شريك حياتك في الجزء الحميمي؟

لو هتجرب حاجة واحدة غريبة أو جديدة مع شريك حياتك حميميا هتبقى إيه؟

هل أنت سادي أو مازوخي؟

هل بتقرف من الجنس أحيانا؟

هل شريك حياتك يقرف من الجنس أحيانا؟

إيه الأسباب أو السلوكيات اللي بتخليه «بنفر» أو يقرف من الجنس؟

إيه هي ال فيتشات بتاعة شريك حياتك؟

× الفيتش هي الحاجات العادية اللي بتؤدي لرغبة جنسية، زي مثلا إنه الزوج لما يشوف زوجته بتدخن يبقى عنده رغبة جنسية.. أو راجل بيستثار جنسيا من شكل قدم الزوجة وتشده أوي ال heels، أو زوجة يشدها جنسيا دقن ال راجل، وهكذا .

هل بيحصل بينكوا نقاشات «مفتوحة» منتظمة في الجانب الجنسي والحميمي؟

هل بتحس بالثقة المطلقة في جسمك مع شريك حياتك؟

هل حاسس إنك فاهم كل «احتياجات» شريكك (الحميمية والجنسية)؟

إيه أفضل طريقة «لمداعبة» شريك حياتك؟

إيه أفضل طريقة «للقبلات» بتخليه مبسوط ومشبع أكثر؟

إيه أفضل «وضع جنسي» لشريك حياتك؟

هل شريك حياتك عنده أي نزعات «مازو خية» أو «سادية»؟



هل عندك مشكلة نزعاته دي؟

ولو عندك مشكلة إزاي بتقدر تتغلب عليها؟

إيه أفضل طريقة بتحب «تلمس» أو تتحضن فيها من شريك حياتك؟ وهل هو «مدرك لدا»؟

إيه أقوى سر «لخيالاتك الجنسية»؟

إيه أقوى «خيال جنسي أو قصة جنسية» نفسك تعيشها مع شريك حياتك؟

هل بتغيروا المكان أو الغرفه اللي بتمارسوا فيها علاقتكوا «الحميمية»؟

إيه أكثر «حاجة» بتحبوا تعملوها بعد علاقتكوا الحميمية؟

إيه أكثر حاجة بتشيرك حد الجنون في شريك حياتك؟

وهل شايف إنه «الجنس» مجرد تواصل جسدي فقط، واللا تواصل روحي وعاطفي؟

#تكتيكات_زوجية

